

JEREMIA

Porofete Jeremia juju â gie-ticnere dân â binan piticne manan̄gopenen̄ i fun̄ne kecziñucte: Gien̄ic âgo-ticne, zân̄ene Baruku, eki hâcne Jeremiare dân â binan̄ bocjaha qâren̄kewec fokac.

Jeremia e Jesajazi hâmome fuawec. E porofete juocte Anutuzi rowosâerâ giedân̄ mucnewec, ine jara damen̄ 627 B. C. ira. (*Gaṅ 1:5-10*) Jeremia e gie qizecne jajahec bacjofaocte Wofun̄zi mucnewec hâcne. Moc i Judan̄ic jaṅe Anutu rujen̄icte dân̄ mana suarâ e jahacne râpeckembiṅte jaṅerao sisipiric â iima gie baocte manasuweg irec biṅe mumu ṅic juocte mucnewec. Â moc ine Judan̄ic jaṅe man̄jen̄ic bârisiepie Wofun̄zi busâqoc mana-jarehuc jaṅerao mocwâc heheqâre â hesarac gie baocte manasuweg irec biṅe mumu ṅic wâc juocte mucnewec. Eme Jeremia gie-ticne fun̄keocte Jerusalem haeo ferâ juwec. Ehuc fun̄kerâ Judan̄ic jaṅe juju â eebapa sâqocne-jen̄icte mu hanec ejarewec. Jaṅe ṅicwofun̄ Manasezi juhame bâbâsifuc boc bâfuarâ nemuqân̄ aran̄ bajarehuc Anutu râpeckembiṅ hâcne. Irec uṅ sawan̄ ejarehuc man̄jen̄ic bârisien̄icte fâro â zoqoc boc ejarewec. Ehuc findan̄dân̄ zin̄uc jazawec wâc: Nõṅe man̄ bâbârisie fârine bâfuapie Anutuzi mana-ṅareha Asiria kâpâcwâru fickonec sâcne risierâ Judan̄ic âgofâc-ṅen̄ic jaṅehuc zuzuhuc mocwâc fuame guru mocjaha ehuc Wofun̄ Anutu-ṅen̄ic aran̄ bacnehuc junzepen̄.

Dân i ñicwofuñ Josiazi juhame (627–621 B. C.) jaza qâmoc ewec. Ñicwofuñ eki hâcne Jeremia âgo ecnehuc juhame porofete gie-ticne sâcne bahuc juwec. Mâc zâhec ine Jojakimzi ñicwofuñ juhame (609–598 B. C.) ñicwofuñ â Jeremia ñonden-jekicko fâfâuc â rârâsi fuawec. Ehame ñicwofuñzi sawa mâcne, taha bapa jañe mâmâc porofete râsi ecnepie wiac buqâqânducne bocjaha fuacnewec. Dângieo râembiñ, muc zârâneheczi qambiñ, kikene jâc fifitacko râembiñ, ehuc taha ufuñko mocwâc mi feocte aka hecnembiñ. Wiac inucne fuacneme Jeremia mañticne wahawec, ehuc ine sifu Wofuñtao qohota sanañkehuc gie-ticne bebehe i mi ewec.

E inuc ehuc jufekume jara damen 605 B. C. ira unđân-ticnere fârine fuñkerâ fuawec, kecziñuc: Babilonia â Aigita ñic jañe qaçac sâko embiñ, ehame Babe ñicwofuñ Nebukaneza â momorifâcne jañe Judañic wâc râsi ejarehuc Jerusalem hae somâckembiñ. Inuc fuame Judañic jañe Jeremia dâñticnere manapie fârine ewec, ehame mitificko ferâ miti mocwâc jaza-octe manacnembiñ. Damen ira dâñticne sasawa qârenkeocte wâc mucnekicne. Eme mume gienjic âgo-ticne Barukuzi qârenkewec. Mâc Judañic gâcne jañe dâñticnere manapie fârine eha ñicwofuñzi maname racne ewec.

Jeremia unđân â findañdân-ticne fârio qajâmbânkewec ine jara damen 597 B. C. ira. Damen ira hâcne râsi jañe fisirâ Jerusalem hae mocwâc somâckehuc ro rauc embiñ. Erâ piticne jufeku jara 587 B. C. ira ine Jerusalem

hae â taha ufunj imackembiñ, ehuc Judanjic fekiecne bocjaha ñicwofunj-jeñichec Babilonia mârenko kâpâcwâruo bacjopa rambiñ. Jeremia e jahacne ine Jerusalem haeoa ñehuc Judanjic gâcne bâmiriñ-jopahuc findanđâñ kecziñuc jazawec: “Ñoñe sifu Babilonia ñic jañere kinanñ qahuc juhapie akic-ñopapie zâhec Wofunzi mana-ñareha mâren-ñejicko mocwâc risie warezepienñ.” Juku zâhec ine Judanjic zikare nâfocne jañe Babilonia ñic jañere hâwic-jopame Aigita mârenko wisezo mupie Jeremiazi qatara-jareme fâro ecnerâ wisehuc e mâmâc barambiñ. Eme Aigita mârenko juhuc Judanjic âgofâcne Wofunj tatara ecnembiñ â nemu wiac fune fune aranñ bajarembiñ jañe hâcne unñ sawanñ ejarehuc juku ñicqizec erâ hâmowec.

Jeremia mañticnezi Judanjic âgofâc-ticne jañerao boc domawec. Irec okacdânñ jazaocte boc maname ñemâckewec. Erâ ine Wofunzte dâñzi mañticnao zoc inucne bârunñkewecte wemocko hesonñke-jarezac.

Jeremia papia qizec-ticne bâfâuckepene dâkâne 5 fuakac.

Dâkâne 1, Jer 1–25. Irec mañnao dâñ qârenñekicne forakac i Judanjic â Jerusalem hae irec unñsawanñ dâñ bocjaha fokac. Erâ jañere sawa mâcne, ñic qâpuc gurune gurune jañere unñsawanñ dâñ i mâmâc qârenñekicne fokac.

Dâkâne 2, Jer 26–36. Ira Barukuzi irec dâñ jaha wâc qârenñkehuc Jeremia juju â gie-ticnere binañ bakac. Taha ufunjko dâñ muwec, porofete burecne râsi ecnewec, damenñ bianañ

mocwâc fuaocmu irec findanđân, erâ dân wiac gâcne gâcne.

Dâkâne 3, Jer 37–45. Ira ine dân kecziñuc forakac: Jeremia gie-ticnere erâ râsi ecnepie zârâ zâpâ faio juwec, Jerusalem hae okacne fisicnewec, uñsawanđ dân gâcne gâcne, mu bâmiriñ dân, erâ Judanđic zikare nâfocne jañe Aigita mârenko rahuc Jeremia mâmâc barambiñ.

Dâkâne 4, Jer 46–51. Ira qâpuc ñicguru gâcne gâcne jurambinđ jañere unđân â findanđân qârenkecicne fokac.

Dâkâne 5, Jer 52. Ira ine râsi jañe Jerusalem hae rô rauc ehuc hae â taha ufuñ hetâc qâtâtiembinđ erâ Judanđic kâpâcwâruo bacjopa rakicne irec qâqâhâc dân mocwâc râekicne fokâc.

Dân fârine sâko moc *Jer 31:31–34* ira qârenkecicne i zâzâfic qâricnere findanđân hâcne.

Wofuñzi Jeremia giedân mucnewec

¹ Benjaminđ mârenko Anatoti haeo taha bapa jumbinđ jañere guruonec ñic moc zâñene Hilikia ere ñokâ Jeremiazi dân mutaniñkewec zine hâcne.

² Erao Wofuñte dân fuawec ine Amonđe ñokâ Josia e Juda mârenko ñicwofuñ gie bahuc juhame jara 13 ewec damenđ ira. ³ Erâ irec faicnao Josiare ñokâ Jojakimzi Juda mârenko ñicwofuñ juhame

mocwâc fuacnewec, erâ fuacne rakuhame Josiare ñokâ Zedekia eki Judanđic jañere ñicwofuñ juha jara 11 tarame mosa namba 5 ira Jerusalem rune kâpâcwâruo bacjopa rambinđ.

- 4 Wofuňte dâŋ ine kecziŋuc fua-narewec:
 5 “No neŋgoc bumaŋko mi bâfuacguhuc biac man-
 acgupo,
 â neŋgoczi mi rocguhame biac
 rowosâecgupo,
 erâ ɲic jaŋere porofete jucmurâ mugarepo.”
- 6 Mume mupo, “Jei, Wofuŋ Anutu, go manac:
 No motec qârizi weninuc erâ ɲic dâŋ jazapemu?”
- 7 Wofuŋzi ine ziŋuc nazawec:
 “Go ziŋuc mi muzemec, ‘No motec qârî’,
 aricne, ɲic i me i jaŋerao sorecgupe
 rafârezemec,
 erâ dâŋ gaza mutâc ekopac sâc
 mufua-jarezemec.
- 8 Go jaŋere mi hâwicguzejec,
 no hâcne ɲezicguhuc bataracguzore gohec
 jupemu.
 Wofuŋ nore dâŋ inuc.”
- 9 Eme Wofuŋ e meticne sicnerâ micnaneo
 bâuahuc ziŋuc nazawec:
 “Manakic, no dâŋnane micgao râekopac.
- 10 Erâ mamakic, no miŋecgac ɲicne ɲicne â
 ɲicwofuŋ
 â gurufâc-jeŋic jaŋere fekicne
 âkendâŋgukopac,
 eme go qâfiec-joparâ heropiec-jopazemec,
 go imac-joparâ sipiric-jopazemec,
 ɲifec ine heheqâre â hesarac gie bazemec.”

*Jeremia e maŋne ɲerisieme fâricjâc â kuzi
 honewec*

- 11 Eme Wofuňte dâŋ norao ziŋuc fuawec:
 “Jeremia, go wemo wiac honekic?” Eme mupo,

“No fâricjâc tiejne moc fieha honekopac.”
 12 Eme Wofunzi nazawec, “Go sâcne honekomec, no dâjnane fârinehec eocte qâricne juhuc sonaŋkeekopac hâcne.”

13 Eme Wofunzte dâj norao kecziŋuc mocwâc fuame arec jajahec ewec: “Go wemo wiac honekomec?” Eme mupo, “No kuzi moc du âtehuc ŋeha honekopac, ehame kuzi micnezi faic mâreŋkonec ziŋucpec maickekac.” 14 Eme Wofunzi ziŋuc nazawec: “Faic mâreŋkonec hâcne sisipiriczi mâreŋ zirec ŋecjuçfâc sasawa fisi-jareocmu. 15 Manakic, no faic mâreŋkonec ŋicwofuŋ â gurufâc-jeŋic kâcçene piticne sasawa wira-jarepemu, Wofuŋ nore dâj iŋuc. Eme jaŋe fisirâ ru sâc ŋicwofuŋ ŋeje-jeŋic Jerusalem haere motâc fuŋnao â rârec rârec sac fokac irec fuŋnao, erâ Juda hae sasawa irec mendânko râsi ejarehuc hepîe ŋezejec. 16 Eme no hehesic-jeŋicte erâ dâŋgieo râec-jopahuc dâj mutara-jarepemu, jaŋe no râpecnurâ nemu gâcne bâzi rike-jarehuc jaŋacne meqâreŋ wiac dape-jarembiŋ irec. 17 Goki ine becsahacge jomarâ ra dâj mutâcne-garekopac sâc jazazemec. No jaŋere maio mimi qaqa egarezîpore hâhâwic mi bajarezemec. 18 Erâ manac: No miŋecgac tâpîri qikiŋne-garepe hae basanaŋkekicne â aeŋ wâtuŋ â aeŋ bâbâroŋzi sac bakicne iŋuc ekomec. Irec mâreŋ sâko mecne, Juda ŋicwofuŋfâc-ticne mecne, fekicnefâc-ticne mecne, taha bapafâc-ticne mecne â ŋic ŋokac omane mâmâc sanaŋke-jare-fârezemec. 19 Jaŋe râsi egarehuc zika qaniŋmu, erâ ine

bawahacguniŋte eipieniŋmu, no ŋezicguhuc bataracguzore gohec jupemu hâcne. Wofuŋ nore dâŋ iŋuc.”

2

Wofuŋ e Israe ŋic qaqtara-jeŋicte tutuc qa-jarekac

¹ Wofuŋte dâŋ norao ziŋuc fuawec: ² “Go Jerusalemko ra dâŋ kecziŋuc mutec ŋic hazec-jeŋicko huzejec, Wofuŋzi ziŋuc mukac:

Go socqâri juhuc maŋge norao domawec
 â biŋe-nane juhuc maŋjauŋ enaremeŋ,
 erâ mâreŋ sawao â he sarac mi eenao
 bâjâpecnumeŋ
 no irec manasukopac.

³ Israe ŋic jaŋe dameŋ ira Wofuŋ nore tirinjicfâc jumbiŋ,

nânâ bâbâsu-nane hâcne.
 Eme irec kosa nâmbiŋzi kiŋ nâfuambiŋ,
 ehame sisipiriczi fai-jeŋicko fewec.
 Wofuŋ nore dâŋ iŋuc.”

⁴ Jakobore kikefuŋ â Israere kikefuŋ gurune gurune ŋoŋe Wofuŋte dâŋ mananiŋ. ⁵ Wofuŋ e kecziŋuc mukac:

“Mamacfâc-ŋeŋic jaŋe wemo wiacte
 mana-narepie sâqoreme
 behecnurâ nemu jabane jaŋerao qohotahuc
 jaŋacne wâc ŋic jabane embiŋ?

⁶ Ehuc ziŋuc moc mi mumbiŋ,
 ‘Aigita mâreŋkonec jowac-nâpome wefum-
 beŋ

â mâreŋ sawao, mâreŋ burocne hârâc-ticnehec
 kereŋne â dapâcnehec, ŋiczi sicne fotâc
 me ŋec juc mi eenġopieŋko jowa qataŋ enârewec,
 Wofuŋ e wena?’

⁷ Eme no mâreŋ moc jufu gie-ticnehec ira fârine
 â mâriri fokac i nâ gapec eniŋte râec-ŋopapo.
 Nŋeŋe ine ira fisirâ mâreŋ no nahacne biŋe fowec
 i bâsâqorehuc bâbiepie mamakâcne ewec.

⁸ Taha bapa jaŋe ziŋuc mu wioc mi embiŋ,
 ‘Wofuŋ e wena?’

Sâcmutâc dâŋ mamana jaŋe mi mana tarac-
 numbiŋ,
 soŋaŋ jaŋe râpecnumbiŋ,
 porofete jaŋe Baali nemu ere zâŋeo findaŋdâŋ
 mumbiŋ,
 ehuc bafic-jopaniŋte tâpiri mi fojareekac
 jaŋerao qohotambiŋ.

⁹ “Irec hâcne no ŋeŋehc mecne,
 qâricfâc-ŋeŋic jaŋehc mecne
 dâŋgie mocwâc mi bahuc jupemu,
 Wofuŋ nore dâŋ iŋuc.

¹⁰ Nŋeŋe hâwec fotâcnerâ Kipiro nucko raniŋ,
 me Kedara mâreŋ ira kiŋaŋ sorec-jopapie
 ra fuŋne ŋazapie mana-hâmoniŋ,
 ehuc wiac kecziŋuc moc fuawec me mâcne
 i honeniŋ.

¹¹ Niġguru moc weni jaŋe nemufâc-jeŋic
 behec-joparâ furune moc rocjopambiŋ?
 Eme jaŋere nemufâc i nemu fârine aricne.
 Nore ŋicfâc jaŋe ine huriri-jeŋic no behec-
 nurâ
 nemu moc mi babafic-jopane i rombiŋ.

- 12 O sambân, go irec hâcne weaŋkezemec,
go fâfârerâ qarac qarac hâhâwicne qazemec,
Wofuŋ nore dân inuc.
- 13 Njicfâc-nane jaŋe sâqocne jajahec
bâfuac-jofaenŋopien,
moc i opâ zâŋe jujune no hâcne behecnuenŋopien,
â moc i opâ nombân mârenj hahanŋekicnào ropie
opâ hurâ rafâreekac.
- 14 “Israe e kiŋaŋ qaqa me? Me niŋŋiŋko fuawec
me?
Irec wemocte ro bătâtiec ecneenŋopien?
- 15 Laionj jaŋe ere owackeenŋopien,
kâcçene owackeenŋopien hâcne,
mârenj-ticne imackembinj â hae sâko-ticne
ŋerakac
i turuŋkepie zame niniŋ siarerenj fuawec
forakac.
- 16 Erâ i sawa mâcne, Memfisi â Tapanese haeonec
jaŋe qizec rogarepie utu pârâc juzemec.
- 17 Wiac i sasawa gahacne kiŋte erâ faigao fekac i!
Go Wofuŋ Anutuge no hata jowacguzo
muekopac sâc
râpecnuekic hâcne.
- 18 Eme zi wemo wiac moc bâfuacmurâ
Nilu opâ nâzore Aigita mârenjko rakomec?
Me wemo wiac moc bâfuacmurâ
Eufrata opâ nâzore Asia mârenjko rakomec?
- 19 Gahacne hehesiczi bătîŋguocmu
â qaqataragezi okacne bazu-gareocmu.
Irec ziŋuc hone mana tarac ezemec:

Wofuŋ Anutuge no behecnuekic â arañ mi
 banareekic
 i wiac hehesicne â hâtâne,
 Anutu Tâpiri Qunqasaŋ Wofuŋ nore dân iŋuc.

*Baali nemu kiŋaŋ qajarehuc wâwânâŋhec em-
 biŋ*

²⁰ “Go mârâc jaha fuŋkerâ kiŋaŋ giege
 hetarahuc juwefumenj â niŋiŋge
 hetâcnemenj,
 ehuc mumenj, ‘No kiŋaŋ moc mi qapemu.’

Erâ ine tiki toŋne toŋne ira mecne,
 â jâc dodomane sasawa irec fuŋnao mecne
 sasec ŋokac iŋucne waha fomenj.

²¹ No waiŋ ukicne biaŋne â fârine sasawa
 saracgupo,
 eme go weniŋuc erâ ŋerisiehuc waiŋ kâteo
 fuakicne
 â waiŋ jawane irec sâc emenj?

²² Irece go sahacge moŋgeŋ uucnezi hecmuo
 me saife bocjahazi zurecmuo ine
 kiŋ bahacge i nore maio sifu wânâŋ jaha foomu,
 Wofuŋ Anutu nore dân iŋuc.

²³ Go weniŋuc erâ muekic, ‘No wânâŋhec mi
 juekopac,
 no Baali nemu jaŋerao mi qohotaekopac.’
 Go wâneŋ uuruŋko hurâ weniŋuc ehuc juekic i
 honec,
 erâ wiac ebac emenj i manasuc me!

Go kamele ŋokacne kike afec
 hata-ticne kosa rac warec eekac iŋucne.

²⁴ Go kâte doŋgi ŋokacne iŋucne,
 e mâreŋ sawao juku maŋticne ewec,
 eme su qahuc nokafe boc heekac,

mozi andac-ticne sâcne bawahaocmu?
 Moczi e bâfuaocte ecneekaczi babasa gie sâko mi
 bahuc

su qaqa damen-ticnao ra biac bâfuaocmu.

25 Kikegao wic fuazacte soṅaṅkezemec,
 â maracge kerenkezacte manabâc ezemec.
 Goki ine mukomec, ‘Aricne, mi epemu,
 no ṅic jabane jaṅere enareekacte
 jaṅerao qohotapemu hâcne.’

26 “Fiuc roro ṅic moc bâfuaapie qurutuaocmu
 irec sâc jaha Israe kikefuṅ â
 ṅicwofuṅfâc-jeṅic,
 fekicnefâc-jeṅic, taha bapa â porofetefâc-jeṅic
 mâmâc qurutuaniṅmu.

27 Jaṅe jâc âzâcneṅgopieṅ, ‘Goki hâcne ma-
 mac-nâṅec,’
 â qânâ âzâcneṅgopieṅ, ‘Goki hâcne
 rocânâpomeṅ.’

Jaṅe no mi maicnuhuc râpecnumbiṅ hâcne.
 Zârâ damen-jeṅicko ine muṅgopieṅ, ‘Fahar-
 erâ bafic-nâpoc me!’

28 Hâc, ṅaṅacnere manasuhuc
 nemufâc-ṅeṅic bâfuac-jopambiṅ jaṅe weni?
 Ejarepie fahareniṅ me! Eme zârâ hâriniṅ
 damen-jeṅicko
 sâcne bafic-ṅopaniṅmu me weniṅuc irec
 fuṅne taniṅkezejec.

O Juda kikefuṅ, go haege ṅerakac
 irec sâc jaha nemufâcge doma raṅgopieṅ
 hâcne.

29 “ṅoṅe wemocte dâṅgie nareṅgopieṅ?

Ñoñe zeñgoma râpecnumbiñ i,
Wofuñ nore dân iñuc.

30 No naru motecfâc-ñeñic bâtiñ-jopa-bipiepo,
jañe bâbâtiñ-nane qâsuambiñ.

3ika-ñeñiczi laioñ iñucne erâ
porofetefâc-ñeñic nâcjopawec.

31 O mâreñ zirec rune, ñoñe Wofuñ nore dân
mananiñ:

No Israe kikefuñ ñoñe mâreñ burocne
me mâreñ dapâc qisiric iñucne
moc eñarehuc jupo me?

Ñicfâc-nane, ñoñe wemocte zĩñuc muñgopieñ:
‘Nâñe rambañko juñgopeneñ,
irec gorao mi risie fanañmu?’

32 Ñokac zeñoñ moczi eri qoqonañ-ticnere moc
nikeckeocmu?

Me ñic mocte ñokac biñe moczi heticne erine-
hec
moc beheme foomu me?

Ñicfâc-nane ñoñe ine nore zoañ gie bapa
wowosene tâmiric nıkec-ñopawec.

33 “Go boe sau hatage racmurâ
mana sarickehuc guriñne baekic.

Irec hata hehesicne âtehuc
juku biac mañge ewec.

34 Ehame ñaqigao qarâ suriñnezi bahacmâc
jañere soc bohotaekac,

jañe ine wiac moc fiuc rohapie
mi bâfuac-jopameñ, aricne.

35 Erâ goki wiac i sasawa mana-bipiehuc
mukomec,

‘No kiŋ tâmiric, kimben-ŋ-ticne norao fowec i
 omaewec.’
 Manakic, ‘No sâqocne mi bapo,’
 go iŋuc mukicte dânko râecgupemu.
³⁶ Go wemocte manabâc tâmiric
 ra rowec ware rowec ekomec?
 Asiria ŋic jaŋe behecgupie qurutuamen
 iŋuc jaha Aigita ŋic jaŋere erâ qurutuacmu.
³⁷ Ehuc jaŋeraonec wâc mimi busâqoc faio wa-
 hazemec,
 erâ dopecguniŋte woric-jopamen
 jaŋe hâcne Wofuŋ noni qikiŋ-jopapo,
 irec jaŋerao jujuhâmo sâcne mi bâfuacmu.”

3

¹ Erâ Wofuŋzi dân moc ziŋuc muwec:
 “Ŋic moc e ŋonâŋ-ticne beheme
 ra ŋic moc rorâ juku mârâc ŋowe-ticnerao
 sâcne mocwâc risieme roocmu me?
 Iŋuc eene fome muzac mâreŋ i boe sau mâreŋ
 ezac i!
 Goki ine ŋic bocjaha jaŋehéc sasec gie
 bameŋzi
 norao sâcne risiecmu me?
 Wofuŋ nore dân iŋuc.
² Go qâhâŋnerâ tiki mâreŋ burocnaopec zâŋe firâ
 honec:
 Go wena moc mi mana-jaretec
 bâsâqorecgumbiŋ?
 Go Araba ŋic jaŋe mâreŋ sawao ruc bahuc
 ŋeŋgopieŋ
 irec sâc jaha ehuc hatamecko
 sasecŋic jaŋere woŋec ŋehuc jumeŋ,

ehuc sasec â hehesicgezi mâren
bâsâqoremeņ.

³ Irec hâcne hoere aka fuame hoe afecne
me ñemâcne i omae-fârewec.

Goki ine boe sau ñokac iņucne
maņrângeņ erâ mimi jaņgeņ jumeņ.

⁴ Zi ine ziņuc wira-narekomec:
‘O Mamac-nane, no socqâri juhape go âgo
enaremeņ i!

⁵ Go mamana sâqoc tatara tâmiric enarecmurâ
mukic,
â aaricgezi tofamâc foraocte mukomec me?’
Jâmbomac, go iņuc hâcne muekic,
erâ ine sâqocne bazore manatec mi
quņkeekac.”

*Israe â Juda ñic jaņe maņjeņic bârisieniņte fânoc
hejarekicne*

⁶ Eme Wofuņ e Josiazi ñicwofuņ juwec dameņ
ira ziņuc nazawec: “Israe e qaqtara ñokaczi
wiac ebac ewec i moc honemeņ me? E tiki zora
sasawa ira ferâ jâc dodomane sasawa irec fuņnao
rarâ sasec gie bahuc juwec. ⁷ Eme no ziņuc
manapo, ‘Wiac i efârerâ norao risieocmu.’ Eki
ine mi risiewec. Ehame qoticne eeatucne, Juda
hâcne, e i honewec. ⁸ Eme no Israe maņrângeņhec
e sasec gie-ticnere erâ pasi râcnehuc behepo,
i qoticne eeatucne, Juda hâcne, e honewec.
Hone-bipiehuc mi hâwickeha ra sasec gie jaha
bawec. ⁹ Eme sasec gie-ticnere maname afeck-
eha mâren bâsâqorewec, ehame qânâ â jâc aran
babajare izi sasec gie-ticne ewec. ¹⁰ Eme qoticne

eeatucne, Juda hâcne, e iñuc jaha wiac sa-sawa hone-bipiehuc mañticne norao hâcbuc mi râewec, aricne, burec burec sawa norao risiewec, Wofuñ nore dân iñuc.”

¹¹ Eme Wofuñzi ziñuc nazawec: “Israe mañrâñgeñe ere kiñzi wawahane foha Juda eeatucne ere kiñzi fekac. ¹² Go rarâ mâreñ faicpec dân kecziñuc musokahuc muzemec:

‘Israe mañrâñgeñe go risiezemec,

Wofuñ nore dân iñuc.

No buuruc-nanehecte mamana sâqoc

tatara tâmiric mi baju-ñarepemu,

Wofuñ nore dân iñuc.

¹³ Mocjaha, kiñge hone tarac.

Go Wofuñ Anutuge no râpecnurâ

jâc dodomane sasawa irec fuñnao nemu jabane

jañerao ra qohota ware qohota ehuc jumeñ,

Ehuc dânnane mana rereñ mi emeñ,

Wofuñ nore dân iñuc.

¹⁴ Naru motec rângeñe ñoñe risieniñ,

no hâcne bomboñ-ñeñic,

no hae mockonec ñic moc â guru mockonec ñic jajahec,

iñuc iñuc rocjoparâ Zionko râec-ñopapemu,

Wofuñ nore dân iñuc.

¹⁵ “Erâ no mañnanezi mana ziziwec-jopaekopac, ñic iñucne hâcne soñañ râec-jopape jañe mamana â mañqârâñhec juhuc soñañ-ñopanzeñeñ. ¹⁶ Eme ziñuc fuaocmu: Demeñ ira fua sawec erâ mâreñ ñefusucmahuc ziñuc mocwâc mi muniñmu:

“Oc, zi Wofuñte zâzâfic katapa”. Erâ irec

mocwâc mi manasuhuc mu wioc eniñmu me basaniñmu, â qâricne mocwâc mi baniñmu. ¹⁷ Mâcne, dameñ ira Jerusalem haere “Wofunje eri ñeñe hâcne” muniñmu, ehame ñicne ñicne jañe Wofunj zâñe-nanere erâ tumañneniñmu, ehuc râñgenkerâ manjenjic hehesicne irec sâcko mocwâc mi juniñmu. ¹⁸ Dameñ ira Juda kikefunj â Israe kikefunj jañe qâturerâ mâmâc jaha faic mâreñkonec risierâ mimiñnefâc-ñeñic jañere biñe mâreñ jarepo ira fisiniñmu.

¹⁹ “ ‘Eme ziñuc manapo:

No ñokâ-nane mugarehuc mâreñ fâri bian
jâmbâñ moc

ñicguru gâcne jañere sâc sirickekac i hâcne
garepemu.

Erâ ziñuc wâc manapo:

“Mamac-nane”, go inuc munarehuc
bâjâpecnuhuc
juku mocwâc mi râpecnucmu.

²⁰ Jei, ñokac moczi ñowe-ticne eatuckeekac
inuc jaha Israe kikefunj ñeñe no eatuc-
numbiñ.

Wofunj nore dân inuc.’ ”

Ñic jañere mañ bâbârisie dân

²¹ Oi, mananiñ! Israe ñic jañe hata hehesicne
âtehuc

Wofunj Anutu-jeñicte nikec-jopame
râpeckembiñte

tiki burocnao kio ñañâtâc

â kio wâwâsic-jeñicte fânâñ fuakac.

22 “Naru motecfâc-nane manrângeñhec ñeñe risieniñ,
eme qaqatara-ñeñic behepemu.”

Mume muniñmu: “Manakic, go Wofuñ Anutu-nâñec jukicte
nâñe zi gorao fângepeneñ.

23 Jâmbomac, tikine tikine ojowa fua raekac
i burec sasawa,
Israere bâbâpiañ ine jâmbomac
Wofuñ Anutu-nâñec gorao mocjaha fokac.

24 “Mamacfâc-nâñec wiac hure hemârec embiñ i socqâri juhapene nemu repicnezi biac fuñkerâ lama bulimakaofâc-jeñic mecne, naru motecfâc-jeñic mecne mâmâc nâcjopa wefuku nâcjopa-fârewec. ²⁵ Mimi-nâñeczi fofo enârehamo waha fonzepeñeñ â mimi busâqoczi foñnâpozejec. Nâñe sâqocne bahuc Wofuñ Anutu-nâñec bunao bambeñ hâcne, nâñe mecne, mamacfâc-nâñec jañe mecne, qie-nâñeckonecteañ iñuc ehuc juwefumbeñzi miñecgac eengepeneñ jaha, ehuc Wofuñ Anutu-nâñecte dân mana rereñ mi embeñ.”

4

1 Wofuñzi dân kecziñuc mukac:

“O Israe, go mañge bârisiecmuo norao sâcne risiecmu.

Go nemuqânñácge zâñe mai-naneonec bârâriec-jopahuc

ra qohota ware qohota mi ecmuo,

2 erâ dânge mujomirezo murâ Wofuñte qetickehuc,

‘Wofuᅇ e jujâmbânᅇkekac’ muhuc
 jâmbomacko â mumutiᅇ dâᅇko
 erâ sioc mi ehuc mujomirecmuo ine
 ᅇicne ᅇicne jaᅇe Wofuᅇte zâᅇeo
 jajambuᅇ â zeri bari eec eniᅇmu.”

³ Wofuᅇ e Judare ᅇicfâc â Jerusalem
 ᅇecjuᅇfâc-ticne jaᅇe ziᅇuc hâcne jazawec:
 “Gie qâricne he rikec eniᅇ,
 â fâpâ uupicko sara mama ine mi eniᅇ.

⁴ Judare ᅇicfâc â Jerusalemte ᅇecjuᅇfâc
 ᅇoᅇe Wofuᅇ nore biᅇe eniᅇte
 maᅇᅇeᅇickonec sâqocne unucke beheᅇ enzeᅇieᅇ,
 i eebapa-ᅇeᅇic hehesicnere erâ
 kimbeᅇ-nanezi zocbâruᅇ iᅇucne fuarâ zahuc
 fome muzac
 ine moczi moc bâhâpoocte eipiezac.”

Râsi fisi-jareocte mukicne

⁵ Dâᅇ kecziᅇuc Juda mâreᅇko muiᅇ musawec
 eniᅇ, â Jerusalem haeo wâc musokaniᅇ:
 “Hae mâreᅇ rârec rârec qeᅇ qaniᅇ,
 ehuc hahaᅇne bahuc mupie mananiᅇ,
 ‘ᅇoᅇe tumaᅇᅇeᅇie hae sanaᅇ ᅇerakac
 ira razinzeᅇeneᅇ.’

⁶ Ajoc, wiserâ Zionᅇko raniᅇ,
 ᅇec domac mi eniᅇ!
 Wiac hâhâwicne â sisipiric sâko
 faic mâreᅇkonec mupe warekac hâcne.

⁷ Laioᅇ e ᅇicne ᅇicne sipiric-jopaekaczi
 biac kâte uupic-ticnaonec wefukac,
 e mâreᅇge ima baocᅇe faharerâ
 hae mâreᅇ-ticne behewec hâcne.
 Haege ᅇerakac i sipiricke-fâreme

sesuctac fuarâ foocmu.

⁸ Nõje irec hâcne maten qonañkerâ
ki nãñâtâc â kio wâwâsic ehuc munij:
Wofuñ kimben-ticnere zocbârũzi
mi beheç-nâpokac.”

⁹ Wofuñzi kecziñuc mukac: “Damen ira
ñicwofuñ mecne, ñic feçicne mecne hâbi
fafara ejareocmu, ehame taha bapa manjenic
omaeocmu â porofete bipic-jeñic taraocmu.”

¹⁰ Eme mupo, “O Wofuñ Anutu, go jâmbomac
ñicguru zi â Jerusalem rune jañe mâretec
eatuc-jopahuc ziñuc jazamen: ‘Wamazi ñoñerao
fuarâ fozejec’; zi ine zikazi fai-jeñicko feha
juju-jeñic omaezo ekac i.”

¹¹ Damen ira ñicguru zi â Jerusalem rune jañe
ziñuc jazazo: “Mâreñ sawao tiki burocne ñerakac
irecnec mâñãñ fâronezi waharâ fâretij jaha
ñicfâc-nane jañeraopec rakac, erâ i bâbâwosâe
me babataniñ gie baocte aricne, ¹² mâñãñ i
mocwâc hâhâwicne, nore micte fisikac. Zi ine no
nahac dãn mutara-jarepemu hâcne.”

¹³ Honeniñ, karorac qãfoñne iñucne fisikac,
zika keretac wiac-ticne i mãñãñ
qicwânzãñnehec iñucne.

Becâsicfâc-ticne jañere gagasac
i tuçwipec jañere gagasac sirickekac,
jei, sisipiricte biñe eñgopiñ i!

¹⁴ Jerusalem, go mañge zure bataniñ etec
hehesicge omaeme ñezicguzo,
mañgao mamana sãqocne fokac
i mo damenko moc behetec raocmu?

- 15 Oi, mananiņ, Daņ mârēņkonec dâņfânâņ
warekac
â Eferaim tiki mârēņkonec biņe bâroņ fisikac.
- 16 Nične ņicne sawaņdâņ qajareniņ,
â Jerusalemko dâņ ziņuc jazanīņ:
“Mârēņ zorickonec somâ bapazi warerâ
Juda hae ņerakac i râsi ejarehuc semuja
heņgopien.
- 17 Jerusalem e fenarewecte râreckehuc
gie soņaņzi eekac iņuc ehuc ruc baņgopien,
Wofuņ nore dâņ iņuc.
- 18 Wiac i juju â eebapagere erâ faigao fekac,
wiac hâtâne fua-garekac â jujuge sipirickezo
ekac
i hehesicgere fârine hâcne.”
- 19 Jei, busâqoc, jei, busâqoc!
No zâic repicne manakopac,
bunane herickekac, bunane zâzâficne qakac.
Wemocko niniņkerâ juzapo?
Zi qeņfânâņ â zikare ojawa manakopac
hâcne.
- 20 Sisipiriczi sisipiric irec biņe fisikac,
mârēņ sasawa imacke-fârekcine,
fic wiac-nane ututuņ jâmbâņ
â qoruc boze-nane qeņfâfâc jaha sipiricke-
kicne.
- 21 Sându maro honeekopac â qeņfânâņ man-
aekopac
i mo damēņ omae-nareocmu?
- 22 “Jâmbomac, ņicfâc-nane jaņe maņ tâmiric,
jaņe no kâuc bacnuēņgopien,
jaņe naru motec mutucne â mamana tâmiric,

wiac sâqocne mana sarickeņgopieņ,
wiac bianņere ine kâuc baenņopieņ.”

23 Jei, no mâreņko fipe rame
sisifucne â sawane foha honepo,
erâ sambâņko fipe feme
tatamac-ticne basapo.

24 Jei, no tiki honec-jopape qiqiteckemieņ
â mâreņ facne sasawa qiriņ qahuc ņemieņ.

25 Jei, no zâņe fipe rame ņic moc mi jume honepo,
â sawa wipe wise-fâremieņ.

26 Jei, no zâņe fipe rawec,
eme hae mâreņ nânâ mâririhec fowec
i ņerisieme mâreņ burocne foha honepo,
â hae-ticne sasawa i ima bafârekiecne,
i Wofuņ kimbeņ sanaņ-ticnere erâ iņuc
fuawec.

27 Wofuņzi ziņuc hâcne muwec: “Mâreņ sa-
sawa tuhutac luarâ fozejec, bâbâsirowe ine mi
bâsirowe-fârezepac.

28 Irec mâreņ makuc baocmu
â faic sambâņ e gâpâreocmu.
No iņuc mupo â mana biric epo hâcne,
erâ irec bunane mi sâqoreocmu
â maņnane wâc mi risieme behepemu.”

29 Becâsicko rara ņic â tepeņic jaņere ojaware erâ
haene haene ņic jaņe wiseniņmu,
kâte uupicko rucneniņmu
â qânâuņko razirâ soņkeniņmu,
hae sasawa tuhu foha
moczi moc maņnao ņec juc mocwâc mi
eocmu.

30 Sipiricgukicne go ine wemo ecmu?
 Go ŋaqi bâbâronġ hetec huocmu
 me eri wiac golzi bakicne qonaŋkecmuo
 me zâŋe maige jâwec ruacnecmuo ine
 sahac bapa i sifu maŋġaŋ jaha ehuc jucmu.
 Sahacgere sasec ejareekac jaŋe qaisocguhuc
 jujuge gowac rozo maŋkehuc juenġopienġ.

31 Nġokac moc gozi kime kio owa eekac,
 me ŋokac moc mârâc motec-ticne rohuc kio
 huse eekac,
 kio owa inġucne manapo,
 Zionte otâ ere kio owa hâcne,
 e nokafe hehuc meticne sicnerâ muwec:
 “Jei, ŋic zika qaqa jaŋere maio
 weaŋkekopac.”

5

*Jerusalem hae rune â Judanjic ġâcne
 hehesic-jeŋicte fuŋne ritukicne*

1 Jerusalem haere hata forakac sâc
 fotâcne rac warec ehuc mana honeniŋ;
 Nġoŋe hae zoŋa-ticnao ŋic moc e
 wiac tiŋne ebac ehuc juha,
 me siocmâc juocte ecneha bâfuaniŋmuo
 ine haere kiŋ behepemu.

2 “Wofuŋ e jujâmbâŋkekac”, jaŋe inġuc muipiehuc
 mumupaŋ-jeŋic i me i mupie burecne eekac.

3 O Wofuŋ, go siocmâc juenġopienġ
 jaŋe hâcne hone maiŋ ejareekic,
 goki jopa bâtiŋ ejaretec jaŋe manapie wawahane
 ewec,
 â bâsirowec-jopahaŋtec bâbâtiŋge
 qikiŋnemiŋ;

zâŋe mai-jeŋic rângeŋkewec
 i haroŋaŋ sanaŋe irec sâc jâuruwec,
 jaŋe manjeŋic bârisieniŋte takic-jopawec.

⁴ Eme no ziŋuc mupo: “Jaŋe ŋic ŋokac omane,
 jaŋe Wofuŋte hata â Anutu-jeŋicte mumutâc
 dâŋ
 kâuc baengopieŋte mutuc eengopieŋ.

⁵ Irec no ŋic kâcŋene jaŋerao moc rarâ dâŋ jaza-
 pemu,
 jaŋe Wofuŋte hata â Anutu-jeŋicte mumutâc
 dâŋ manaengopieŋ mecne.”

Jaŋe ine iŋuc jaha kiŋaŋ gie-jeŋic
 hetara-fârehuc niŋgiŋ hetâcne-fârembiŋ.

⁶ Irec laionzi kâteonec wefurâ kisuc-jopaocmu
 â kâte qâtozi sipiric-jopaocmu,
 erâ qowi mimicne lepad e hae-jeŋic
 râreckehuc ruc baocmu,
 eme ŋic jaŋe wahapie sâc kisuc qâsuc-jopaocmu,
 i sindaŋ â qaŋatara-jeŋic hâhâwicne irec.

⁷ “No weniŋuc erâ sâqocne bâtâ mire-garezapo?
 Naru motecfâcge jaŋe behecnumbiŋ,
 ehuc nemu fâri tâmiric jaŋerao qetickehuc
 mumupaŋ dâŋ muengopieŋ.

No nânâ mâriri bâfua-jarepo,
 jaŋe ine rujeŋic no behecnurâ sasec ficko
 tumaŋnemiŋ.

⁸ Jaŋe becâsic ŋicne wokemaŋ sâko â andachec
 iŋucne,
 moc e âgo-ticnere ŋokac buroro ecneekac

â moc e âgo-ticnere ñokac iñuc jaha ec-
neekac.

- 9 Eme no wiac irec mi bâtiñ-jopazapo me?
Me ñicguru iñucne okacne mi bazu-jarezapo
me?
Wofuñ nore dân iñuc.

- 10 “Waiñ giegañ-jeñicko razirâ sipirickeniñ,
ima ine mi bafâreniñ.

Waiñ qañeñne hetâcneniñ,
jañe Wofuñ nore biñe aricne.

- 11 Israe kikefuñ â Juda kikefuñ
jañe boc qaisocnuengopien,
Wofuñ nore dân iñuc.”

- 12 Jañe Wofuñ mickehuc zĩñuc muengopien,
“E iñuc mi eocmu,

wiac hâhâwicne fai-nâñecko moc mi feocmu,
nâñe zika â roroc mi bâfuananñmu.

- 13 Porofete jañere dân i fânân sawa,
jañe dân fârine mi bajueñgopien,
irec wiac i jañacne faio fezejec.”

- 14 Irec Anutu Tâpiri Qũñqasañ Wofuñ e kecziñuc
mukac:

“Manakic, jañe dân iñucne muengopienñe
no dânñane micgao râepe zocbârũñ iñucne ezejec,
eme izi ñicguru zi zoc iñucne epie
zâseñ-jopazejec.

- 15 Manañgopien, no mupe zorickonec ñicguru
moc
ware fisirâ Israe kikefuñ ñone râsi
enareninñmu,
Wofuñ nore dân iñuc.

Jaņe ņicguru sanaņne â mârâc jaha
 fuarâ mimiņzi qâric juwefumbiņ.
 Ņoņe ņic i dâņmarac-jeņic kâuc baeņgopieņ,
 â dâņ mueņgopieņ i fuņne mi mana
 taraeņgopieņ.
 16 Tepe motec-jeņicte hâniņ i zâņeruņ micaaņ
 iņucne,
 jaņe ņic qac momori sasawa.
 17 Jaņe nânâ mâririge mecne,
 padige mecne i nâfâreneiņmu,
 ņokâfâcge mecne otâfâcge mecne
 mâmâc omaec-jopaniņmu;
 lamafâcge mecne bulimakaofâcge mecne
 i nâmiziec-jopaniņmu;
 jaņe waiņ â jâmbo hândâņ wiacge nâfâreneiņmu
 â hae sanaņge ņerakac ira roweckehuc juekic
 i hâcne zikazi henzaņ qanzaņneniņmu.”

18 “Damen ira iņuc jaha mi
 bâsirowec-ņopa-fârepemu, Wofuņ nore dâņ
 iņuc. 19 ‘Wofuņ Anutu-nâņec e wemocte wiac
 i sasawa enârewec?’ Ņic jaņe iņuc mu wioc epie
 ziņuc jazazemec: ‘Ņoņe no behecnurâ ņaņacne
 mâreņko nemu jabane kiņaņ qajarembiņ, iņuc
 jaha mâreņ moc ņaņac rune mi juņgopieņko ņic
 furune kiņaņ qajarenzepieņ.’ ”

Ņic fekicne â taha bapa jaņe jupie mi sâckewec

20 Jakobore kikefuņko dâņ kecziņuc
 musokanze pieņ,
 â Juda mâreņko mupie mananze pieņ:
 21 “O ņicguru mutuc matacne â maņ tâmiric,
 zâņehēc juhuc wiac mi honeeņgopieņ

â hazechec juhuc dân mi manaengopien
 ñoje dân zi mananiñ:

22 Ñoje nore mi hâwic-ñopaekac me?
 Ñoje nore maio qarac qarac mi qaengopien
 me?
 Wofuñ nore dân inuc.

No hâwec mecqañeñnao mongen râepo,
 eme izi aka fofu sanan foha

hâweczi sâcne mi jâururâ wefuocmu,
 siri sâko qahuc qâipieocmu,
 hâhâwicne fânânkehuc sifu mi wefuocmu.

23 Ñicguru zi jañe ine manjenic rângeñne â qaqa-
 haricne,
 jañe hata kizurâ wisembiñ.

24 Ehuc manjeniczi ziñuc moc mi mumbiñ:
 ‘Nânâc Wofuñ Anutu-nâñec aran bacnenañ,
 eki hâcne mume hoe zoañ sâckoa fuaekac
 â ekizia wâc mume qa roro â nânâsu
 i dameñ mukicnao sâckoa fua-nâreekac.’

25 Hehesic-ñejiczi ine wiac irec hata
 hesifucke-ñarewec,
 â sâqocne-ñejiczi wiac bianne
 sakare-ñarewec.

26 Ñicfâc-nane jañere ñondenko ñic hehesicne
 juengopien
 jañe wosañeñ bapa inucne kamierâ ruc
 baengopien,
 â bitiñzi ñic kicjopaocte râe-jareengopien.

27 Ñiczi hejenicko wipe qowi ñepie fusucmaekac,
 irec sâc jaha eeatuczi ficjenic fusucmarâ
 fokac;

jañe inuc ehuc bombon erâ juhapie
 mafa mâriri fua-jareekac,

- ehame wokemañ â biuc sâkohec eenḡopien.
 28 Micjenickonec dân hehesicne wahahuc foekac,
 bekâ mâsiñ jañe juhâmoniñte dânjenic
 mumutiñ dânte sâcko mi mutaraenḡopien,
 â qarâ suriñe jañere dân tutumañko mi
 dopeckeenḡopien.
 29 Eme no wiac inucnere mi bâtiñ-jopazapo me?
 Me ñicguru inucne jañe okacne
 mi bazu-jarezapo me? Wofuñ nore dân
 inuc.”
 30 Mârenḡ zira wiac hâhâwicne
 â mamakâcne fuaekac.
 31 Porofete jañe burec ehuc findañdân
 muenḡopien,
 â taha bapazi jañehac mañ mocjaha ehuc
 guriñ bapa gie baenḡopien,
 eme ñicfâc-nane jañe inuc hâcne foocte eja-
 reekac.
 Mâc, wiac i tara-fâreme ñoñe wenac eniñmu?

6

Wiac hâhâwicne fisi-jareocte mukicne

- 1 Faic mârenḡkonec wiac hâhâwicne
 â sisipiric sâko wareocte faharekac,
 irec Benjaminḡte qâricfâc ñoñe
 Jerusalem hae mañnaonec wiseniñ!
 Tekoa haeo geñ qaniñ
 â Bete-Kerem haeo ira hosâc heniñ.
 2 No Zionḡte otâ hone jaunḡ ecnehape añac faio
 soka sanañ ewec e hâcne sipirickepemu.
 3 Lama bulimakao soñañ jañe

qowifâc-jeñic jañehec fisicneniñmu,
 ehuc hae rârec rârec qoruc boze-jeñic fâreniñmu,
 â ru sâc qowifâc-jeñic ejarepie
 nânâ nâhuc juniñmu.

⁴ Jañe ziñuc muniñmu: “Zion rune jañehec
 zika qanañte sowa juhuc zawienañ!
 Ajoc, zoañ qaçackoa ferâ jopanañ me!”

Iñuc murâ muniñmu: “Jei, zoañ biac huzo
 ekac â mumuc biac zorakac.

⁵ Ajoc, ñafeo fenañ,
 erâ erific ñerakac sâc ima banañ!”

⁶ Anutu Tâpiri Çuñqasañ Wofuñ e ziñuc mukac
 hâcne:

“Jâc wiac qafaraniñ, ehuc Jerusalem haere
 somâ râehuc mâreñ facne moc baniñ.

Jei, hae sâko irec mañnao bâbâzâic sasawa
 fokacte

okacne fuacnezejec hâcne.

⁷ Opâ zâñeonec opâ wefuekac
 irec sâc jaha hae ira sâqocnezi fuaekac,

hae mañnao bâbâzâic â sisipiric
 irec dân fohuc juekac;

erâ zârâ zâpâ â zika dameñ sâc
 mai-naneo fuame honeekopac.

⁸ O Jerusalem, go uñdâñ manac!
 Mañnanezi beheçgurâ ima bacgupe
 hae sesuctac fuarâ fozicte.”

⁹ Anutu Tâpiri Çuñqasañ Wofuñ e ziñuc mukac:

“Ñiczi waiñ qizecko fârine bâtirikicne
 zâhec ro nusec eençopienñ irec sâc jaha
 Israe ñic nâfocne ro nusec ejarezemec;

waiŋ gie bapazi waiŋ qanęŋnao
 harierâ hândâŋne basaekac
 iŋuc jaha ehuc Israe ęic rocjopa-fârezemec.”

¹⁰ Eme mupo: “Weni jaŋe mu tutuc ejarepemu,
 â weni jaŋe uŋsawaŋ dâŋ jazape man-
 aniŋmu?”

Manakic, jaŋe hazec-jeŋic bâzickekicne,
 dâŋ sâcne mi manaęgopieŋ.

Jâmbomac, jaŋe Wofuŋ dâŋgere manapie
 zoraŋ eha mana aŋac mi eęgopieŋ.

¹¹ Irec Wofuŋ gore kimbeŋzi fusucmacnukac,
 no bâmunaŋkezore eipiekopac.”

Iŋuc mupe Wofuŋzi ziŋuc nazawec:

“Naru motec hae zoŋao juŋgopieŋ jaŋere faio
 hoŋkec,

â ęicmotec tumaŋnerâ juŋgopieŋ jaŋere faio
 mâmâc.

Ŋowe ŋonâŋ jaŋe mecne, ęic ŋokac qizecne jaŋe
 mecne,

erâ hâmoc dameŋ-jeŋic bembęŋkekac
 jaŋe mâmâc kâpâcwâru bacjopa razo.

¹² Fic wiac-jeŋic mecne, gie wiac-jeŋic mecne,
 â ŋokacfâc-jeŋic i mâmâc ęicguru moc jaŋere
 biŋe eniŋmu,

no menane sicnehuc mâreŋ zirec ęecjucfâc-ticne
 râsi ejarepemu hâcne.

Wofuŋ nore dâŋ iŋuc.

¹³ “Ŋic omane mecne, fekicne mecne,
 jaŋe mâmâc sasawa burecko monęŋ mafa
 hureniŋte andac eęgopieŋ,
 Erâ porofete â taha bapa jaŋe wâc

- zenğoma eatuc ehuc juengopien.
- 14 Wama moc mi fohame sifu ‘Wama, wama’
muhuc
ņicfâc-nane jaņere huc wic burec burec mac
sawa bâsomieengopien.
- 15 Jaņe wiac mamakâcne ehuc moc mimiembiņ
me?
Aricne, jaņe moc mi mimiehuc mimi jaņgeņ
juengopien i!
- Irec waha jopaocmu jaņehec mâmâc waha
jopazejec,
eme no bâtiņ-jopapemu dameņ ira
fâfâc-jopame rândiņkenzepien.
Wofuņ nore dâņ iņuc.”

Anutuzi bâipec-jopame okacne fisi-jareocmu

- 16 Wofuņzi kecziņuc mukac:
“Ņoņe hata fokac i ra honeniņ,
ehuc mârâc jaha hata weniņuc fowec
â bibianțe hata i wena fokac
irec mu wioc erâ bâfuarâ ranzepien,
ehuc jujumana bâfuanzepien.
Jaņe ine mumbiņ, ‘Mi ranaņmu.’
- 17 Eme no ruc bapa ņic râec-jopahuc mupo,
‘Ņoņe qeņfânânțe hazec râeniņ.’
Jaņe ine mumbiņ, ‘Nâņe irec takic-nâpokac.’
- 18 Irec jaņe wemo wiac fua-jareocmu i ņicne ņicne
ņoņe mananiņ,
â kikefuņ go wâc mana tarac.
- 19 Mâreņ sâko mâreņ go manac: Noni mupe
wiac hâhâwicne ņicguru zi jaņere faio
feocmu,
i jaņe jaņac wiac mana biric embiņ irec fâricne;

- jaŋe dâŋnane mana rereŋ mi embiŋ
 â sâcmutâc dâŋnane qikiŋnemiŋ hâcne.
- 20 Iŋuc ehapie Seba mâreŋkonec wiac âsu bian
 â mâreŋ zorickonec musijâc sahacone izi
 wemo enareocmu?
 Qowi hâcbuc ririke-ŋeŋicte mocwâc mi
 aŋacnukac,
 â taha bâzi-ŋeŋicte wâc mi enarekac.
- 21 Irec Wofuŋ no ziŋuc mukopac:
 ‘Manakic, no ŋicguru zi jaŋere hatao
 kike hehepiric qânâ hepe ŋeraocmu,
 eme ira herâ waha jopaocmu,
 mame ŋokâ â âgo bago jaŋe mâmâc ira sipir-
 ickeniŋmu.’ ”
- 22 Wofuŋzi kecziŋuc mukac:
 “Manakic, ŋicguru moc jaŋe faic mâreŋkonec
 wareniŋte zawieŋgopieŋ,
 ŋicguru sâkozi mâreŋ qaneŋnaonec
 wareniŋte fahareŋgopieŋ hâcne.
- 23 Jaŋe tepe damu-jeŋichec, jaŋe momori jâmbâŋ,
 ŋic moc mi akic-jopaŋgopieŋ,
 ojowa-jeŋic i hâwec siri sâkore fânâŋ iŋucne,
 jaŋe becâsic faio wareŋgopieŋ,
 ehuc zika qaniŋte birickehuc Zionte otâ go
 râsi egareŋgopieŋ.”
- 24 Jerusalem hae rune jaŋe mumiŋ:
 “Nâŋe biŋe-jeŋic manarâ menâŋec betaŋkekac,
 erâ hâwic-nâpoha ŋokac moczi
 motec roocte gozi kime zâic manaekac
 irec sâc zâic manaŋgopeneŋ.
- 25 Irec nâŋe gieo mi ranzepeneŋ,

â hata sâkoo wâc mi junzepeneŋ,
ira hâcne râsi jaŋe zika gie baŋgopieŋ,
â rârec rârec hâhâwic sâko fokac.”

26 Eme Wofuŋzi muwec:

“O ɲicfâc-nanere otâ, go matenŋ qonaŋkec,
erâ zafe ruarâ ɲokâ mocjaha sawa jurâ
hâmome mamakucne eenŋgopieŋ
irec sâc jaha ki mamakuc hâhâwicne ezemec,
sisipiric ɲic e ututuŋ jâmbânŋ fisi-gareocmu
irec.

27 “Jeremia, go ɲicfâc-nane jaŋere juju â eebapa
hone tarahuc ba esâic ecmurâ mugarepo.

28 Jaŋe zeŋgoma râŋgeŋke sanaŋkemieŋ,
ehuc afeckerâ micko âkec eenŋgopieŋ;
jaŋe qânâ â aenŋ inucne
sisipiric gie bafâreenŋgopieŋ.

29 Ɔoc ficniepîe bâruŋkewec,
eme aenŋ wiac Ɔocko rikepie mi wosâewec;
gie i maŋgâŋ bakicne,
ɲic sindaŋne jaŋe wosâerâ mi râriemieŋ.

30 Irec zâŋe-jeŋic Ɔiŋuc muzo: ‘Siliwa qaisocke-
kicne’;
i Wofuŋ noni qikiŋ-jopapo irec.”

7

Hata â eebapa-jeŋic sâqocne bebehe irec dân

1 Wofuŋtaonec dân Jeremiarao fuawec i
keczîuc: 2 “Wofuŋte taha ufuŋ irec motâcko
ra domahuc dân Ɔiŋuc jazazemec: Juda
mâreŋ rune Wofuŋ mai ecneniŋte motâc Ɔi
fotâcneenŋgopieŋ ɲoŋe zeŋgoma Wofuŋte dân

zi mananiņ! ³ Anutu Tâpiri Qunqasaņ Wofuņ, Israere Anutu hâcne, eki ziņuc mukac: Nõņe juju â eebapa-ņeņic bâtiņņepie bianķezejec, eme no hae zira zuhuckerâ juniņte mana-ņarepemu. ⁴ Nõņe burecdâņ kecziņuc muhuc ira mi roweckenzepieņ, ‘Ohec, Wofuņte taha ufuņ, Wofuņte taha ufuņ, Wofuņte taha ufuņ zine hâcne.’

⁵ “Nõņe jâmbomac juju â eebapa-ņeņic bâtiņņepie bianķeocmuo â ñaņackoaņ sâcmutâc dâņ tiņnere sâcko wiac ebac eec eniņmuo ⁶ erâ ñic jabane me hozec bekâ fific mi bacjopaniņmuo, me ñic bahacmâc jaņere soc hae zira mi hoņkeniņmuo â ñaņac sipirickenzipiņte nemu jabane jaņerao mi qohotaniņmuo ⁷ ine mana-ņarepe mimiņņefâc-ņeņic mârâc jaha mârēņ tahac-jopapo zira zuhuckerâ juraziniņmu sanaņ.

⁸ “Manañgopieņ, ñõņe maņgâņ jaha eeatuc dâņko roweckeeņgopieņ. ⁹ Nõņe fiuc roeņgopieņ, ñic qâhâmoc-jopaeņgopieņ, sasec gie baeņgopieņ, burecko qetickehuc mumupaņ dâņ mueņgopieņ, Baali nemu hosâc âsu rikecneeņgopieņ â nemu jabane mârâc kâuc bacjopambiņ jaņerao qohotaeņgopieņ. ¹⁰ Eme weniņuc? Mâsi i eeņgopieņzi fic zira nore zâņe fokacko mai-naneo fuazo muņgopieņ me? Ehuc muņgopieņ, ‘Nâņe zira sâcne juņgopeneņ’, iņuc murâ wiac mamakâcne sasawa keci zuhuckerâ eniņte maņkeņgopieņ. ¹¹ Fic kecziira nore zâņe fokac i ñõņe honepie fiuc roro ñic jaņere qânâuņ tinac ekac me? Jâmbomac, no nahac wâc honepe iņuc tinac ekac, Wofuņ nore dâņ iņuc. ¹² Ajoc, ñõņe ficnane Silo

haeo ñewec erâ mârâc jaha zâñe-nane ira foocte mupo ira hâcne raniñ, ehuc Israe ñicfâc-nane jañere hehesicte erâ ficnane weniñuc ecnepo i honeniñ! ¹³ Wiac sindañne i sasawa embiñ â no uñ sawañ zoqachec eñare-bipiehape mi manambiñ erâ wira-ñare-bipiehape micnaneo mi rombiñ. Wofuñ nore dân iñuc. ¹⁴ Irec zi, fic kecзира nore zâñe fokac â ñoñe manapie huec sanañ-ñeñic ekac, erâ mimiññefâc-ñeñic hae tahac-jopapo i Silo ecnepo sâc ijaha ecnezepac. ¹⁵ Ehuc zâñe mai-naneonec tunñopazepac, i qomâfâc-ñeñic, Eferaimte qâricfâc hâcne, furu jaha tunjopa-fârepo irec sâc.”

Anutuzi nemu arañ bajareeñgopien jañere maname sâqorekac

¹⁶ Wofuñzi kecziñuc mukac: “Jeremia, goki ine ñic i jañere erâ mi numuzemec â jañere erâ wira wâwâsic ehuc zoqac mi enarezemec, no mi mana-garepemu irec. ¹⁷ Jañe Juda mâreñko hae ñerakac irec mañnao â Jerusalem haere hata forakac ira wiac ebac eeñgopien i go mi honeekic me? ¹⁸ Naru motec jañe zoc ro nusec eeñgopien â mamacfâc-jeñic jañe zoc ruqueeñgopien, ñokac jañe ine sawa qânikiñ irec ñokac wofuñ ere nânâ poroñ rikeninñte poroñ qâricne ba hetikic eeñgopien; erâ no bâiñnuniñte nemu jabané waiñzi taha hoñke-jareeñgopien. ¹⁹ Ehame jâmbomac no moc bâiñnueneñgopien me? Me jañe jañaczia bâbâiñ eec erâ qurutuaeñgopien? ²⁰ Irec Wofuñ Anutu no kecziñuc mukopac: Manakic, kimben â aaric-nane i hae mâreñ zirec faio feocmu, eme ñic faio mecne, qowi faio mecne,

gieo jâc doma rakac irec faio mecne, erâ mâreñte wiac fârine fua raekac irec faio mâmâc ferâ mi hâhâpo zararuc foocmu.”

Judañic jañe rângeñkepie okacne fisi-jareocte mukicne

²¹ Anutu Tâpiri Qunqasan Wofun, Israere Anutu e zîñuc mukac: “Ñoñe qowi hâcbuc ririkene i taha bâzi-ñeñichec qâturerâ râeniñ, erâ qowi nâjâmbânkeniñ me! ²² No mimiñnefâc-ñeñic Aigita mâreñkonec jowac-jopa wahahuc qowi hâcbuc ririke me taha bâzi irec dân moc mi jazahuc sâcmutâc ejarepo. ²³ Aricne, zîñuc ine mutâcne-jarepo, ‘Ñoñe dânñane mana rerenñ epie no Anutu-ñeñic juhape ñoñe ñicfâc-nane junzepienñ, ehuc hata mutâcne-ñarepemu sâc i juhâc qâhâmoniñte âte rahuc junzepienñ.’ ²⁴ Jañe ine mi manambiñ â hazec-ñeñic i nore dânte wâc mi râembiñ, aricne, jañe jañacne mamanasu biri bâjâpemiñ â mañrângeñ-ñeñicte hata hehesicne âtembiñ, ehuc no mi maicnuhuc râpecnumbiñ hâcne. ²⁵ Mimiñnefâc-ñeñic Aigita mâreñkonec wahambiñ dameñ ira funkerâ kiñaññicfâc-nane sasawa, porofete hâcne, jañe dameñne dameñne ñoñerao sorec-jopapozi sorec-jopahuc juekopac. ²⁶ Jañe ine dânñane mi manambiñ â hazec-ñeñic i nore dânte mi râembiñ wâc; aricne, jañe mimiñnefâc-ñeñic siric-jopahuc mañrângeñ embiñ.

²⁷ “Jeremia, go dân i furu jaha jaza-fâretéc dânge sifu mi mananiñmu â wira-jaretecne micgao mi roniñmu. ²⁸ Irec zîñuc jazazemec: ‘Wofun Anutu-ñeñicte mumutâc dân mana rerenñ mi

eenḡopien â bâbâtiḡ qâsuaenḡopien i ḡicguru zi ḡoḡe hâcne. Siocmâc juju-ḡeḡic i omaewec, â irec dâḡ micḡeḡicko mocwâc mi fokac.

²⁹ Irec qizec susuc-ḡeḡic bâtâcnerâ behepie rahame
tiki burocnao ki mamakuc eniḡ;

Wofuḡ e ḡicguru kimbenḡ qajarewec
jaḡe suḡḡiḡ-jopahuc behec-jopawec hâcne.'

³⁰ "Judare qâricfâc jaḡe wiac hone aḡac mi ecneekopac i hâcne embiḡ, jaḡe nore zâḡe fokac fic ira wâwânâḡ bâfuaniḡte wiac-ḡeḡic mamakâcne, qâḡ qâqâtâc hâcne, i âkendâḡnemiḡ. Wofuḡ nore dâḡ iḡuc. ³¹ Erâ naru motecfâc-ḡeḡic zocko rikec-jopaniḡte Beḡ-Hinom wâneḡko bâzi ririke hae Tofete bambiḡ. No ine wiac iḡucnere dâḡ moc mi mutâcne-jarepo, erâ nore maḡkonec wiac iḡucnere dâḡ moc mi fuawec wâc. ³² Irec ziḡuc mananiḡ: Damiḡ moc maickeocmu ira Tofete mecne, Beḡ-Hinom wâneḡ mecne irec zâḡe jâmbâḡ mocwâc mi muhuc 'Sisipiric Wâneḡ' muniḡmu; Wofuḡ nore dâḡ iḡuc. Jaḡe mâreḡ ḡâcne basahuc qâḡqâḡfâc-ḡeḡic Tofete haeo ducjopaniḡmu hâcne. ³³ Eme ḡicguru keci qâḡqâḡfâc-ḡeḡic i sawa wipe â kâte qâto jaḡere nânâ eniḡmu, jaḡe nâc-jopahapie moczi moc mi jâpec-jopaocmu. ³⁴ Eme no Juda mâreḡko hae ḡerakac â Jerusalem haeo hata forakac sâc zeri bubiaḡ fua raekac i mecne, erâ ḡic ḡokac roroc ehuc zeri wiac eenḡopien i mâmâc

bâniniņke-fârepemu, mâreņ i tuhutac fuarâ fozejec hâcne.”

8

¹ Wofunțe dân zîņuc fokac: “Damen ira Judare ñicwofunfâc â fekicnefâcne â taha bapa â porofete erâ Jerusalem ñecjucfâc-ticne jaņere siec wiac i zâņerun-jeņickonec wisepie wefuocmu. ² Ehame mosa zoaņ â bâpiņ jaņere tatamacko qandankeniņmu, i ine maņjenic jaņerao râepie ðomaha kiņaņ qajare jumbieņ â jaņerao qohotahuc mu wioc ejarerâ fodape-jare jumbieņ irec; eme ro nusec me duducke i mocwâc mi eniņmu, aricne, jawa iņucne eme behepie mâreņte guec eocmu. ³ Eme ñicguru repicne zi jaņere nâfocne ira me ira jâpec-jopape ra juniņmu jaņe jujure mâcne, hâmocte manapie aņacne eocmu. Anutu Tâpiri Qunqasaņ Wofun nore dân iņuc.”

Sâqocnere okac babazu â mumutara dân

- ⁴ “Jeremia, go ñicfâc-nane jazazemec,
Wofun e zîņuc mukac:
Ñic mâreņko waha jopame mocwâc mi fahareeņgopieņ me?
Me moc e qâsorieocmuzi
hata mocwâc i risieocmu me?
⁵ Ñicguru zi, Jerusalem hae rune hâcne,
jaņe ine wemocte damen sâc qâsoriehuc
jueņgopieņ,
ehuc eeatucko qohotahuc risieniņte
qikiņneeņgopieņ?
⁶ No hazec râerâ manapo: Jaņe burecdâņ muhuc
jueņgopieņ,

moczi moc hehesic-ticnere busâqoc moc mi
 manaekac,
 ehuc wemocko muzac, ‘Jei, no weniņuc epo?’
 Aricne, zengoma becâsiczi zikao kosa gasacke
 sâqoreenġopien
 irec sâc hata-jeņicko fâro rahuc
 qâsorieenġopien.

7 Sawao qezo juekac e damen-ticne manaekac,
 â buni mecne, sawa hehetâc wipe mecne,
 koneņ mecne jaņe wâc iņuc jaha
 ririsie damen-jeņic manaenġopien.
 Njicfâc-nane jaņe ine Wofuņ nore
 mumutâc dâņte kâuc baenġopien.

8 “Nōņe wemocko ziņuc muniņmu, ‘Nâņe
 maņqârâņhec
 â Wofuņte sâcmutâc dâņ i fonârekac wâc?’
 Manaġopien, qâqârenġic jaņe
 dâņ hetikiehuc qârenġepie burecdâņ ewec.

9 Maņqârâņhec jaņe qurutuaniņmu,
 ehuc bipic tatara ejareme
 jaņacne dâņzi ufić ejareha ira jowaniņmu.
 Manakic, jaņe Wofuņ nore dâņ qâsuambiņte
 jaņacne mamanazi wemocko moc
 bafic-jopaocmu?

10 Ireć ñokacfâc-jeņic i ñic furune jarepemu,
 â gie wiac-jeņic i mâren-jeņic rauckembiņ
 jaņe qikiņne-jarepemu.
 Fekicne mecne, wahakicne mecne jaņe zengoma
 burecko monen mafa hureninġte andac
 eenġopien hâcne;
 porofete â taha bapa jaņe wâc zengoma
 eatuc ehuc juenġopien.

- 11 Jaņe wama moc mi fohame ņicfâc-nane jaņere
huc wic burec burec bâsomie-jarehuc “Wama
wama’ muenġopieņ.
- 12 Jaņe wiac mamakâcne bâfuambiņte mimiepie
muzac sâckeżac,
jaņe ine mimi-jeņic jaņgeņkeķicnere
mimi busâqocte kâuc baenġopieņ.
Irec gâcne waha jopaocmu jaņehc mâmâc waha
jopazejec;
no bâtiņ-jopapemu dameņ ira fâfâc-jopame
rândiņkenzepieņ hâcne,
Wofuņ nore dâņ iņuc.
- 13 Erâ dâņnane moc ziņuc fokac: No jaņerao fârine
ro nusec epemurâ fisi waiņ qizecko hândâņne
basaekopac,
â jâmbojâcko hândâņne basaekopac wâc,
ehame rehacne qaņarâ hâmoekac;
irec ņiczi ofaņne behec ejareniņte
biac mutâcne-jarepo.”
- 14 Jaņe wionġopieņ, “Wemo wiacte niniņkerâ
ņeņġopeneņ?
Ajoc, tumaņnerâ hae sanaņko rarâ sipiricke-
naņ me!
Wofuņ Anutu-nâņec e sipirickenanņte maname
fokac,
nâņac Wofuņ bunao bahuc sâqocne bam-
benņe
qotâre micopâ gumec-nâpooocmu hâcne.
- 15 Nâņac wamare zâņe fiĥapene
wiac bianņe i me i moc mi fua-nârewec;
jei, bâbâpiaņ dameņte enâre-bipieĥa
wiac bipic tataranehec fuawec fokac.

- 16 “Becâsicfâc-jeŋic jaŋere nokafe fânâŋ i
 Daŋ mâreŋkonec fisime manaenġopeneŋ,
 becâsicfâc-jeŋic ŋicne jaŋere dânfânâŋte
 mâreŋzi qiqitecke-fâreekac.
 Jaŋe ware fisirâ mâreŋ fainao wiac fuarâ fokac
 i nâmizienijmu,
 erâ hae sâko â neġjucfâc-ticne
 i mâmâc omaec-jopaniijmu.
- 17 Manaŋgopien, no qotâ homa wiac ejarepe
 fisi-ŋarenijmu,
 eme qaŋgeċte fuŋne mamananazi
 bâmâteŋ-jopaniŋte
 eipiehapie kicŋopaniijmu.” Wofuŋte dân
 iŋuc.

*Juda mâreŋte â Jerusalem haere ki wâwâsic
 fuawec*

- 18 No zârâ zâpâ faio juhape wiac moczi
 bâpiaŋnuocmu i mi fokac,
 no busâqoc mana utuckehuc juekopac.
- 19 Keci manac, ŋicfâc-nane jaŋere oowa â marac
 fânâŋzi
 mâreŋ zorickonec ziŋuc fisikac:
 “Wofuŋ e Zionko mocwâc mi jukac me?
 Â ŋicwofuŋ-ticnezi hae maŋnao mi jukac
 me?”
 “Jaŋe wemoċte qâŋ qâqâtâczi
 â mâreŋ jabaonec nemuqâŋzi bâiŋnumbiŋ?”
- 20 “Nânâ bâbâsu damen i jâurukicne,
 â zoaŋ damen i tarakac wâc,
 ehame babafic moc mi fua-nârewec.”
- 21 Niċfâc-nane ba sipiric ejarekicnere buheric
 enarekac

no busâqoc manahuc bipic tatara ekopac.

- 22 Gileade haeo wokemaŋ moc mi fokac me?
 Me dota ira moc mi jukac me?
 Njicfâc-nane jaŋere bâbâpiaŋ
 i wemocte mi fuakac?

9

- 1 Ojai, qizec-nane i opâ zâkâŋ eha
 zâŋeuc-nane i opâ zâŋe iŋucne ezac me!
 Eme no ŋafe zoaŋ njicfâc-nane
 qâhâmoc-jopakicne
 jaŋere erâ kiohuc juzapo.
- 2 Ojai, mâreŋ sawao boze-nane moc ŋeme muzac
 no njicfâc-nane behec-joparâ ira ra juzapo!
 Jaŋe boe sau ŋic sasawa,
 erâ njicguru eeatuc-jeŋichec.
- 3 Namaŋ-jeŋic i tepeo gurutuc âtepie huekac
 irec sâc ecneŋgopieŋ,
 ehame jaŋu fârizi mâcne,
 burecdâŋzi mâreŋ-jeŋicko sanaŋkeekac;
 jaŋe hehesiczi hehesic bâfuaeŋgopieŋ,
 ehuc no mi manacnueŋgopieŋ,
 Wofuŋ nore dâŋ iŋuc.
- 4 Nŋe zengoma âgofâc-jeŋic jaŋere sawaŋ-jeŋic
 qahuc junzepieŋ,
 ehuc qomâfâc-jeŋic jaŋerao wâc mi
 roweckenzepieŋ;
 jaŋe docbapa sasawa â âgofâc-jeŋic
 jaŋe wâc micko âkec eeŋgopieŋ.
- 5 Jaŋe zengoma âgofâc-jeŋic eatuc-jopaŋgopieŋ,
 ehuc moczi moc dâŋ fârî qizecne mi muekac;

jaņe nameņ-jeņiczi burecdâņ muocte
 esockeeņgopieņ,
 erâ qac qâsorice eku risieniņte mi afeck-
 eeņgopieņ.

6 Jaņe bâbâzâiczi bâbâzâic
 â eatuczi eatuc bâfuaeņgopieņ,
 ehuc no manacnuniņte ine mi ejareekac,
 Wofuņ nore dâņ iņuc.

7 Irec Anutu Tâpiri Quņqasaņ Wofuņzi ziņuc
 mukac:
 “Manakic, no zocko rikec-jopahuc ba esâic
 ejarepemu.

 Iņuc mi ehuc ine ņicfâc-nane
 weniņuc ejarepe sâckeocmu?

8 Jaņe nameņ-jeņic i tepe motec hâmoc bâbâfua
 iņucne,
 eatuc dâņ muekac hâcne;
 miczi âgofâc-jeņic jaņehc wamadâņ
 mueņgopieņ,
 manjeņiczi ine bitiņ râe-jareniņte dâņne
 manasu biric eeņgopieņ.

9 Wiac iņucnere mi bâtiņ-jopazapo me?
 Â ņicguru iņucne okacne mi bazu-jarezapo
 me?
 Wofuņ nore dâņ iņuc.

10 “Tiki jaņere erâ ki mamakuc eniņ,
 â mâreņ sawao lama bulimakao sopâc
 kecqaņ fua-jarewec
 irec kio owa eniņ,
 i hâmo qaņac ekicnere moczi moc sicne fotâc mi
 eocmu,

â lama bulimakao jaņe ira mocwâc
 mi dâņepie mananiņmu;
 sawa wipe mecne, qowi mecne
 jaņe mâmâc jaha irecnec wiserâ
 ratâmirembiņ.

¹¹ No Jerusalem hae qâropiepe ņetâc qâtâtieme
 hae sesucne fuarâ focmu,
 ehuc kâte qâto jaņere ņeņe hae eocmu;
 no Judare hae sâko ņerakac i wâc ima bape
 maņnao ņiczi ņeņe juju mocwâc mi eniņmu.”

Sisipiricko â kâpâcwâruo juju fuaocmu irec dâņ

¹² Mâreņ i fuņne weninucte sipirickerâ tuhu
 mâreņ inucne niniņ siarereņ foha moczi moc
 sicne fotâc mi eekac? Irec fuņne i mo ņiczi
 maņqârâņhec juhuc mana tarazac? Me Wofuņ,
 go micdâņge i mo ņic âzâcnetec mufuazac?

¹³ Jeremiazi inuc wiome Wofuņzi ziņuc muwec:
 “Jaņe sâcmutâc dâņnane jarepo i behembiņ,
 â dâņnane mana rereņ mi embiņ, ehuc irec
 sâcko mi jumbiņ.

¹⁴ Jaņe ine maņrâņgeņ ehuc
 jaņacne dâņ reņkembî, â mamacfâc-jeņic jaņe
 qazu-jarembiņ irec sâc ehuc Baali nemu fuņne
 fuņne bâjâpec-jopambiņ. ¹⁵ Irec Anutu Tâpiri
 Quņqasaņ Wofuņ, Israere Anutu no ziņuc
 mukopac: Manakic, no ņicguru zi kegocjâc hâtâ
 qinqiņne â qotâre micopâ gumec-jopapemu.

¹⁶ No bâtâtiēc-jopape ņicne ņicne, jaņacne
 â mamacfâc-jeņic jaņe mi manac-jopambiņ,
 jaņere ņondenko siņsaņ qarâ juniņmu, ehame
 mupe râpefuņ-jeņicko zika fuame hâmo sipiric
 efârenzepieņ.”

- 17 Anutu Tâpîri Çuŋqasaŋ Wofuŋ e zîŋuc mukac:
 “Nŋe irec manasurâ ñokac ki soŋgâŋ eenŋopien
 jaŋe wira-jarepie warezepien,
 ehuc ki mamakucte fuŋne mamana ñokac
 jaŋe wâc fisiniŋte dâŋ râepie razejec.
- 18 Eme jaŋe berec jaha ware fisirâ nâŋere erâ
 ki mamakuc epie zâŋeuc-nâŋec bocjaha wa-
 hazejec.
- 19 Manac, Zionkonec kigaere fânâŋ fisime
 mananŋopenen:
 ‘Jei, ro waha âte enârekie i hâhâwicne,
 â fai-nâŋecko mimi busâqoc fewec i
 hâhâwicne jaha.
 Jaŋe fic hae-nâŋec heroc qâropiemiŋte
 mâren-nâŋec behemen.’ ”
- 20 Ñokac bureŋ, ñeŋe Wofuŋte dâŋ mananiŋ,
 â micdâŋ-ticnere hazec râeniŋ;
 otâfâc-ŋenŋic ki soŋgâŋ eere fuŋne qazu-jareniŋ,
 ehuc ŋaŋackoaŋ kigae qaŋazuc eniŋ.
- 21 Hâmoczi ficne ficne rocnâpohuc
 ŋicwofuŋ ficko raziwec wâc,
 ehuc naru motec jaŋe hae zoŋao â ñicmotec jaŋe
 tutumaŋte tomao juhapie mâmâc
 rocjopawec hâcne.
- 22 Go jazac, “Wofuŋte dâŋ kecziŋuc fokac:
 ‘Ñic qâŋqâŋfâc-jeŋic jaŋe jawa inŋucne
 gieo forahuc mârenŋte guec enzepien,
 erâ qa roro ŋic jaŋe râpefuŋ-jeŋicko
 padi qiti râepie foraekac irec sâc fohapie
 moczi moc ro nusec mi ejareocmu.’ ”

Mumutenŋ fârine

²³ Wofuŋzi kecziŋuc mukac: “Maŋqârâŋheczi maŋqârâŋ-ticnere erâ mumutenj dâŋ mi muzejec, tâpiriheczî tâpiri-ticnere erâ mumutenj dâŋ mi muzejec, â monej mafaheczi monej mafa-ticnere erâ mumutenj dâŋ mi muzejec wâc. ²⁴ Aricne, moc e mumutenj dâŋ muzo murâ ine maŋqârâŋhec juhuc no manacnukacte erâ muzejec. Wemocte? Wiac no Wofuŋ jukopaczi mâreŋko aki anonoc, sâcmutâc dâŋ tiŋne â tiŋne jujure hata bâfuæekopac i! No wiac iŋucnere mana aŋac eekopac hâcne, Wofuŋ nore dâŋ iŋuc.”

²⁵ Wofuŋzi ziŋuc mukac: “Manakic, damenj moc maickeocmu ira sahacko maheczi ma tâmiric tinac juenŋopienj jaŋe zenŋoma bâtiŋ-jopapemu. ²⁶ Ine Aigita ŋic mecne, Judaŋic mecne, Edomŋic mecne, Amonŋic mecne, Moabi ŋic mecne, erâ mâreŋ burocnerc nejcjucfâc qizec susuc-jenjc naki ŋifec â ŋifec sawa bâtâcneenŋopienj jaŋe mâmâc. Qâpuc ŋicne ŋicne jaŋe jâmbomac sahacko ma tâmiric juenŋopienj, Israe kikefuŋ jaŋe ine furu jaha sahacko ma i foipie-jareha maŋŋenjczi mâc foekac.”

10

Wofuŋ burecne â Anutu fârinc

¹ O Israe kikefuŋ, ŋoŋe Wofuŋzi dâŋ ŋazakac i mananiŋ. ² E kecziŋuc mukac hâcne:
 “Ŋoŋe qâpuc gurunc gurunc jaŋere hata âtepie
 maŋŋenjc mi ezejec,
 jaŋe sambâŋko sowi fuame honerâ
 hâwic-jopaekac,

ņoņe ine mi hâwic-ņopazejec.

³ Kâteo jâc qapie metâ bapa e râriczi he fasaec ekume
wiac ņicmezi ba akic ekicne fuaekac.

⁴ Erâ siliwa â golzi ba eric ecnerâ rânđinķezacte hama â birinzi qasanaņkeekac.

⁵ Nemuqâņfâc-jeņic jaņe ņiczi wipe wiac hâhâwic ejareņiņte
gieo ņic hawari baeņgopieņ iņucne,
jaņe dâņ moc mi mueņgopieņ â hata juju-jeņic mi fokacte
ņiczi hâpoc-jopa raeņgopieņ hâcne.

Jaņe wiac hâhâwicne moc bâfuaņiņte tâpiri mi fojarekacte jaņere mi hâwic-ņopazejec,
ņifec ine wiac biane moc eņiņte iņuc jaha tâpiri mi fojarekac.”

⁶ O Wofuņ, go iņucne moc mi jujâmbâņķekac,
go tâpirihecte fekicne jukomec,
zâņe biņege i qeņ bipinehec fokac hâcne.

⁷ Mo ņiczi ņicne ņicne jaņere Wofuņ Sâko gore mi hâwickeocmu?
Go hâcne araņ bagarezo!

ņicne ņicne mamanafâc-jeņic jaņere ņondenķo â guriņ bapa gie baeņgopieņ jaņerao
go iņucne moc mi jujâmbâņķekac, aricne.

⁸ Jaņe mutucne â maņ tâmiric sasawa;
nemuqâņte qaqazu gie bapa i wiac racne,
jaņe jâc sawa.

⁹ Tarasisi haeonec siliwa qajacnekicne,
â Ufazi mâreņkonec gol bafisiņgopieņ.
Eme qâņ qâqâtâc bapa â golzi wiac bapa jaņe basarickeeņgopieņ,

ehuc ɲaɣi âmuc âmucne â bâbâroŋ hejarepie
 huekac;
 wiac i sasawa metâ bapa jaŋere meqâreŋ
 hâcne.

10 Wofuŋzi ine Anutu fârine â Anutu jujune,
 erâ Wofuŋ Sâko juweczi juocmu sanaŋ.

Mâreŋzi kimbeŋ-ticnere qiqiteckeekac
 â ɲicne ɲicne jaŋe aaric-ticnere sâcne
 mi sanaŋkerâ domaniŋmu.

11 Irec jaŋere ziŋuc munzeŋ: “Nemu
 jaŋe sambâŋ â mâreŋ mi bâfuac-jofambiŋ,
 jaŋe mâreŋko â sambâŋ rurumaŋko
 sirowe-fâreŋzeŋ.”

12 Anutu e ine tâpiri-ticnezi mâreŋ bâfuawec
 â maŋqârâŋ-ticnezi mâreŋ sâko mâreŋ irec
 hobeteŋne râewec,
 erâ mamana-ticnezi sambâŋ qaratiwec.

13 Eki mume quŋ heme sambâŋko hoere fânâŋ
 fuawec,
 eki hâcne mâreŋ qaŋeŋnaonec karorac
 ejareme fahareŋgopiŋ.

Â bâbâric bâfuame hoe heekac,
 erâ rowaŋ-ticnaonec mânâŋ soreme fisiekac.

14 ɲic jaŋe zeŋgoma mutucne â mamana tâmiric,
 golzi wiac bapa jaŋe qâŋ qâqâtâc-jeŋicte erâ
 qurutuaeŋgopiŋ;
 nemuqâŋ-jeŋic i wiac eatucne, juju tâmiric
 hâcne.

15 Jaŋe wiac racne â gâgâwinehec,
 bâbâtiŋ damen maic-jopame siroweniŋmu.

16 Anutuzi Jakobore rowaŋ jukac e jaŋere sâc
 aricne,
 eki hâcne wiac sasawa bâfua-fârewec.
 Israe ɳic jaŋe fuŋfuŋfâc-ticne;
 zâŋe-ticne Anutu Tâpiri Qunqasaŋ Wofuŋ.

Juda kikefuŋ sisipiric fuacnewec

17 Somâmaŋko jukomec go mâreŋge behecmurâ
 mafa wiacge ro qâzuc ec!

18 Wofuŋzi ziŋuc mukac hâcne:
 “Manaŋgopieŋ, no mâreŋ zirec rune dameŋ zi
 hâcne
 fific bacjopahuc hetapaic-jopape
 fuŋne-jeŋic mana taranzepieŋ.”

19 Jei, nu bâzâic enarekicne i hâhâwicne,
 â wicnane i mi bâbâsomiene.
 No ine ziŋuc manapo: “Hucnane ine hâcne,
 no irec zâic sanaŋkerâ manazepac.”

20 Qoruc boze-nane ima bakicne,
 â qoruc bozere muc wiac i tâcne-fârekicne;
 naru motecfâc-nane jaŋe behecnurâ
 ratâmirembiŋ,
 qoruc boze-nane i moczi mocwâc mi
 fâreocmu,
 â seli qoruc-nane wâc mi qetickepie waha
 domaocmu.

21 Lama soŋaŋ jaŋe mutuc matacne jumbiŋ,
 ehuc Wofuŋte mu wioc mi embiŋ;
 irec gie bapie fâri tâmiric ewec,
 â lama guru-jeŋic i tâtie-fârewec.

22 Hazec râeniŋ, dâŋ biŋe fuakac!
 Mananiŋ, biac warekac i!

Fânâñ sâko faic mârenkonec warekac hâcne,
i Juda hae sâko ñerakac sâc ima bafâreme
kâte qâto jañere ñeñe hae eocte.

23 O Wofuñ, no manakopac, mârenñic e juju
hata-ticne
e jahacne tâpirio âte siñkerâ sâcne mi
raocmu,
erâ moc e hata-ticne rahuc fâretin raocte
tâpiri wâc mi focnekac.

24 O Wofuñ, go aaricko mâcne, tiñnegere sâcko
bâtinuzemec,
omaezipore inuc enarezemec.

25 Kimbenge ñicne ñicne go kâuc bacguñgopien
jañere faio honkec,
zâñege mi riwaseckeengopien jañerao hâcne;
jañe Jakobo ki qâsuc ecnembin,
ki qâsuc ecnehuc nâmiziembin,
ehuc hae mâren-ticne imackembin.

11

3âzâfic hetâcnembin

¹ Wofuñtaonec dân Jeremiarao fisiwec i
keczinuc: ² “3âzâfic keczirec dân i Judare ñicfâc
â Jerusalem hae rune jazatec mananiñ. ³ Ehuc
muzemec, Wofuñ Israere Anutu e zinuc mukac:
Ñic moc e zâzâfic keczirec dân mana reren
mi eocmuzi sâwecte biñe ezejec. ⁴ No dân i
hâcne mimiñnefâc-ñeñic Aigita mârenkonec
â zârâ zâpâonec jowac-jopa wahahuc jaza
mutâc epo, ehuc mupo: No dân ñaza mutâc
epo sâc mana reren efârenzepien. Eme ñeñe

ņicfâc-nane juhapie noni Anutu-ņeņic juzepac.
⁵ Erâ mimiņnefâc-ņeņic dâņ mupaņke-jarepo irec fârine bâfuahuc mâreņ moc susu â baņac qâmbâriņkeekac i jarezepac; eme irec sâc fuawec fokac hâcne.” Mume mupo, “Wofuņ, iņuc hâcne fuaoc.”

⁶ Eme Wofuņzi ziņuc nazawec: “Go dâņ i sasawa Juda hae ņerakac ira mecne â Jerusalem haere hata forakac ira mâmâc muromackehuc muzemec. Noņe zâzâfic keczi-rec dâņ manarâ reņkenzepieņ. ⁷ No mimiņnefâc-ņeņic Aigita mâreņkonec jowac-jopa wahahuc fuņkerâ uņ sawaņ hati ejare warehuc ziņuc jazahuc jupozi jukopac: Dâņnane reņkeniņ. ⁸ Jaņe ine mana rereņ mi embiņ â hazec-jeņic ira wâc mi râembiņ, aricne, jaņe ru sâc maņjeņic râņgeņne â hehesicne irec sâcko jumbiņ. Eme no irec hâcne zâzâfic keczi-rec dâņ reņkeniņte mutâcne-jare-bipiehape mi reņkemiņte dâņ muwarekicne irec fârine jaņere faio fefâreocte mupo.”

⁹ Eme Wofuņzi zuhuckerâ nazawec: “Juda kikefuņ â Jerusalem hae rune jaņe no râsi enareniņte mumockembiņ i manakopac. ¹⁰ Jaņe mimiņnefâc-jeņic jaņere hata hehesicnao risiembiņ; jaņe hâcne dâņnane mananiņte qikiņembiņ, ehuc nemu jabane jaņerao qohotahuc kiņaņ qajarembiņ. Israe â Juda kikefuņ jaņe mimiņnefâc-jeņic jaņehec zâzâfic epo i hetâcnembiņ hâcne. ¹¹ Irece Wofuņ no ziņuc mukopac: Manakic, noni mupe sisipiriczi fua-jarerâ moc mi bâtiric-jopaocmu, ehame wira wâwâsic enarepie mi mana-jarepemu.

12 Eme Juda hae ɲerakac irec rune jaɲe mecne â Jerusalem ɲecjuçfâc-ticne jaɲe mecne hosâc rike-jarehuc juɲgopien jaɲerao ra wâsic-jopanzepien; jaɲe ine zârâ hâriɲ damenjo sâcne mi bafic-jopa-jâmbânkeniɲmu. ¹³ O Juda, go haege ɲerakac irec sâc jaha nemufâcge bâfuac-jopamen, â Jerusalem haeo hata forakac irec sâc Baali nemu hosâc âsu rikecneniɲte alata wiac bambiɲ.

¹⁴ “Goki ine ɲicguru i jaɲere erâ mi numuzemec, me jaɲere erâ mu huacbuc wâc mi ezemec; jaɲe zârâ hâriɲ damen-jeɲicko wira wâwâsic enarepie mi mana-jâmbânkepemu hâcne. ¹⁵ Joroc biani-nane e wiac hehesicne ewecte ficnaneo wemocko zuhuckerâ juocmu? Mumupaɲ me qowi bâzi ririkege izi sâqocnege sâcne bêtâmire-gareme zeri bubian ecmu me? ¹⁶ Wofuɲ no zâɲege mârâc ziɲuc mupo, ‘Oliwa jâc dutu qâri fie ruruckekicne â fâri rarau’, fânân sâko fuame fuɲnao zoc ruçepe tien taenɲe zâseɲke-fâreocmu. ¹⁷ Anutu Tâpiri Quɲqasaɲ Wofuɲ noni hâcne Israe â Juda kikefuɲ sarac-jopapo, zi ine hehesic-jeɲicte erâ wiac hâhâwicne fua-jareocte mukopac; jaɲe bânɲnuniɲte Baali nemu hosâc âsu rikecnehuc jumbiɲ hâcne.”

Jeremia râsi ecnemiɲ

18 Wofuɲ e maɲbâwiɲ enareme manapo;
e damen ira hâcne eebapa-jeɲicte fuɲne
nowatume
hone tarapo.

19 No lama motec urucne hezuninɲte

ro baraengopien injucne jupo,
ehuc, râsi enarehuc dân kecziñuc mumockembin
i kâuc bapo:

“Jâc fâri wâmbuñe i sipirickehuc jujune jañere
mâreñkonec qâfiepene
zâñe-ticnere mocwâc mi manasuzo.”

²⁰ Anutu Tâpiri Qunqasañ Wofuñ,
go ine mumutara ñic tiñe,
go mañ mamanasu ba esâic ecneekiczi
ine okacne bazu-jarecmu i nowatutec
honezepac,
no dânñane gorao râepe fokac hâcne.

²¹ Anatoti haeonec ñiczi juju-nane sipirickeniñte
dânñe birickehuc muenjopien, “Go gupene
hâmozicte Wofuñte zâñeo findandân mi
muzemec.” ²² Irec Anutu Tâpiri Qunqasañ Wofuñ
e ñic i jañere ziñuc mukac: “Manakic, no qa bâtiñ
ejarepemu, ehame ñicmotecfâc-jeñic jañe zikare
nânâ eniñmu, erâ ñokâ otâfâc-jeñic jañe nânâre
hâmo sipiric eniñmu. ²³ Jañere ñic zanzañe moc
mi juniñmu, no hâcne Anatoti rune jañere faio
bâbâtiñ damen-jeñicko wiac hâhâwicne mupe
feocmu.”

12

Jeremiazi Wofuñ wiracneme micnao rowec

¹ O Wofuñ, go tiñe rune,
irec no gohec dânñie bape go dân tiñe sa-
sawa mucmu;
eme no sifu dân mocjaha gohec muzo ekopac.
Ñic hehesicne jañe wemocte juhâmoenjopien,

â doc bapa ñic jañe wemocte wiac sasawa
mâririhec fua-jareekac?

² Goki jâc inuçne sarac-jopaekic,
eme jañe gâtâ barâ fua sokac erâ fârine
bâfuaengopien.

Jañe micjeniczi sâsecguhuc
manjeniczi ine qikinguengopien.

³ O Wofuñ, go nore fuñne manakic,
go honecnuetikic â mañnane gorao domaekac
me mâcne
irec fuñne bataniñkeekic.

Go lama qa hezuc ejareniñte rocjopaengopien
irec sâc ñic keci jañe rocjopazemec,
ehuc qa hezuc damente woñec bâtâcko
râec-jopazemec.

⁴ Mâreñ hahankeekac â gielo wiac rehacnehec
hâmo qañac efâreekac
i mo damenkeko moc taraocmu?

Mâreñ ñecjucfâc-ticne jañere hehesicte erâ
qowi mecne, wipe mecne omaeengopien.

Ñiczi ziñuc muenngopien hâcne:

“Nâñe hata âteenngopenen i eki mi honeekac.”

⁵ Eme Wofuñzi muwec:

“Go ñic kikezi rarâ jañehac hata raku be-
tañkecmuo
ine weniñuc erâ becâsic jañehac sisiric gie
bacmu?

Me mâreñ moc wama fokacko ira sawa
hâhâwicmâc jucmuo
ine Jordan kâte uupicko weniñuc ecmu?

⁶ Qomâfâcge â mamacgere kikefuñ jañe doc
bacguengopien wâc,

jaņe r pefuņgao hahaņne bahuc wira owa
egareeņgopieņ.
Jaņe  god ņ gazapie d ņjeņic sifu mi man-
azemec.

7 “No ficnane behepo   biņef c-nane
qikiņ-jopapo,
er  joroc biaņ-nane e r sif c-ticne jaņere
meo r epo.

8 Biņef c-nane jaņe nore maio k te laioņ iņucne
embiņ,
jaņe d ņmarac-jeņic bafehuc
owacke-narembiņ;
no irec h cne qaisoc-jopakopac.

9 Biņef c-nane jaņe wipe q q reņ iņucne me?
Irec tucwibe jaņe r rec r rec tumaņnehuc ruc
bacneeņgopieņ?

Ajoc, k te qowi sasawa ņoņe tumaņneniņ,
er  ware qowi n niņ!

10 Lama soņaņ bocjahazi waiņ gie-nane sipirick-
embiņ,
ehuc nore giegaņ fowec i  tenzaņnemiņ
  gie biaņ-nane i ima baj mb ņkemiņ.

11 Jaņe m retec imackemiņ,
ehame nore maio sesuctac fuawec fokac;
m reņ sasawa imacke-f rekiecne
ņic jaņe ine irec bus qoc moc mi
manaņgopieņ.

12 Sisipiric ņic jaņe m reņ burocnere facne facne
bazur  wahambiņ,
i Wofuņtaonec zika h cne,
eme izi m reņ qaņeņne mockonec fuņker 

gie-ticne baware raku qaņeņne mocko
 batarakac;
 ehame wiac jujune i me i wama moc mi
 fuacnekac.

¹³ Jaņe padi hândâņne tiembiņzi
 wiac zârânehec qa roro embiņ;
 jaņe zâic gie sawa bambiņ,
 fârine ine mi rombiņ.

Jaņe Wofuņ kimbeņ-ticne hâhâwicne

irec erâ nânâ bâbâsu-jeņicte qurutuambiņ.”

*Wofuņzi Israe diguracfâc-jeņic
 bâsirowec-jopaocte mukac*

¹⁴ Diguracfâc-nane repicne jaņe Israe
 ņicfâc-nane mâreņ biņe qajarepo i ba bâuac
 embiņte Wofuņzi jaņere ziņuc mukac: “Manakic,
 no mâreņ-jeņickonec qâfiec-jopapemu â Juda
 kikefuņ jaņe ņonden-jeņickonec unuc-jopapemu
 wâc. ¹⁵ Unuc-joparâ zâhec ine mocwâc busâqoc
 mana-jarerâ ru sâc apa ņosa mâreņ-jeņicko
 jowac-jopape risieniņmu. ¹⁶ Jaņe ņicfâc-nane
 Baali ere zâņeo qetickehuc mumupaņ dâņ
 muniņte hatane qazu-jare jumbieņ, sâc ijaha
 ņicfâc-nane jaņere hata âtepie manjeņic
 eocmuo, â nore zâņeo qetickehuc, ‘Wofuņ e
 jujâmbâņkekac’, iņuc muniņmuo ine ņicfâc-nane
 jaņere ņondenko ņec juc ehuc soka biaņ enzepieņ.
¹⁷ Dâņ mi mananiņmu ņicguru i jaņe ine
 unuc-jopa-jâmbâņkerâ bâsirowec-jopapemu.
 Wofuņ nore dâņ iņuc.”

13

Umbika sâqorekicne irec dâņ

¹ Wofuñ e kecziñuc nazawec: “Go ra umbika moc furine barâ jomazemec, erâ opâo mi râetec huzejec.” ² Eme no Wofuñzi muwec irec sâcko umbika furine barâ jomapo. ³ Eme Wofuñte dân mocwâc fua-nareme arecne jajahec ewec, ine kecziñuc: ⁴ “Go umbika furine barâ jomamen i rorâ Eufрата opâo rarâ ira haroñañ hawecko soñkezemec.” ⁵ Eme Wofuñzi naza mutâc ewec irec sâcko ra Eufрата opâo soñkepo. ⁶ Zoañ gie bapa bocjaha taramê Wofuñzi ziñuc nazawec: “Go faharerâ Eufрата opâo ra umbika ira soñkecmurâ gazapo i ro barezemec.” ⁷ Eme no Eufрата opâo rarâ umbika soñkepoonec wiserâ ropo. Erâ honepo: Umbika e sâqorewecte wiac irec me irec babajunere sâc mocwâc mi ewec.

⁸ Eme Wofuñte dân norao kecziñuc fuawec: ⁹ Wofuñ e kecziñuc mukac: “No irec sâc jaha Juda â Jerusalem jahere pepec penaron sâko bawahape arictac ezejec. ¹⁰ Ñicguru hehesicne keci, nore dân mananiñte qikiñneengopien, ehuc mañrângeñ-jenictê hata âtehuc nemu jabane kiñañ qajarehuc fodape-jareninñte jañerao qohotaengopien jañe umbika keczi wiac irec me irec mocwâc mi babajune irec sâc jaha enzepien. ¹¹ Umbika ñicte ombânko bohohuc fosanañkeekac irec sâc jaha Israe kikefuñ â Juda kikefuñ sasawa jañe norao qohota-hâmohuc ñicfâc-nane â zâñe biñe-nane â mumutenñ-nane â eri-nane erâ juniñte hefârec-jopapo, jañe ine mi manambiñ.

Wain kiruñko opâ qapie huekac irec dân

12 “Jeremia, go Israe ñic zĩñuc jazac: ‘Wofun, Israere Anutu e kecziñuc mukac: “Wain kirun sasawa ira wain opâ qapie hurâ fusucmaekac.”’ Eme jañe zĩñuc gazaniñmu: ‘Wain kirun sasawa ira wain opâ qapene huocmu i nãñe moc kãuc bangopenen me?’ 13 Inuc gazapie jazazemec, ‘Wofunzi zĩñuc mukac: Manan̄gopenen, no mãren zirec ñecjucfãc sasawa â Dawidire tuc qarã eri ñeñe-ticnao ñicwofun ñeengopenen, â taha bapa â porofete erã Jerusalem hae rune sasawa jañe ejarepe opã sanan gapemãc nãku mansifuc ejarezejec. 14 Erã nonizia ejarepe ñic âgofãc-jen̄ic qanzan-jopan̄ñmu, â mame ñokã jañe qãqãhãmoc eniñmu. No mi ñezic-jopapemu â busãqoc mi mana-jarepemu, no buuruc wãc mi ejarehuc sipiric-jopapemu. Wofun nore dãn inuc.’”

Juda kikefunzi manrãñgen-ticnere erã kãpãcwãruo raocmu

- 15 Wofunzi dãn muwecte
pepec penaron mi ehuc hazec rãerã
mananzepien.
- 16 Nõñe dapãc mi fuaha â ñafezi tiki mi
fonke-fãrehamẽ
kike-ñen̄ic hepirickenzipin̄te
Wofun Anutu-ñen̄ic aran bacnehuc sãsenzepien;
ñõñe tatamacte zãñe fihapie eki mume
mãren gãpãreme dapãc qisiric fuazacte inuc
hãcne enzepien.
- 17 Mi mananiñmuo ine no pepec penaron-ñen̄icte
erã
son̄son̄ko mãretẽc kiohuc jupemu;

Wofuņte lama guru kâpâcwâru bacjopa
raniņmure
zâņeuc-nane bocjaha wahahuc domaocmu.

18 Niçwofuņ â neņgoc-ticne ņokac bomboņ jahe
ziņuc jazac:

“Eridu-ņekic zâņe rara bian i
qizec-ņekickonec biac hockerâ wahawecte
ņeņe omanao waha ņezepirec!”

19 Negebe wâneņko hae ņerakac irec motâc
basanaņke-fârekcine,
moczy rome mi aņkeocmu;
Juda kikefuņ zengoma kâpâcwâru bacjopa rapie
nâfocne moc mi juniņmu.

20 “Noņe qâhâņnerâ fipie rame faic mâreņkonec
warehuc juņgopieņ jaņe honec-jopaniņ.
Lama guru gorao râec-jopakicne jaņe weni,
lama gurufâcge bianņe jaņe hâcne?”

21 Eme go gahac âgo egareniņte boc
hefârec-jopameņ
jaņe bomboņ egareniņte mujareme weniņuc
mucmu?

Go ņokac gozi kime zâic fâro manaekac
zâic iņucne mi manacmu me?

22 Eme ‘Wiac busâqocnehec iņucne wemocte
fai-naneo fekak’,
go iņuc mu wioc erâ ziņuc manazemec:
Kiņ bahacge ņemâcnere erâ ņaqi qoruc het-
ara-garepie
mimige fuazejec.

23 Etiopia ņic e saħac-ticne sâcne hetikieme
moc eocmu me?

Me qowi mimicne lepad e sahad-ticne qâqâren
hetikieme
moc eocmu me?

Inuc fome muzac ine sâqocne bahuc juengopien
noje inuc jaha wiac bianje ezo murâ sâcne
enzapij.

²⁴ Irec no mâren sawaonec mânân sâkozi padi
jawa bawiseekac
irec sâc bêtâtiec-ŋopapemu.

²⁵ Wiac fua-gareocte mupo
â kâdoc qagarepo inuc hâcne.

Go nore nkecgume burecdânko roweckemente
²⁶ no ŋaqi qoruc hetara-garepe mimige tâtâc
fuazejec.

²⁷ No boe sauge mecne, sasecgere ojawa mecne,
sasec giege repicne mecne
erâ tikio â gieo qâpuc wiac mamakâcne bajuekic
i mâmâc hone manac efârepo hâcne.

Jei, Jerusalem, go mo damenjo
wiac i qikiŋnerâ qaqaacne moc jucmu?"

14

Rorocte biŋedân

¹ Wofunzi Jeremia rorocte dâŋ kecziŋuc
âzâcnewec:

² "Juda mârenzi makuc bakac
â hae-ticne ŋerakac ira kio uu engopien;
ŋic ŋokacfâc-ticne jaŋe mârenjo ŋehuc ki busâqoc
engopien,

â Jerusalem haere ki owa fuakac.

³ Fekicnefâc-ticne jaŋe kiŋaŋ qaqaafâc-jeŋic opâre
sorec-jopaŋgopien,

eme jaņe opâ nombânko fisirâ opâ moc mi
 bâbâfua
 zopo tacne bârisienġopien;
 jaņe mimiehuc busâqoc manarâ
 rurufa hepie hukac.

⁴ Hoe mi heme mâreņzi hahanġekacte
 hesarac ņic jaņe busâqoc manahuc
 qizec-jeņic foņkerâ soņkenġopien.

⁵ Kecqaņ mi fokacte kâte bulimakao jaņe
 tomao motecne ro behec ejareņġopien wâc.

⁶ Kâte doņgi jaņe tiki burocnao domahuc
 sawa roninġte kâte qâto inġucne nakafe
 heņġopien;
 kecqaņ wiac arictacte zâņe-jeņic sururu
 ekac.

⁷ “O Wofuņ, hehesic-nâņeczi mutaniņ-nâpoha
 goki zâņegere erâ bafic-nâpoc;
 nâņe qaqtara wemo afecne bâfuahuc
 bugao bambeņ hâcne.

⁸ Israe mamanan-ticne i gorao fokac,
 goki hâcne zârâ hâriņ damenġko babafic-ticne
 jukomec;

go wemocte mâreņ-nâņecko ņic jabane tinac
 jukomec,

me ņic moczi ņicmanac fisirâ
 ņafe mocjaha sawa foomu irec sâc ekomec?

⁹ Go wemocte ņic moczi bafic-jopaocte eipiekac
 inġucne tinac?

Wofuņ, go ņonden-nâņecko jukic,
 â nâņe gore zâņe rombeņ,
 irec go mi mac behec-nâpoc!”

¹⁰ Wofuņ e ņicguru zi jaņere kecziņuc mukac:
 “Jaņe afeckerâ ra qohota ware qohota ehuc
 manabâc tâmiric kike afec juenģopieņ.
 Irec Wofuņ no hone aņac mi ejarekopac, aricne,
 no hehesic-jeņicte manasuhuc
 sâqocne-jeņicte bâtiņ-jopapemu.”

Wofuņzi porofete burecne bâsirowec-jopaocte mukac

¹¹ Wofuņzi ziņuc nazawec wâc: “Go ņicguru keci jaņe ehâmo-jarepemurâ mi numuzemec.
¹² Jaņe sowa juhapie wira wâwâsic-jeņic sifu mi manapemu; jaņe qowi hâcbuc rikeniņmu me taha bâzi rike-narepie no sifu mi aņacnuocmu, aricne, no zika â roroc â huc hâmoc izi bâsirowec-jopapemu.”

¹³ Mume mupo: “Wofuņ-nane Anutu, manakic, porofete jaņe ziņuc jazaenģopieņ: ‘Ņoņe zika moc mi fuame honeniņmu, erâ roroczi wâc mi fua-ņareocmu, aricne, wama fofu sanaņ ine ņarepe hae mâreņ zira foocmu.’” ¹⁴ Wofuņzi ine ziņuc nazawec: “Porofete jaņe nore zâņeo âke hotahuc burecdâņ muenģopieņ; no jaņe mi sorec-jopapo, erâ wâc dâņ moc mi mutâcne-jarepo â jaņehc dâņ mi dâņepo. Jaņe bararuņ dâņ burecne â findaņdâņ racne erâ manjeņicte eatuc dâņ ņazaenģopieņ. ¹⁵ Irec Wofuņ no jaņere ziņuc mukopac: No mi sorec-jopahape sifu nore zâņeo âke hotahuc muenģopieņ, ‘Zika me roroc hae mâreņ zira mi fuaocmu’; porofete iņuc muenģopieņ jaņe zika â roroczi omaec-jopaocmu hâcne. ¹⁶ Ehame ņic findaņdâņ manaenģopieņ jaņe wâc iņuc jaha

zika â roroczi jopa mizieme Jerusalem hae zoŋao foraniŋmu, eme moczi moc mi ducjopaocmu, jaŋe â ŋokac naru motecfâc-jeŋic mâmâc. No hehesic-jeŋicte okacne fai-jeŋicko râepe feocmu hâcne.

Porofetezi ŋic jaŋere erâ kiokac

17 “Goki ine dâŋ kecziŋuc jazazemec:

‘Zâŋeuc-nane ŋafe furec bocjaha wahahuc domazejec,
 ŋicfâc-nane jaŋere otâ zeŋoŋ e qa imac ecne-
 kicne,
 e mocwâc biankeocte sâc mi ekac hâcne.

18 No gielo rarâ honekopac,
 zikazi qâhâmoc-jopakicne sawa foranŋopien,
 me haeo ferâ honekopac,
 nânâre hâhâmo irec zaic manahuc juŋgopien.
 Erâ i sawa mâcne, porofete â taha bapa jaŋe
 ŋic ba bititicne iŋucne mâreŋ fotâcnehuc
 juŋgopien.’ ”

19 Wofuŋ, go Juda behe sanaŋkemeŋ,
 me Zionte takicgukac me?

Go wemocte ba imac enâretec
 bibianŋte hata-nâŋec arictac ewec?

Nâŋe wama worickehuc juhapene
 wiac bianŋne moc mi fuaekac,
 bâbâpiaŋ dameŋte worickehuc juhapene
 jei, wiac bipic tataranehec fuaekac i!

20 O Wofuŋ, nâŋe nâŋâcne hehesic
 erâ wâc mamacfâc-nâŋec jaŋere kiŋ bahac
 i mâmâc hone taranŋopeneŋ,
 nâŋe sâqocne bahuc bugao bambeŋ hâcne.

- 21 Irec go sifu zânegere erâ hone sunjiņ mi enârezemec;
eri tatamacgere ñeņe bian ba jawa mi ec-
nezemec;
go nânehec zâzâfic emeņ
irec manasuhuc mi hetâcnezemec.
- 22 Njicne ñicne nemufâc-jeņic jaņere ñondenko
hoe bapa fârine moc juņgopieņ me?
Me sambân e jahac mume hoe moc heekac me?
Wiac Wofuņ i goki hâcne ekomec i!
Anutu-nâneç, nâne gore mamanac juņgopeneņ,
goki hâcne wiac i bâfua-fârehuc juekic.

15

Wofuņ e Juda kikefuņte aaric manakac

1 Eme Wofuņ e zijuç nazawec: “Mose me Samue jahe nore maio fuapire muzac no ñicguru zi sifu busâqoc moc mi mana-jarezapo. Zâne mai-naneonec jâpec-jopatec ranzepieņ! ² Eme jaņe ‘Wena ranaņmu’, iņuc mu wioc epie jazazemec, ‘Wofuņzi zijuç mukac:

“Huc hâmoçte biņe e hâmozejec,
zikare biņe e zikare nânâ ezejec,
nânâre hâhâmore biņe e nânâre hâmozejec,
kâpâcwâruo rarare biņe e kâpâcwâruo raze-
jec.” ’

³ “Wofuņ noni jaņerao sisipiricte wiac ⁴ fuaocte mupemu ine kecziņuc: Zikazi qâqâhâmoc-jopa, qâtozi kison-joparâ rara, erâ sawa wipe â mâreņ qowi jaņe nâ sipiric eejare. ⁴ No iņuc ejaņepe mâreņko ñicwofuņ â gurufâc-jeņic sasawa jaņe honeç-joparâ bipic tatara ejaņezejec, i Juda

ņicwofuņ Manase, Hisikiare ņokâ hâcne, eki
Jerusalemko wiac efârewec irec erâ iņuc epemu.

5 “O Jerusalem, mozi busâqoc moc
mana-gareocmu?

Mozi gore erâ mu mamakuc eocmu?

Mozi jujugere mu wioc egareocte
gorao fâ fisiocmu?

6 Goki hâcne behecnumeņ â râpecnumeņ,
Wofuņ nore dâņ iņuc;

irec no râsi egarehuc sipiricgupemurâ menane
sicnepo
no busâqoc mana-garezore takicnukac.

7 Jaņe maņjeņic mi bârisiemiņte
hae-jeņic ņerakac ira oofaņzi ofaņ-jopapo,
ehuc naru motecfâc-jeņic omaec-jopahuc
ņicfâc-nane sipiric-jopapo.

8 Hozecfâc-jeņic jaņe hâwecmecko moņgeņ fokac
irec zare jâurumbiņ;

ņicmotec neņgocfâc-jeņic jaņe sisipiric ņiczi
zoaņ qaqaackoa fua-jareocte mucnepo,
ehuc mupe zârâ hâriņzi â wiac bipic tatarane-
heczi
ututuņ bâfuac-jopawec.

9 Eme ņokâ 7 rocjopame jucnemiņ ņokac e qaņa
ururuc ewec,

ehame maņticne omaewec;

woze qeuc mi ehame qâņgicne rokične,
e qurutuame mimizi fainao fewec.

Nâfocnefâc-jeņic ine râsifâc-jeņic jaņere zika
irec biņe qikiņ-jopapemu,
Wofuņ nore dâņ iņuc.”

10 Jei, nenġoc-nane, go wemocte rocnumeñ? Mâreñne mâreñne nore erâ dâñgie â rârâsi fuaekac i! No moneñ hotâ moc mi jarepo â jañe wâc no hotâ mi narembiñ, ehame sifu ñic sasawazi sâwecnuenġopien. 11 Jâmbomac, Wofuñ, no wiac bianñere kiñañ qagarepo, erâ zârâ hârîñ â fific guguriñ damenġo râsi jañere erâ wira wâwâsic egarepo. 12 Aen faic mârenġonec wareekac â aen bâbâron i ñic moczi sâcne bazuocmu me?

13 “Hae mârenġe sâckerâ sâqocne bâfua ramen irec okacne mafa mâririge â moneñ boreñge i fiuc roro ñic jañe tofamâc qikiñne-jarepemu. 14 Erâ mupe mâreñ kâuc bakomec ira râsifâcge jañere kiñañ qahuc juzemec; kimben-ñañere zocbârui fuarâ ñonden-ñenġicko zahuc fokac hâcne.”

Wofuñ e Jeremia mu keten ecnekac

15 Eme Jeremiazi muwec:

“Wofuñ, go kâuc mi bakic;
manasucnuhuc iqicnuzemec,
erâ nu jâpec eenġopien jañe nore erâ okacne jarezemec.

Omaezipore mi akic-jopazemec,
gore erâ fai-naneo mimi feekac i manac me!

16 Dâñgezi ware bâfuacnume mana mañ eekopac,
dâñgezi bubianj bâfua-nareekac,
â mañzi mana ziziweekopac;

o Anutu Tâpiri Quñqasañ Wofuñ,
no gore zâñe ropo i.

17 No dâñ zorai ee jañere guruo mi ñeekopac,
ehuc kiwac qawac mi eekopac;

Megezi rozakiecnuhuc mamana sâqocgezi
bâfusecnumențe
buc mac Țeekopac.

18 Zâic-nanezi wemocte tatarane mi ekac?
Wicnane wemocte somiezo mi ehuc
fofo sanaj juekac?

Go jâmbomac opâ zizicne tinac enarehuc
eatucnuzo maȚkeekic me?”

19 Eme irec WofuȚi dâȚ keczinuc mukac:

“Go risietec no sâcne hefârocgupemu,
eme harierâ nore maio domazemec.
Go jawadâȚ behehuc fârinea mucmuo
ine mana-garepe nahacne mic erâ juzemec.

Eme jaȚe gorao roweckenzepieȚ,
go ine jaȚerao mi roweckezemec.

20 Eme noni mupe Țicguru keci jaȚere maio
aensac sanaj inucne erâ qin herâ domaze-
mec.

JaȚe herândinȚuniȚe juju gie baniȚmu
erâ sâcne bawahacȚuniȚmu;

wiac noni gohec jukopacte
ȚezicȚupe sanajke-jarecmu i!

21 No Țic repicne jaȚere meonec bataracgupemu,
â qac momori jaȚere ȚezicȚupe.

WofuȚ nore dâȚ inuc.”

16

WofuȚtaonec okacne fisi-jareocmu irec dâȚ

1 WofuȚte dâȚ norao keczinuc fuawec:

2 “Go mâreȚ zira Țokac naru motec tâmiric
juzemec. 3 WofuȚ no naru motec hae

mâreȚ zira fuaenȚopieȚ â nenȚocfâc-ȚeȚic
rocȚopaenȚopieȚ erâ mamacfâc-ȚeȚic mâreȚ

zira bâfuac-jopaengopien jaŋere ziŋuc mukopac:
⁴ Jaŋe huc repicne bacjopame hâmonzepien. Ehame jaŋere ki mamakuc mi fuaocmu â moczi mi ducjopaocmu; jaŋe mâc jawa iŋucne mârenko fohuc mârenŋe guec bâfuanzepien. Jaŋe zikazi kimiziec-jopaocmu â nânâ basahuc hâmoŋapie qânqânŋfâc-jeŋic i sawa wipe â mâren qowi jaŋere nânâ eniŋmu.”

⁵ Wofuŋ e ziŋuc mukac wâc: “Go ki mamakuc eere ficko moc mi fezemec, â soŋgânŋe wâc mi razemec, erâ busâqoc mi mana-jarezemec. No ŋicguru keci jaŋe wama-nane erâ aki anonoc â buuruc-nane jowac ropo hâcne, Wofuŋ nore dân iŋuc. ⁶ Eme mâren zira kâcŋene mecne piticne mecne hâmopie moc mi ducjopaniŋmu, â jaŋere erâ ki mamakuc ee me memotec hehetâc me qizec bâbâtâc i wâc mi eniŋmu. ⁷ Me hâmoc fuame ki mamakuc eekac ŋic e bâmiriŋkeniŋŋe soŋgânko nânâ rârâcne i mi eniŋmu; me neŋgoc mamac jahec-ticne hâmopire mu bâmiriŋ eecne i wâc omaeocmu. ⁸ Tiwâ bâzire tumaŋneniŋmu fic ira ferâ jaŋehec ŋehuc nânâ opâ nâzemec. ⁹ Anutu Tâpiri Qunqasaŋ Wofuŋ, Israere Anutu no kecziŋuc mukopac hâcne: Manaŋgopien, ŋaŋacne juju damenko hae mâren kecziŋec mana aŋac â zeri bubian â ŋic ŋokac roroc ehuc zeri wiac ee i mupe zânŋe fai-ŋeŋicko omaeocmu.

¹⁰ “Eme dân i sasawa ŋicguru keci jazatec ziŋuc wio-gareniŋmu: ‘Wofuŋ e wemocte wiac hâhâwicne sâko keci fai-nâŋecko fefâreocte muwec, nânŋe wemo kiŋ bahac moc bâfuahuc Wofuŋ Anutu-nânŋec bunao bamben?’ ¹¹ Iŋuc

mu wioc egarepie jazazemec: ‘Wofun̄te dān̄ zīn̄uc fokac. Mimiñnefâc-ñeñic jañe behecnurâ nemu jañerao qohotarâ kiñañ qajarehuc fodape-jare jumbien̄, ehuc no qaisocnurâ sâcmutâc dāñnane qâsua jumbien̄. ¹² Noñe ine mimiñnefâc-ñeñic siric-jopahuc sâqocne fehuc baengopien̄, ñeñe ru sâc mañrāngen̄ â hehesic juhuc wiac ebac een̄gopien̄, ehuc nore dān̄ mi manaengopien̄. ¹³ Noñe iñuc een̄gopien̄te mâren̄ zirecnec tun̄ñopape mâren̄ moc, ñeñe kâuc bañgopien̄ â mimiñnefâc-ñeñic jañe wâc kâuc bambiñ, ira hâcne ran̄zepien̄; eme ira nore jaun̄ basahuc ñafe furec nemu kiñañ qajarehuc jun̄iñmu.’”

Findañdāñ moc

¹⁴ Wofun̄zi zīn̄uc mukac: “Manañgopien̄, damen̄ moc maickeocmu ira zīn̄uc mocwâc mi muniñmu, ‘Wofun̄zi jujâmbâñkekac, eki hâcne Israe ñic Aigita mâren̄konec jowac-jopame warembiñ’, ¹⁵ aricne, kecziñuc ine muniñmu, ‘Wofun̄ jujâmbâñkekac, eki hâcne Israe ñic faic mâren̄konec â mâren̄ sâc tun̄jopame rambiñ irecnec batarac-jopawec.’ No hâcne mimiñnefâc-ñeñic mâren̄ qikiñne-jarepo ira bârisiec-jopazepac.”

¹⁶ Wofun̄te dān̄ kecziñuc fokac wâc: “Manañgopien̄, no opâ qowi roro ñic bocjaha hefârec-jopape wasañko fârec-jopan̄zepien̄; eme zâhec wosan̄en̄ bapa bocjaha hefârec-jopape ware tikine tikine â facne facne â qânâ hawec sâc ficne qosac qosac ehuc rocjopan̄zepien̄ wâc. ¹⁷ Zâñe-nanezi hata-jeñic sasawa hone

jâjâpehape nore maio sosoŋko i sâcne mi eniŋmu, kiŋ bahac-jeŋic zâŋe mai-naneo tâtâc fokac. ¹⁸ No qanaŋ kiŋ bahac â sâqocne-jeŋicte okacne bafehuc bazu-jarepemu, i mâreŋ-nane nemuqâŋ-jeŋicte âsu gârezi bâsâqorembiŋte â mâreŋ nore biŋe fowec i wiac-jeŋic mamakâcnezi bâfusembiŋte.”

Qâpuc jaŋe Wofuŋ mana taraniŋmu

¹⁹ O Wofuŋ, go tâpiri-nane â dapeŋ-nane,
go zârâ hârîŋ dameŋko huec sanaŋ-nane.

Niŋcne ŋicne jaŋe mâreŋ qaŋeŋnaonec
gorao fisirâ ziŋuc muniŋmu:

“Mimiŋnefâc-nâŋec jaŋe burec wiac,
nemuqâŋ racne â fâri tâmiric i sawa ba-
jumbiŋ.

²⁰ Niŋczi nemu fârine sâcne bâbâfuac-jopane me?
Arictac, ŋiczi nemu bâfuakicne i fârine ar-
icne!”

²¹ “Irec manac, no dameŋ zi fuŋne-nane qazu-jarepemu, ehuc tâpiri â sasanâŋ-nane bataniŋke-jarepe zâŋe-nane ‘Wofuŋ’ i mana taranzepiŋ.”

17

Manjeŋicte tafeo sâqocne-jeŋic heutuckekicne

¹ “Juda kikefuŋ gore sâqocne i aeŋ kirifizi qâreŋkekicne; kirifi tetcnere qânâ furi sâko izi maŋgere tafeo â alatagere zuŋeo heutuckekicne.

² Naru motecfâcge jaŋere aŋacguekac sâc ijaha alata wiacge â Asera nemuqâŋ wiacgere mana-suekic. Wiac i jâc qâricnere fuŋne â tikitoŋko

ņegare rakac. ³ Irec mâreņge sasawa ira sâqocne boc bâfuakicnere mafa wiacge â boreņ zeņaņge â bâzi ririkere toma forakac i râsi jaņere biņe gafârekopac. ⁴ Eme mâreņ garepo i behetec fozejec; eme no mupe mâreņ moc kâuc bakomec ira râsifâcge jaņere kiņaņ qahuc juzemec; ņoņe kimbeņ-nanere zoc ruqembiņte zahuc foocmu sanaņ.”

⁵ Wofuņ e kecziņuc mukac:

“Moc e ņic jaņerao roweckeocmu
me saħac biuczī tâpiri-ticne eocte muocmu
ehuc maņticnezi Wofuņ no qikiņnuocmu
e sâwecte biņe ezejec.

⁶ E jâc garaņ garaņne mâreņ sawao domakac
iņucne,
ehuc wiac bīaņne fuaocmu i moc mi ho-
neocmu;
e mâreņ burocnao â hahaņkecīcnao â guez
tâmiricko
erâ ņiczi ņec juc mi eeņgopiņko juzejec.

⁷ “Moc e Wofuņ norao roweckeekac
â Wofuņ noni huec-ticne eekopac
ņic iņucnere jambuņkecīcne muzo.

⁸ E jâc moc opâmecko sarakicne iņucne,
gâtâne opâopec râeme huekac,
e zoaņ fârorocte mi qaņaekac,
â rehacne fie ruruckehuc fua bīaņ eekac;
e roroc damaņko wâc mana mezac mi ehuc
fârīne zuzuhuc jaha bâfua rahuc juekac.”

⁹ ņic maņsioc-ticnezi wiac gâcne siricke-fâreekac,

- mañ i repic qapicne hâcne;
 mozi fuñe-ticne mana taraocmu?
- 10 “Wofuñ noni hâcne mañ â mamasu ba esâic
 ecneekopac,
 i ñic sasawa juju-jeñicte â eebapa-jeñicte
 fârine
 irec okacne bazu-jarepemurâ iñuc eekopac.”
- 11 Ñic moczi eeatucko moneñ mafa hureekac
 e wipe moc e jahacne hândâñ mâcne,
 mocte ñefackeme âtezuocmu irec sâc;
 e juju-ticne jufeku ombâñnao fisime sifuckec-
 neocmu,
 eme tataranao ñic mutuc matacne erâ
 juocmu.
- 12 Ohec, Anutu huriri qâreñ-ticnere ñeñe,
 fuñnaonecteañ feñicne sâko ñewec.
 Ohec, tiri ufuñ-nâñec.
- 13 O Wofuñ, Israere mamac gorañ fokac i!
 Go behecguniñmu jañe zeñgoma qurutu-
 aniñmu;
 go râpecguniñmu jañere zâñe rufemañko
 qâreñkezo;
 jañe jujure opâ, Wofuñ go hâcne behem-
 biñte.
- 14 Wofuñ, goki bâpiañnutec biañkezepac,
 goki baficnutec babafic fârine bâfuazepac;
 go hâcne mumbiañguckopac.
- 15 Manakic, jañe ziñuc nazaengopieñ:
 “Wofuñ dâñticne wena? Fârinehec eoc me!”
- 16 No ine zârâ hâriñ bâfuacmurâ mi jâiñgupo,

erâ okac damenĭ biac fisiocĭte wâc mi mupo,
i go manakomec.

Micbipic-nanezi dânĭ mufuawec
i gore maio tâtâc fokac.

17 Zârâ hârîĭ damenĭko huec sanaĭ-nane
jukomeczi
wîac hâhâwicne mi mac enarezemec.

18 Nu jâpec enareenĭgopienĭ jaĭe qurutuanzepienĭ,
no ine manahanĭ mi qurutuazepac;
jaĭe bipic tatara ejarezejec,
no ine manahanĭ mi enarezejec.

Goki mutec sisipiric damenĭ fisi-jarezejec
ehame siec-jeĭic qazuc qanzaĭ ejarezemec!

Sabata hombaĭ e tiri fozejec

19 Wofunĭzi kecziĭuc nazawec: “Go ĭic jaĭere
motâc sâko â Juda ĭicwofunĭfâc-ticne jaĭe razic
wefuc eenĭgopienĭ ira, erâ Jerusalemte motâc sa-
sawa ira mâmâc ra doma-fârezemec. 20 Ehuc
ziĭuc jazazemec: ‘Judare ĭicwofunĭfâc â Judare
ĭicfâc zengoma erâ Jerusalemte hae rune sasawa
motâc zira razic wefuc eenĭgopienĭ ĭoĭe Wofunĭte
dânĭ mananiĭ! 21 Wofunĭzi ziĭuc mukac: ĭoĭe
juju-ĭeĭicĭte erâ rucjari-ĭeĭic baniĭ, ehuc sabata
hombaĭko mafa wîac moc mi bahuc Jerusalemte
motâcko razinzeĭienĭ. 22 Ficĭeĭicĭkonec wâc
iĭuc jaha sabata hombaĭko mafa wîac moc
mi bawahanzeĭienĭ, ehuc sabata hombaĭ i
mimiĭnefâc-ĭeĭic mutâcne-jarepo irec sâc tiri
foocĭte manasuhuc ĭie wîac i me i moc mi
banzeĭienĭ. 23 Jaĭe ine mi manambiĭ â dânĭnanere
hazec wâc mi râembiĭ, aricne, jaĭe manĭrânĭenĭ

ehuc dâñnane qikiñnembij â bâbâtiñ-nane i qaisockembij.’ ”

²⁴ Wofunji mukac: “3i dâñnane mana-jâmbânkerâ sabata hombanjo mafa wiac moc mi bahuc hae kecziyec motâc fotâcneniñmu, ehuc sabata hombanj tiri foocte manasuhuc gie wiac i me i moc mi baniñmuo ²⁵ ine hae kecziyec motâc i ñicwofunj â fekicne jañe fotâcnerâ raziniñmu. Ine Dawidire ñicwofunj ñeñeo ñeñgopiñj â becâsicko â keretacko rañgopiñj jañe â fekicnefâc-jeñic mecne, erâ Judare ñicfâc â Jerusalem haeo ñec juc eñgopiñj sasawa jañe mecne; eme hae i ñesanañkeocmu.

²⁶ Eme Juda mâreñko hae ñerakac irecnec â Jerusalem hae rârec rârec irecnec â Benjaminj mâreñkonec mecne; wâneñkonec â tikionec erâ Negebe mâreñkonec mâmâc bâzi ririkere qowi â taha bâzire wiac â wiac âsu bianj bafisiniñmu, erâ Wofunj nore taha ufunjo baferâ danje taha râeniñmu. ²⁷ Ñoñe ine dâñnane qatarahuc sabata hombanj tiri foocte mi manasuniñmu, erâ mafa wiac bahuc Jerusalemte motâcko kosa razic wefuc eniñmuo ine motâc-ticne turuñkepe zaocmu; eme Jerusalem haeo ñicwofunj fic ñerakac i zocte nânâ efâreha zoczi moc mi hâpooocmu.”

18

Kuzi bapare dâñ

¹ Wofunjaonec dâñ Jeremiarao fuawec i kecziñuc: ² “Ajoc, go juwic hurâ kuzi bapa ere ficko fezemec, eme ira dâñnane gazape

manazemec.” ³ Eme no hurâ kuzi bapa ere ficko ferâ honepo, e kuzi bahuc ñewec. ⁴ Eme kuzi moc bakume sâqoreme afe izia kuzi moc baocte maname biankeme sâc bawec.

⁵ Eme Wofun̄te dân norao zĩñuc fuawec: ⁶ “Kuzi bapa kecizi eekac sâc ijaha Israere kikefun̄ ñoñehc sâcne mi epemu me? Wofun̄ nore dân ñuc. Manakic, afezi kuzi bapare meo fokac ñuc jaha Israe kikefun̄ ñoñe nore meo jun̄gopien̄.

⁷ No dameñ mocko ñicguru moc me ñicwofun̄ moc â gurufâc-ticne jañe bâsirowec-jopapemurâ me imac-jopapemurâ me sipiric-jopapemurâ dân̄ne epemu. ⁸ Eme uñ sawañ ejarepo ñicguru i jañe manjen̄ic bârisierâ hehesic-jen̄ic behemie busâqoc manahuc mañnane risieme wiac hâhâwicne ejarezo mupo i fârine mi bâfuapemu.

⁹ Dameñ mocko ine ñicguru moc me ñicwofun̄ moc â gurufâc-ticne jañe heqârec-jopahuc sara mama ejarepemurâ mupañkepemu. ¹⁰ Jañe ine, no wiac hone añaç mi ecneekopac i hâcne ehuc dân̄nane qataraniñmuo ine wiac bian̄ne ejarepemurâ mupañke-jarepo i fârinehec ezacte aka hecnepemu.

¹¹ Eme zi Judare ñicfâc â Jerusalem ñecjucfâc-ticne zĩñuc jazac: ‘Wofun̄zi mukac, Manañgopien̄, no wiac hâhâwicne fai-ñejicko feocte dân̄ne mana biric ehuc jukopac. Irec ñoñe sasawa hata hehesicnaonec risierâ juju â eebapa bian̄ne bâfuaniñte giene banzepien̄.’

¹² “Jañe ine muniñmu: ‘Ñuc misac, nâñe nâñâcne mamana biri bâjâpenzepen̄eñ, ehuc mañnâñec rân̄gen̄e â hehesicne irec sâcko wiac

ebac efârenzepenej.’ ”

13 Irec Wofunzi keczinuc mukac:

“Nõje ñicne ñicne jañere ñondenko mu wioc eniñ:
Mozi dân inucne moc manawec?
Naru zeñonj Israe e wiac hâhâwicne bâfuawec
hâcne!

14 Lebanonko sinou fokac i Sirionj tikire faio
fofo sanañ mi foomu me?

Me tikionec opâ mâteñne â fifisine wahaekac
i zicke kereñ moc eocmu me?

15 Njcfâc-nane jañe ine nore nkec-jopawec,
jañe nemu jabane hosâc âsu
rike-jarengopienj,

eme jañe ejarepe hata-jeñic ira fâfâc-jopaha
rândinje qa eengopienj,
ehuc hata sâckoo mâcne, hata kosa
raengopienj.

16 Ehuc mâreñ-jeñic imackepie mimi
busâqoc-ticne

i jañerao tatara tâmiric foomu;
eme i járuniñmuzi bipic tatara ejareha
qizec fofotarc eniñmu.

17 No râsifâc-jeñic jañere maio kagu mânâñ eekac
irec sâc jaha ehuc qâtâtiéc-jopapemu,
â sisipiric damen-jeñicko râpec-jopape
zâñe mai-nane basaniñmu.”

Nic jañe Jeremia râsi ecnepie numuwec

18 Eme ñic jañe mumbiñ, “Ajoc, Jeremia dân
qacnenañ! Taha bapa jañerao sâcmutâc dân
â manaheç jañerao mana biri â porofete
jañerao porofete dân i biac mi omaewec hâcne.

Irec nâhâc e jahacne dâhzi bitîŋ râecnepene ira kizejec, nâhâc dâhticne i me i mana rerenj moc mi enzepenenj.”

19 Injuc mupie Jeremiazi zînjuc numuwec:

“O Wofuŋ, go dâhnanere hazec râec,
ehuc kisâfâc-nane dâŋ muengopienj i manac!

20 Bîantere okacne sâqocne bâtikiepie sâckeocmu me?

Jaŋe juju-nane omaeocte nombânj ronarem-
biŋ hâcne.

No maigao domahuc jaŋere erâ dâŋ bîantere
gazapo

â kimbengezi fai-jeŋickonec rârieocte
numu-garepo irec manasuc!

21 Irec mutecne naru motecfâc-jeŋic jaŋe nânâre
sipirickenzepienj,

â zîkare micko fenzepienj;

ŋokacfâc-jeŋic jaŋe naru motec tâmiric hozec erâ
junzepienj,

ŋicfâc-jeŋic ine huc hâmoczi rocjopazejec,

â ŋicmotecfâc-jeŋic jaŋe zîka fuame zîkare
nânâ enzepienj.

22 Go zîkaŋic ejaretec ututuŋ fisi-jarepie

ficjeŋickonec ki mamakucte fânânj fuazejec.

Jaŋe rocnuŋte nombânj ronarembinj,

â wiwiticzi kike-naneo kiocte soŋsoŋko
râembinj hâcne.

23 O Wofuŋ, nuŋte dâŋ sâqocne mana biric
eenjopienj

i goki mana-fârekic, irec mutec

kiŋ bahac-jeŋic okac tâmiric mi fozejec,

â sâqocne-jenjic maigao fokac i mi
 bôtâmirezemec,
 aricne, fâfâc-jopame maigao waha jopazejec,
 ehame kimbeŋ damengao katucne
 bazu-jarezemec.”

19

Hapec qanẓaŋnekiecne irec dâŋ

¹ Wofuŋzi zĩŋuc nazawec: “Go rarâ hapec afezi bakicne moc furine bac, erâ ñic jaŋere soŋaŋ kâcŋene gâcne â taha bapa fekiecne gâcne rocjopazemec. ² Rocjoparâ motâc sahaçnao kuzi dâkâne gurukeeŋgopieŋko Beŋ-Hinom wâneŋ fuŋkerâ hurakac ira hurâ dâŋ gazapemu sâc mufua-jarezemec. ³ Ehuc muzemec, ‘Judare ñicwofuŋfâc â Jerusalem hae rune ñoŋe Wofuŋte dâŋ mananiŋ! Anutu Tâpiri Qũŋqasaŋ Wofuŋ, Israere Anutu eki zĩŋuc mukac: Manaŋgopieŋ, noni mupe hae mâreŋ zi wiac hâhâwicne fuacneocmu, eme biŋene mananiŋmu sâc jaŋe hazec-jenjic zâickezec. ⁴ I zĩŋucte fuazejec: Jaŋe no beheçnumbiŋ, ehuc nemu furune, jaŋe mecne, mamacfâc-jenjic mecne â Judare ñicwofuŋfâc mecne mi manac-jopambiŋ, jaŋe hosâc âsu rike-jarehuc hae mâreŋ zi bâbiemiŋ, â ñic bahacmâc jaŋere soc hae zira hoŋkepie fusucmarâ fowec. ⁵ Erâ ñokâfâc-jenjic Baali nemu bâzi rikeçneniŋte tikio alata wiac barambiŋ; noni ine irec dâŋ moc mi mupo â jaŋe mi mutâcne-jarepo, erâ maŋnaneo wiac iŋucnere dâŋ moc mi fuawec. ⁶ Ireç mananiŋ: Damiŋ moc maickeocmu ira hae mâreŋ zireç zâŋe i Tofete

me Beñ-Hinom wâneñ mi muhuc, Jopa Sipiric Eejare wâneñ muniñmu, Wofuñ nore dân ñuc.
⁷ Eme Juda â Jerusalem rune jañere mamana i batackepemu, ehuc răsifâc-jeñic jañere hâhâwic wisehapie zikare micko râec-jopazepac, ehuc mupe juju-jeñic jowac rozo muñgopien jañere mezi wâc sipiric-jopazejec. Eme qâñqâñfâc-jeñic i sawa wipe â mâreñ qowi behe-jarepe jañere nânâ enzepien. ⁸ No hae zi mupe wiac bipic tataranehec fuacneme mu âke sisic ecneniñmu, eme jâuruhuc rac warec eniñmu sâc jañe ñifec bipic tatara ejareha ñifec ine bâbâtiñ-ticnere nifepupu ecneniñmu. ⁹ Râsi ejarehuc juju-jeñic jowac rozo muñgopien jañe zârâ hâriñ damenko somâ bajarehuc fiñiñiñ-jopahapie mupe naru motecfâc-jeñic jañere biuc nânzepien, ehuc jañaczia nânâc enzepien wâc.’

¹⁰ “Eme go hapec i ñic gohec mâmâc raniñmu jañere zâñe faio qanzañnezemec. ¹¹ Ehuc jazazemec, ‘Anutu Tapiri Qunqasañ Wofuñ e ziñuc mukac: Hapec â kuzi wiac qanzañnepie bâbâpiankene mocwâc mi eekac irec sâc jaha ñicguru â hae zi henzañ qanzañ-jopapemu hâcne. Eme ducjopazore mâreñ gâcne basahuc Tofete ira ducjopanzeñien. ¹² No hae mâreñ zi â ñecjucfâc-ticne ñuc hâcne ejarepemu, Wofuñ nore dân ñuc; irec hae sâko i Tofete ñucne ezejec. ¹³ Jerusalemte fic wiac â Juda ñicwofuñfâc-jeñic jañere fic i Tofete ñucne mamakâcne efârezejec; eme fic bupu sâc juhuc sambânko bâpiñ ñerangopien jañe hosâc âsu rike-jare jumbien â nemu furune taha bâzi

honke-jare jumbien, fic i sasawa hâcne.’ ”

Jeremiazi ufunte hae zonao dân jazawec

¹⁴ Eme Jeremia e findandân mufuaocete Wofunzi Tofete haeo soreme raweckonec risierâ Wofunte taha ufun irec hae zonao ferâ ñic ñokac zengoma zîñuc jazawec: ¹⁵ “Anutu Tâpiri Qunqasan Wofun e zîñuc mukac: Manangopien, no hae sâko zi â hae piticfâc-ticne sasawa janerao sisipiric fuaocete uñ sawan ejarepo i manrângeñ juhuc dânnane mi manangopien te mupe fârio qafârezejec.”

20

Pasahuru e Jeremia jâc fifitacko râewecte sâweckekicne

¹ Eme Imere ere ñokâ, taha bapa Pasahuru e Wofunte taha ufunko soñan sâko juweczi Jeremiare findandân i manawec. ² Manarâ porofete Jeremia qarâ me kikene jâc fifitacko râeme kindeneme fowec; ine Wofunte taha ufunte motâc moc fowec zânene Benjamin te Motâc faicpec ira. ³ Hae fureme ine Pasahuru e Jeremia jâc fifitackonec batarame Jeremiazi zîñuc âzâcnewec: “Wofun e gore zânê Pasahuru beherâ ‘Ñifec gafac ñic hâhâwic eejare’ inuc mukac. ⁴ Wofun e zîñuc mukac hâcne: Manakic, no mupe go gahacnere hâwicguha âgofâcge zengoma jâne gore hâwic-jopazejec. Go zânê fârigezi honehan jâne râsifâc-jeñic janere zikare nânâ enzepien, eme Judare ñicfâc sasawa jâne Babe ñicwofun ere meo râec-jopape eki Babe haeo bacjopa rarâ zikazi qâhâmoc-jopazejec. ⁵ Erâ i sawa

mâcne, hae zirec rowaŋ â gie-jeŋicte huhure
 wiac â boreŋ zeŋaŋ erâ Juda ɲicwofuŋ jaŋere
 moneŋ mafa i furu jaha râsifâc-jeŋic jaŋere meo
 râepemu, eme jaŋe ro nusec erâ Babe haeo
 baraniŋmu. ⁶ Pasahuru go ine wiacfâcge sasawa
 jaŋehac Babe haeo bacŋopa rapie ira hâmopie
 ducŋopaniŋmu; go gahacne mecne â âgofâcge
 findaŋdâŋ burecne jazahuc jumeŋ jaŋe mâmâc.”

Jeremia e Wofuŋ mu wâwâsic ecnewec

⁷ O Wofuŋ, go mu bâdoc enaretec mi sanaŋkepo,
 gore tâpirizi nore sirickeme
 sanaŋke-naremeŋ;

ehame dameŋne dameŋne nore manapie
 gâgâwinehec eekac,
 â ɲic sasawa jaŋe âke sisic enareeŋgopieŋ.

⁸ No dâŋ muekopac sâc owa ruruckehuc
 ziŋuc muekopac: “Bâbâzaic â sisipiric!”

I Wofuŋ gore dâŋzi zoaŋne zoaŋne
 mu âke sisic â mu gâgâwi bâfua-nareekac
 irec.

⁹ “Ere mocwâc mi manasupemu
 me ere zâŋeo miti mocwâc mi mupemu,”
 iŋuc muhape ine maŋnaneo zocbâruŋ tinac
 fuawec,
 ehuc siec-naneo fosanaŋkehuc zacnuwec,
 eme no irec zâic manaku betankepo.

¹⁰ Bocjahazi saŋucko dâŋ ziŋuc mupie man-
 aekopac:

“Rârec rârec wiac hâhâwicne fuarâ fokac,
 irec dâŋgieo râeniŋ, dâŋgieo râenaŋ me!”

Âgo enareeŋgopieŋ jaŋe waha nuocmu me
 mâcne,

- irec ruc banarehuc muenḡopienḡ:
 “E sâcne mecne eatuckepene
 menâḡecko feme okacne bazucnenaḡmu.”
- 11 Wofuḡ goki ine ḡic ḡac momori inḡucne nohec
 juekicte
 râsifâc-nane jaḡe fâfâc-jopatec sâcne mi
 sanaḡke-nareninḡmu.
- Mimi busâḡoc-jenḡic i tatarane tâmiric
 â mi ninikecne jâmbânḡ.
- 12 O Anutu Tâpiri Ḡuḡḡasaḡ Wofuḡ,
 go ḡic tiḡne ba esâic ejareekic,
 erâ maḡ â mamasu hone taraekic go
 mana-naretec
 okac babazuge jaḡerao fuame honezepak,
 no dâḡnane gore meo râepo hâcne.
- 13 Wofuḡ gae hecneninḡ, Wofuḡ mutenḡkeninḡ!
 Eki hâcne ḡarâ surinḡe jaḡe ḡic hehesicne
 jaḡere meonec batarac-jopaekac.

Jeremiazi juju-ticne sâweckewec

- 14 Fufua dameḡ-nane i sâwecte biḡe ezac,
 neḡgo-nanezi rocnuwec dameḡ i moc mi
 jambuḡkezo!
- 15 “Nokâge moc fuawec,” biḡe bianḡ i ma-
 mac-nanerao bara bubianḡ sâko ḡacnewec
 ḡic e sâwecte biḡe jaha ezac.
- 16 E Wofuḡzi hae gâcne busâḡoc mi mana-jarehuc
 ima bacjopawec irec sâc fuacneme sâckezac;
 e furicte kio owa irec fânânḡ â ḡuḡpiticko zika
 fânânḡ
 manahuc jume sâckezac.
- 17 E neḡgocte bumaḡko fohape

qâhâmocnume muzac sâchezac,
 eme nençoc-nanezi zâneruñ-nane ezac
 â damen sâc motec kikiwechec juzac.

18 No wemocte buzaic â manžârâ sawa hone
 manac ezore
 â juju-nane mimi busâqoc faio jutarazore
 nençoc bumançkonec fuapo?

21

1 Wofuñtaonec dân Jeremiarao fuawec irec
 binañ. Ine ñicwofuñ Zedekiazi Malikiare ñokâ
 Pasahuru â taha bapa Zefania, Masejare ñokâ
 hâcne, jahe mu wioc ecnenicte Jeremiarao
 sorec-jofawec damen ira fuawec. 2 “Babe
 ñicwofuñ Nebukaneza e nâñâcnehec zika çakacte
 go nâñâcnere erâ Wofuñ mu indiñ ecnezemec;
 eme Wofuñ e mârâc mâsi fuñne fuñne bawec
 iñucnea moc bahuc Nebukaneza ecneme be-
 hec-nâporâ razac mecne.”

3 Jeremia eki ine ziñuc jasawec: 4 “Ñohe
 Zedekia kecziñuc âzâcnezepirec, ‘Wofuñ, Israere
 Anutu e ziñuc mukac: Manañgopien, zikare
 wiac menenicko badomahuc Babe ñicwofuñ â
 Kaldea ñic sac râpenao somâc-ñopahapie jopahuc
 juñgopien wiac i mupe hae kecziñuc manñao
 risie-fârezejec. 5 Erâ no nahac me sicnehuc
 meombân-nane tâpiriheczi aaricko â kimbenko
 erâ bu zazamañ-nane fâuckeha ñoñehac zika
 çapemu. 6 Ehuc hae zirec ñecjucfâc, ñic mecne
 qowi mecne jopapemu; ehame huc hâmoczi
 rocjopame omaenzepien. 7 Wofuñzi zuhuckerâ
 ziñuc mukac: Dament irec faicnao ine Judare
 ñicwofuñ Zedekia e mecne â kiñaññicfâc-ticne

mecne â ñic ñokac hae zirec maᅇᅇao juhapie huc hâmoczi me zikazi me roroczi getâc-jopawec jaᅇe mâmâc Babe ñicwofuᅇ Nebukaneza â râsifâc-jeᅇic juhuc juju-jeᅇic jowac ronᅇte manasuᅇgopieᅇ jaᅇere meo râec-jopapemu; eme eki busâqoc mana-jarehuc ᅇeᅇezic me aakic-jopa i moc mi ehuc zikare micko râec-jopazeᅇec.’

⁸ “Erâ ñicguru keci jazazemec, ‘Wofuᅇzi ziuᅇuc mukac: Manasuᅇgopieᅇ, no jujure hata mecne, hâmocte hata mecne mâmâc ᅇaza ᅇowatuc ekopac. ⁹ Moc e hae zirec maᅇᅇao ᅇeocmu e zikare nânâ eocmu, me nânâ basahuc hâmoocmu, me huc hâmoczi roocmu; â moc e ine hae beherâ Kaldea ñic somâc-ᅇopaᅇgopieᅇ jaᅇerao zuhuckeocmu eki ine juocmu â juju-ticne i zikare mateᅇ iᅇucne focneocmu. ¹⁰ No bâbâpiaᅇ mâcne, sisipiric bâfuacneᅇemurâ hae keci maickepo, Wofuᅇ nore dâᅇ iᅇuc. Hae i Babe ñicwofuᅇ ere meo feha turuᅇkeme zâseᅇkezeᅇec.’

Juda ñicwofuᅇ ere findaᅇdâᅇ fuakac

¹¹ “Eme Juda ñicwofuᅇ ere kikefuᅇfâc jazac, ‘Wofuᅇte dâᅇ mananiᅇ, ¹² Dawidire kikefuᅇ ᅇoᅇe! Wofuᅇ e kecziᅇuc mukac:
 “Furic sâc dâᅇgie baniᅇ, ehuc ñic
 bomac-jopakicne
 jaᅇe bâbâzâic ñic ere meonec
 batarac-jopaniᅇ.

I eebapa-ᅇeᅇic sâqocnere erâ kimbeᅇ-nanezi
 zoc iᅇucne fuarâ bâruᅇkeme
 moczi moc hehâpozore eipiezacte iᅇuc
 enzeᅇieᅇ.” ’

- 13 “Manakic, wânenko haronjan faio
 nesanankeekic
 hae go hâcne râsi egarezo mukopac,
 Wofunj nore dân injuc.
 Nõje hâcne muenõpien, ‘Mozi râsi enâreocmu?
 Mozi ficsanan-nâjecko wefuocmu?’
- 14 No eebapa-nejicte fârine irec sâcko
 bâtiñ-ñopapemu,
 Wofunj nore dân injuc.
 No kâte-ticnao zoc ruqepemu,
 eme izi wiac hae râreckehuc fokac
 i zâsenke-fâreocmu.”

22

Juda ñicwofun un sawan ecnekicne

¹ Wofunzi kecziñuc muwec: “Go hurâ Judare ñicwofun ere ficko ferâ dân ziñuc mufuazemec:
² ‘Judare ñicwofun, Dawidire eri ñeñeo ñekomec, go â kiñan qaqañacge erâ motâc zirâ razic we-fuc eenõpien ñõje mâmâc Wofunte dân man-anin! ³ Wofunzi ziñuc mukac: Nõje mumutinj dân â tiñne juju dopeckehuc junzepien, ehuc ro waha âte ejarekicne jañe bâbâzâic ñic ere meonec batarac-jopanzepien; ñic jabane â hozec bekâ jañe fific mi bacjopanzepien, erâ ñic jopa qâzâic eejare me soc bahacmâc hohonke i hae zira wâc mi fuazejec. ⁴ Nõje dân keci mana rerenj ejâmbân-keninmuo ine ñicwofun Dawidire eri ñeñeo ñeninmu jañe fic kecziñuc motâcko mocwâc wefunzepien, erâ jañe mecne, kiñan qaqañac-jeñic mecne â ñicfâc-jeñic jañe mâmâc becâsic keretacko ñehuc rac warec enzepien.

⁵ Nõje dân keci mi mananiñmuo ine erific zi sesuctac fuarâ foote no nahacnao qetickehuc mupañkekopac, Wofuñ nore dân iñuc. ⁶ Wofuñ no Juda ñicwofuñ erific-ticnere ziñuc mukopac:

“No gore manape Gileade mâreñ iñucne
 â Lebanonñ tiki botâñne irec sâc ekomec;
 zi ine ima bacgupe hae sesucne
 â tuhutac erâ fozemec.

⁷ No ñic sipiricguniñte zikare wiac-jeñichec bâwosâec-jopapemu,
 eme jañe jâmâzâcge bianñe jâmbân
 i qafararâ zocko behepie zazejec.

⁸ “Eme ñicne ñicne guru sâko jañe hae zi jâuruhuc jañackoanñ muc manac erâ ziñuc mu-
 niñmu: “Wofuñ e fuñne weniñucte hae sâko keci
 wiac iñucne ecnewec?” ⁹ Iñuc mu wioc epie ziñuc
 bâtikie-jareniñmu: “Jañe Wofuñ Anutu-jeñic
 ehac zâzâfic ekicne i hetâcnerâ nemu gâcne jañe
 fodape-jarehuc kiñanñ qajare jumbienñe.” ’ ’ ”

¹⁰ Nõje hâmokicne ere mi kioniñ,
 â ere mu mamakuc wâc mi eniñ, aricne,
 mâreñ-ticne beherâ rawec ere ine jâmbomac
 kionzepiñ,
 eki hâcne mocwâc mi risieocmu,
 â fufua mâreñ-ticne mocwâc mi honeocmu.

¹¹ Josiare ñokâ, Juda ñicwofuñ Salum hâcne, e
 mamac-ticne Josia ere tuc qarâ ñicwofuñ juweczi
 mâreñ zi beherâ rawec, ere hâcne Wofuñzi

ziñuc mukac: “E zira mocwâc mi risie ware-
ocmu. ¹² Aricne, e kâpâcwâru barâ barambiñ ira
hâmozejec, mâreñ zi ine mocwâc mi honezejec.”

¹³ “Jei, ñic keci! E sindañ ehuc ficticne baekac,
â eebapa repicne ehuc fic mañne mañne
bâfuaekac,
erâ âgo-ticne, kiñañ mâc qanarezejec
muhuc gie furi mi râcneekac.

¹⁴ Ehuc muekac, ‘No ficsâko mañne mañne
kâcçene
iñucne moc bape,
ehuc qâqâtâc katan-ticne barâ mañne jâmâzâc
parañzi
bâpiankerâ peñ bâbâronzi rikepemu.’

¹⁵ Go fic jâmâzâczi bacmurâ zoqac ehuc
ñicwofuñ jujungere fuñne bataniñkezo
mukomec me?
Mamacgezi weniñuc ewec? E nânâ opâ nâhuc
juwec,
erâ mumutiñ dân â tiñne juju foocte giene
bawec.
Iñuc ehuc sâcne juhâmowec.

¹⁶ E ro waha âte ejarekicne â qarâ suriñne jañere
dân dopeckewecko
wiac biankerâ fowec;
eme ñic iñucnere, no mana taracnukac, mi muzo
me?
Wofuñ nore dân iñuc.

¹⁷ Gore zâñe â mamasuzi ine moneñ mafare
â ñic bahacmâc jañere soc honkezore
erâ ñic fific bacjopahuc bâzâic-jopazore
sawa domaekac.”

18 Irec Wofuņzi Josiare ņokâ, Juda ņicwofuņ Jojakim hâcne ere ziņuc mukac:

“Ere mu mamakuc ehuc ziņuc mi muniņmu:

‘O hahac-nane, o seņnane!’

Erâ ziņuc wâc mi muniņmu:

‘O bombonĶ fekicne, o eri qaraweņ-ticnehec!’

19 Aricne, e doņgi iņucne duckenzepieņ,
fârerâ ra Jerusalem haere motâc ocniņuc
taicko behepie fozejec.”

Jerusalem haere â ņicwofuņ-ticnere dâņ

20 “Go LebanonĶ tikio ferâ kio owa ec,
BasanĶ mâreņko marac fânâņge fuaoc;
kifânâņgezi fuarâ Abarim tikionec wahaoc,
jorocfâcge jaņe henzaņ-jopa-fârekicne irec.

21 Go mana mezac tâmiric juhaņtec dâņ gazapo,
goki ine mumeņ, ‘No manaņore takicnukac.’
Go Ķiegaonecteaņ iņuc ehuc jumeņ hâcne,
ehuc dâņnane mana rereņ mi emeņ.

22 Zi ine mâņâņzi lama soņaņfâcge ficne
suec-jopame raniņmu,
ehame jorocfâcge jaņe kâpâcwârue bacjopa
raniņmu wâc.

Iņuc fuame hehesicge sasawa irec erâ
mimi busâqoczi faigao feme qurutuazemec.

23 LebanonĶ tikio ņec juc ehuc
jâmâzâc hahaņko sareņge ba akic ekomec
go ņokac gozi kime zâic serereņ manaekac
zâic irec sâc fua-gareme kio huse wemo
afecne ecmu!”

24 Wofuņzi dâņ kecziņuc muwec: “No
jujâmâbâņkekopacte ine Jojakimte ņokâ Konia,

Juda ñicwofuñ hâcne, go mefâre-naneo meo fefe maqâreñhec inucne fotec muzac sifu hetaracguzapo. ²⁵ No jujuge sipirickezo muñgopien â hâhâwic bajareekic jañere meo râecguzepac, ine Babe ñicwofuñ Nebukaneza â Kaldea ñic jañere meo hâcne. ²⁶ No go â neñgocge rocguwec e mâmâc jaha mâreñ mocko, mi fuapicko ira hâcne tuññofape juku hâmozepirec. ²⁷ Â risienicte mañ hâhâñ enacteekac mâreñ ira ine moc mi risiezepirec.”

²⁸ Eme Jeremiazi muwec:

“Ñic keci, zâñeñe Konia e kuzi sâqocne qanzañnekicne
me râqâc qaisockekicne inucne me?
E â qâricfâc-ticne jañe wemocte mâreñ moc mi
manambiñko tuñjopakicne â
jâpec-jopakicne?”

²⁹ O mâreñ, mâreñ, mâreñ,
go Wofuñte dâñ manac!

³⁰ Wofuñzi kecziñuc mukac hâcne:

‘Ñic keci e naru motec tâmiric,
fuñne-ticne inuc qâreñkeniñ;
e mâreñko juocmu sâc ba bititic ehuc juzejec,
â qâricfâc-ticne jañeraonec moczi Dawidire
eri ñeñeo ñehuc
Judare ñicwofuñ juocce hatane mi fuacneze-
jec.’ ”

23

Ñic zanzañe jañe risieniñmu

¹ “Jei, lama soñañ ñeñe, sapa-nanere lama guru mi soñañ-jopahuc bâtâtiéc-jopaenñgopien!”

Wofuņte dâņ iņuc. ² Irec Wofuņ, Israere Anutu e ņicfâc-ticne soņaņ-jopaenġopieņ soņaņ i jaņere ziņuc mukac: “Ņoņe lama gurufâc-nane hone maiņ moc mi ejarehuc bătâtiec-jopambiņ â jâpec-jopambiņ. Manaņġopieņ, no eebapa-ņeņic sâqocnere erâ bătîņ-ņopapemu! Wofuņ nore dâņ iņuc. ³ Eme no lama gurufâc-nane zanzańne mâreņne mâreņne behec-jopapo irecnec qânusuc-joparâ jowac-jopa ware sapa-jeņicko râec-jopapemu, eme fua sawec enzepieņ. ⁴ No soņaņ râec-jopape hone soņaņ ejarenzepieņ, eme jaņe mocwâc mi hâwic-jopaha gâgâmârânzepieņ, ehame moczi mocwâc mi sifuckezejec, Wofuņ nore dâņ iņuc.”

⁵ Wofuņzi kecziņuc mukac: “Manakic, damen moc maickeocmu ira Dawidire oso gitecne tiņne moc mupe fuaocmu, eme eki ņicwofuņ juhuc guriņ bapa gie-ticne mamanahec bazejec â mâreņko mumutiņ dâņ â tiņne juju foocte giene bahuc juzejec. ⁶ Eme ere juju damenġo Juda bâbâpiaņ fuacneocmu â Israezi wama faio juocmu; zâņe-ticne ine ziņuc muniņmu: ‘Wofuņ e tiņne-nâņec.’

⁷ “Irec manac, damen moc maickeocmu ira ziņuc mocwâc mi muniņmu, ‘Wofuņ e jujâmbâņkekacte Israe ņic Aigita mâreņkonec jowac-jopame wahambiņ.’ ⁸ Aricne, ziņuc muniņmu, ‘Wofuņ e jujâmbâņkekacte Israere qâricfâc jaņe jaņacne mâreņko ņec juc eniņte faic mâreņkonec â ira me ira bătâtiec-jopaweckonec jowac-jopa warewec.’ ”

Porofete burecne jaņere okacdâņ

9 Porofete jaņere dâņ:

Maņnane zâickeha bunane herickekac,
 me kike bibiric-nane ņetaraha jâjâwâckekac.
 No ņic opâ sanan nâku biric boroc eekac iņucne,
 â ņic moc waiņzi maņ bâsifuc ecneekac irec
 sâc;
 no Wofuņte maio â tiridâņ-ticnere maio iņuc
 hâcne ekopac.

10 Mâreņ i boe sau ņiczi fusucmarâ juņgopien
 hâcne,
 ehame sâwecte erâ hae mâreņzi busâqoc
 hawari ekac,
 â mâreņ burocnao kecqaņ wiac hâmo qaņac
 ekac.

Jaņe wiac sâqocnere henziņiņehuc juņgopien,
 â hehesiczi tâpiri-jeņic ekac.

11 Wofuņzi kecziņuc mukac:

“Porofete mecne, taha bapa mecne
 jaņe mâmâc jaha ņic sindaņne;
 jei, ficnaneoa eebapa-jeņic hehesicne
 bâfuakopac hâcne.

12 Irec hata-jeņic i hata fâfâsâcne iņucne ezejec,
 eme dapâcko ira rahuc âte sowarierâ waha
 jopazejec.

No bâbâtiņ jara damen-jeņicko wiac hâhâwicne
 mupe
 fai-jeņicko feocmu hâcne, Wofuņ nore dâņ
 iņuc.

13 Samaria mâreņko porofete juņgopien
 jaņerao wiac mamakâcne honepo wâc;
 jaņe Baali ere zâņeo âke hotahuc findaņdâņ
 mumbiņ,

ehuc ñicfâc-nane mañ bâsifuc ejarembiñ.
 14 Jerusalem haeo porofete junğopien jañerao ine
 wiac sindañ hârindañ hâhâwicne honepo.
 Jañe boe sau ehuc burecdânko wiac ebac
 eenğopien,
 erâ sâqocne bapa jañe sâqocne-jeñic
 mi beheniñte dopec-jopaenğopien.
 No jañere manape Sodomñic inucne
 efârenğopien,
 â ñecjufâc-ticne jañere manape
 Gomora ñic jañere sâc enğopien.”

15 Irec Anutu Tâpiri Qunğasañ Wofuñ noni
 porofete jañere dâñ kecziñuc mukopac:
 “Manakic, no kegocjâc hâtâ qinğiqiñe
 â qotâra micopâ gumec-jopapemu;
 Jerusalem haeonec porofete jañeraonec hâcne
 wiac hehesicnezi hañ barâ mâreñ
 fusucma-fârekac.”

16 Anutu Tâpiri Qunğasañ Wofuñ e
 kecziñuc mukac: “Porofete findañdâñ
 ñazaenğopien jañere dâñ mi mananzepien,
 jañe eatuc-ñopaenğopien sawa; jañe Wofuñte
 mickonec dâñ mâcne, jañe jañacne mañko
 fuac dâñ ñazaenğopien. 17 Wofuñte dâñ
 qaisockeenğopien jañe damen sâc ziñuc
 jazaenğopien, ‘Ñoñe sâcne juhâc qâhâmoniñmu’,
 â mañrâñgen-jeñicte hata âtehuc juenğopien jañe
 ziñuc jaza-fâreenğopien, ‘Ñoñe wiac hâhâwicne
 moc mi fua-ñareocmu.’”

18 Jañeraonec mozi Wofuñte dâñficko domahuc

- dâñticne hone manac moc ewec?
 Me mozi dâñticne mana rereñ moc ewec?
- 19 Manakic, Wofuñtaonec mângân
 qicwânzâñnehec,
 kimbeñ-ticne hâcne â zâzâkiriñ mângân fuarâ
 ñic hehesicne jañere qizecko wahaocmu.
- 20 Wofuñ e kimbeñ-ticne i wiac mana biric ewec
 sâc
 fârine fua-fâreme sawa bâruñkeocmu.
 Ñoñe irec fuñne dameñ tataranao hone mana
 tarac eniñmu.
- 21 “Porofere keci jañe noni mi sorec-jopahape
 jañac gasackembiñ,
 no dâñ mi jazahape jañac findañdâñ
 mumbiñ.
- 22 Jañe jâmbomac nore dâñficko domaku wa-
 hanzapiñ muzac
 ine ñic ñokacfâc-nane nore dâñ
 mufua-jarenzapiñ,
 ehuc hata-jeñic hehesicnaonec
 â eebapa-jeñic repicnaonec
 bârisiec-jopanzapiñ.”

Porofete burecne jañere erâ unđân fuakac

- 23 Wofuñzi kecziñuc mukac: “No Anutu be-
 mbeñko sawa jujune â taicko mi jujune me?
- 24 Ñic moczi sâcne haesoñ mocko soñkepañkeme
 no basapemu me? No sambân mâreñ ñefuserâ
 mi jukopac me? 25 Porofete gâcne nore zâñeo âke
 hotahuc findañdâñ burecne muengopien, ehuc
 ziñuc muengopien: ‘No guñko dâñ iñuc manapac,
 iñuc manapac’, i jañere dâñ kâuc mi bakopac.

²⁶ Porofete jaŋe manjeŋicko burecdâŋ babaju, â findaŋdâŋ burecne mumu, â manjeŋicte eeatuc mumusawe i wezimucko behenzongopieŋ?

²⁷ Guŋ manarâ irec dâŋ nazaŋ gazaŋ eenngopieŋ i ŋicfâc-nane nore zâŋe nkec-jopaocte manasuhuc eenngopieŋ hâcne, mimiŋnefâc-jeŋic jaŋe iŋuc jaha Baali nemu kiŋaŋ qacnehuc zâŋe-nane nkec-jopawec.

²⁸ Porofete moc e guŋ manajecko irec binaŋ bazo murâ bazejec, â moc e nore dâŋ moc manajecko ine dâŋnane fâretieŋ jaha muzejec. Padi jawane â fârine i wemocko bâturec-jofazo?

²⁹ Dâŋnanere fuŋne kecziŋuc fokac i mi honngopieŋ me? E zocbârueŋ iŋucne, erâ hamazi qânâ sâko qâfâuckepene dâkâ piic piic eekac irec sâc. Wofueŋ nore dâŋ iŋuc.

³⁰ Irece mananieŋ, porofete moczi mocte mickonec dâŋnane manahuc fiuc roroc eenngopieŋ jaŋe râsi ejarekopac.

³¹ Erâ manangopieŋ, porofete jaŋacne namenezi dâŋ murâ, Wofueŋzi mukac, muhuc burec eenngopieŋ, jaŋe wâc râsi ejarekopac.

³² Erâ no Wofueŋzi ziŋuc mupe mananieŋ: Noni mi sorec-jopahape â dâŋ moc mi mutâcne-jarehape porofete gâcne jaŋe guŋ burecnere findaŋdâŋ muniŋmu, erâ irec binaŋ bahuc ŋic ŋokacfâc-nane jowac-jopapie burec â eeatuc dâŋjeŋic reŋkehuc qâsorienieŋmu, porofete iŋucne jaŋe râsi ejarekopac. Jaŋe gie bapie ŋic ŋokac jaŋerao fârine biaŋne moc mi fuaekac. Wofueŋ nore dâŋ iŋuc.

³³ “Jeremia, go ŋicguru keci jaŋe, me porofete moczi, me taha bapa moczi ziŋuc mu wioc egarenieŋmu, ‘Wofueŋte tagi i wemo wiac mo?’

ine jazazemec, ‘Tagi i ñoñe hâcne, no hetara behec eñarepemu.’ Wofuñ nore dân inuc.
³⁴ Porofete moczi me taha bapa moczi me ñic jañeraonec eki me eki ‘Wofuñte dân ine hâcne’, dân inuc muocmu ñic e â wiacfâcne jañe mâmâc bâtiñ-jopapemu. ³⁵ Ñañackoañ nazañ gazañ ehuc mu wioc zinuñ enzepieñ: ‘Wofuñzi dân weniñuc bâtikiewec?’ Me ‘Wofuñzi dân weniñuc muwec?’ ³⁶ ‘Wofuñte tagi’, dân i ine mu bâuac mocwâc mi enzepieñ, Anutu Tâpiri Qunqasañ Wofuñ, Anutu-nâñec hâcne, ere dân musifuckepie ñañacne dânzi tagi eñarezacte.
³⁷ Irec porofete zinuñ mu wioc ecnezemec: ‘Wofuñ e dân weniñuc bâtikie-garewec?’ Me ‘Wofuñ e dân weniñuc muwec?’ ³⁸ Ñoñe ine ‘Wofuñte tagi,’ dân inuc mupie Wofuñzi muocmu, ‘Ñoñe “Wofuñte tagi,” ’ dân i mi muniñte muac-ñopa-bipiehape sifu muniñmuo ³⁹ ine tagi inucne bafaharec-ñoparâ ñoñe mecne â mimiñnefâc-ñeñic hae ñarepo i mâmâc mai-naneonec behec-ñopape sipirickeniñmu.
⁴⁰ Eme mupe mimi tatara tâmiric â mimi qaqa fofa sanañ â mi ninikecne izi fai-ñeñicko fezejec.”

24

Jâmba hândân biayne â sâqocne irec dân

¹ Babe ñicwofuñ Nebukaneza eki Judare ñicwofuñ Jekonia, Jojakimte ñoka hâcne, e â Judare ñic fekicne â fic bapa erâ aenzi wiac bapa jañe mâmâc Jerusalemkonec Babe haeo bacjopa rawec. Eme manañgopieñ, dameñ irec faicnao Wofuñzi kâdoc jajahec jâmba hândânhehec

Wofun̄te taha ufun̄te hae zoŋao ŋeha nowatume honepo. ² Kâdoc mocko jâmbô hândân̄j bian̄ne jâmbân̄j fowec, jâmbô hândân̄ne bâbâni qeueekac irec sâc; kâdoc moc ira ine jâmbô hândân̄j sâqocne jâmbân̄j fowec, jâmbô hândân̄ne mi nânâne, gâreckekicne hâcne. ³ Eme Wofun̄zi nazawec: “Jeremia, go wemo wiac honekomec?” Mume mupo, “Jâmbô hândân̄ne, jâmbô hândân̄j bian̄ne i bian̄ne jâmbân̄j, â jâmbô hândân̄j sâqocne i sâqocne jâmbân̄j, gâreckekicnere mocwâc mi nânâne.”

⁴ Mupe taram̄e Wofun̄zi dâŋ kecziŋuc nazawec: ⁵ “Wofun̄, Israere Anutu no ziŋuc mukopac: Jâmbô hândân̄j bian̄ne zi hone ziziwekopac, ehuc manahape Judan̄jic mâreŋ zirecnec Kaldea mâreŋko bacjopa rambiŋ jaŋe irec sâc jaha hone ziziwec-jopakopac. ⁶ Erâ hone akic ejarehuc juku jowac-jopape mâreŋ zira risienzepieŋ; eme no heqârec-joparâ mocwâc mi sipiric-jopapemu, no sarac-joparâ mocwâc mi qâfiec-jopapemu. ⁷ Erâ no maŋ mamasasu tahac-jopahape jaŋe no Wofun̄jukopac i mana taranzepieŋ. Eme jaŋe ŋicfâc-nane juhapie no Anutu-jeŋic juzepac, jaŋe maŋjeŋic bârisie-jâmbân̄kehuc maicnunzepieŋ.

⁸ “No Juda ŋicwofun̄ Zedekia â fekicnefâc-ticne â Jerusalemte ŋic nâfocne, â mâreŋ zirec ŋic zanzan̄ne erâ Aigita mâreŋko mâckerâ juŋgopieŋ jaŋe ŋiczi jâmbô hândân̄j sâqocne, gâreckekicnere mocwâc mi nâhuc beheŋgopieŋ sâc ijaha ejarepemu. ⁹ Noni mupe mâreŋte ŋicguru sasawa honec-joparâ hâwic-jopazejec. Ehame behec-jopapemu sâc mâreŋ irec ŋic jaŋe mu ruruc ejarehuc mu qâqin̄ dâŋ

ejarenzepien, erâ nifepupu ejarehuc sâwecdân muranzepien. ¹⁰ Eme mupe zika mecne, roroc mecne, huc hâmoc mecne fua-jareme jaņe â mimiņnefâc-ņeņic mâreņ jarepo ira sirowe-fârenzepien.”

25

Babezi ima sâko bâfuahuc juhame jara 70 tarawec

¹ Nebukaneza e Babe ñicwofuņ juhame jara wâņ ewec, â Juda ñicwofuņ Jojakim, Josiare ñokâ hâcne, e ñicwofuņ juhame jara 4 ewec damen ira Judare ñicfâc sasawa jaņere erâ Jeremiarao dâņ fuawec zine hâcne. ² Eme porofete Jeremia e Juda ñicguru sasawa â Jerusalem ñecjucfâc-ticne zenğoma jaņe dâņ i jazahuc kecziņuc muwec: ³ “Amonțe ñokâ Josia e Juda ñicwofuņ jume jara 13 eha Wofuņte dâņ funķerâ norao fuawec; erâ fua wefukuhame jara 23 sâko tarakac, ehame no hati mutaniņke-ņarehuc jupo, ñoņe ine moc mi manambiņ. ⁴ Eme Wofuņ e damen sâc kiņaņ qaqařac-ticne sasawa, porofete hâcne, ñoņerao sorec-jopahuc juwec, ñoņe ine mi manambiņ â dâņticne mananiņte hazec mi râembiņ. ⁵ E ziņuc nazawec hâcne: ‘Ñoņe ru sâc hata hehesicne â eebapa-ņeņic sâqocne râpeckenzepien; iņuc erâ Wofuņ noni ñoņe â mimiņnefâc-ņeņic mâreņ tahac-ņopapo ira jurâ ju ehuc juniņmu sanaņ. ⁶ Ñoņe nemu gâcne jaņerao qohotahuc kiņaņ mi qajarenzepien â mi fodape-jarenzepien, erâ wiac hâhâwicne eņarezipore eebapa-ņeņiczi mi

bâiņnunzepieņ.’ ⁷ Ņoņe ine dâņnane mi manambin, irec eebapa-ņeņiczi bâiņnumbințe wiac hâhâwicne fua-ņarezejec, Wofuņ nore dâņ iņuc.”

⁸ Irec Anutu Tâpiri Ķuņqasaņ Wofuņ e ziņuc mukac: “Ņoņe dâņnane mi manambințe ⁹ no faic mâreņkonec ņicguru sasawa jaņere mecne erâ Babe ņicwofuņ Nebukaneza, kiņaņ qaqa-nane ere mecne, dâņ râe-jarepe rame jaņe ware mâreņ zi â ņecjucfâc-ticne erâ ņicne ņicne rârec rârec juraņgopieņ ņoņe râsi eņarenzepieņ. Eme no sipiric-ņopa-jâmbâņkepe ņiczi honec-ņoparâ bipic tatara ejarezejec, ehame mu ruruc â âkebic sanaņ eņarenzepieņ. Wofuņ nore dâņ iņuc. ¹⁰ Eme no ņondeņ-ņeņickonec aņac zeri â zeri bubiaņ â ņic ņokac roroc ehuc zeri fânâņ eenņopieņ â hâmu fâfâze irec fânâņ erâ lambe tatamac i bârâriezepac. ¹¹ Mâreņ sasawazi sesuctac fuarâ tuhu fozejec, ehame ņicguru zi jaņe Babe ņicwofuņ ere kiņaņ qahuc juhapie jara 70 tarazejec. ¹² Juku jara 70 tarame ine Babe ņicwofuņ â ņicfâc-ticne jaņe kiņjeņicte okacne bazu-jarepemu, ehuc Kaldea ņic jaņere mâreņ imackepe sesuctac fuarâ fozejec sanaņ, Wofuņ nore dâņ iņuc. ¹³ No mâreņ i hâcne râsi ecnerâ dâņ muhuc jupo i mupe fârinehec efâreocmu; papia keczi-rec maņnao dâņ qâreņke-fâreki-cne fokac, ine Jeremiazi ņicne ņicne findaņdâņ-jeņic muwec i hâcne. ¹⁴ Eme jaņe iņuc jaha ņicguru kâcqene â ņicwofuņ feki-cne jaņere kiņaņ qaqa erâ junzepieņ, ehame juju â eebapa-jeņicte furine jarepemu.”

Wofuņte kimbeņzi ņicne ņicne jaņere faio

feocmu

¹⁵ Wofuñ, Israere Anutu e ziñuc hâcne nazawec: “Go menaneonec waiñ râqâc kimbenzi fusekicne zi rorâ ñicne ñicne jañerao sorecgupe rarâ ejaretec nânzepien. ¹⁶ Eme jañe nârâ biric boroc epie mupe ñonden-jeñicko zika fuame honerâ mañsifuc ejarezejec.”

¹⁷ Inuc mume Wofunje meonec râqâc rorâ Wofunzi ñicne ñicne jañerao sorecnuwec sâc rarâ ejarepe nâmbiñ. ¹⁸ Ine Jerusalem hae â Juda mârenko hae ñerawec sâc erâ ñicwofunfâc-jeñic â fekicnefâc-jeñic jañe hâcne. Hae izi sesuctac â niniñ siareren fuarâ foocte, erâ ñic gâcnezi mu ruruc ejarehuc sâwecdâñ muraniñte inuc ejarepo; eme damen zi inuc hâcne fuawec fokac. ¹⁹ Erâ ñic keczi jañe mâmâc gumec-jopape nâmbiñ: Aigita ñicwofun Farao â kiñañ qaqañ-ticne â fekicnefâc-ticne erâ ñicfâc-ticne sasawa. ²⁰ Erâ ñonden-jeñicko ñic sañac hawari fuñne fuñne juñgopien jañe; erâ Uzi mârenje ñicwofun sasawa â Filisa mârenje ñicwofun sasawa, ine Asikalon â Gaza â Ekoron erâ Asidode mâren nâfocne irec ñicwofun jañe hâcne. ²¹ Erâ Edom â Moabi â Amon mâren rune jañe. ²² Erâ Tirore ñicwofun sasawa â Sidonje ñicwofun sasawa, erâ hâwec ocniñuc hâwecmecko ñicwofun juranropien jañe. ²³ Erâ Dedan â Tema â Buzi irec rune â qizec susuc-jeñic naki ñifec â ñifec bâtâcneñgopien jañe. ²⁴ Erâ Arabia mâren irec ñicwofun sasawa, â ñic sañac hawari fuñne fuñne mâren sawao juranropien jañere ñicwofun sasawa. ²⁵ Erâ Zimiri irec ñicwofun sasawa, â Elamte ñicwofun sasawa

erâ Mede mârenṭe ṅicwofuṅ sasawa. ²⁶ Erâ faic mârenṭe ṅicwofuṅ bembenḱo me zoricko juṅgopienṅ sasawa, ine hâcne mârenṭe faio ṅic gurune gurune ṅicwofuṅ-ṅeṅichec sasawa; mâc Babe ṅicwofuṅ eki ine gâcne nâfârepie zâhec nâzejec.

²⁷ “Go iṅuc ejarehuc jazazemec: ‘Anutu Tâpiri Quṅqasaṅ Wofuṅ, Israere Anutu e ziṅuc mukac: Nâku maṅsifuc eṅareme maṅunzepienṅ, erâ waha ṅopame mocwâc mi faharenzepienṅ; no ṅondenṅ-ṅeṅicko zika bâfuapemu irec erâ iṅuc enzepienṅ.’

²⁸ “Jaṅe ine megaonec râqâc rorâ nâninṭe qikinṅeniṅmuo ine jazazemec, ‘Anutu Tâpiri Quṅqasaṅ Wofuṅ e ziṅuc mukac: ṅoṅe nâjâmbânḱenzepienṅ! ²⁹ Manaṅgopienṅ, hae nore zâṅe rowec erao hâcne fuṅkerâ zârâ hâriṅ bâfuakopac, ehame bâbâtiṅzi ṅoṅe wemocko ṅowaruzac! No mârenṅ ṅecjucfâc-ticne zenḱoma zika bâfua-jarepemu i ṅoṅe wâc mi ṅowaruocmu, Anutu Tâpiri Quṅqasaṅ Wofuṅ nore dâṅ iṅuc.’

Wofuṅzi ṅicne ṅicne jaṅere dâṅ mutaraocmu

³⁰ “Irec go jaṅere findaṅdâṅ kecziṅuc muhuc jaza-fârezemec:

‘Wofuṅ owa-ticnere fânânṅzi faickonec wahaocmu,

â tiri ufuṅ-ticnaonec marac fânânṅ-ticne fuame mananiṅmu.

E owa kâcḱene owackeme ṅeṅe hae-ticne sâcḱe-fâreocmu,

ehame waiṅ hândâṅne âte pisickehuc aṅara heeṅgopienṅ

irec sâc mâreŋ ɲecjuçfâc-ticne sasawa râsi
ejarehuc aŋara heocmu.

31 Eme irec fânâŋ i mâreŋ qaŋeŋnao ra fisiocmu.
Wofuŋ e ɲicne ɲicne dânko râec-joparâ
jaŋerao dânɣie bahuc kiŋhec jaŋe mutara-jareme
zikare biŋe eniŋmu. Wofuŋte dân iŋuc.'

32 “Anutu Tâpiri Qunqasaŋ Wofuŋ e dân
keczinuc mukac:
Jei, wiac hâhâwicnezi ɲicne ɲicne fua-jare
raocmu,
â mânâŋ qicwânzâŋnehec moczi mâreŋ
qaŋeŋnaonec fuarâ fisiocmu.

33 “Wofuŋzi qâhâmoc-jopaocmu jaŋe zoaŋ
dameŋ ira mâreŋ qaŋeŋne ɲifeckonec fuŋkerâ
foware raku ɲifecko fotaraniŋmu; jaŋere erâ ki
mamakuc moc mi fuaocmu, erâ ro nusec ejarerâ
duducjopa i wâc mi fuaocmu, aricne, jaŋe mâreŋ
faio jawa iŋucne fohuc mâreŋte guec enzepieŋ.

34 “Lama soŋaŋ ɲoŋe kio huse erâ owackeniŋ,
lama rune ɲoŋe zafeo rândiŋke qarâ risim-
biŋe qaniŋ;
qa hezuc eŋarezare dameŋ maiccekac hâcne,
henzaŋ-ɲopapie kuzi furi sâko waha
qanzaŋneekac
irec sâc enzepieŋ.

35 Iŋuc fuame lama soŋaŋ jaŋe dapeŋ
basa-bipieniŋmu,
â rune jaŋe wiseniŋte eipieniŋmu.

36 Mananiŋ! Lama soŋaŋ jaŋere kio owa
â rune jaŋere ki uu fuakac,

- i Wofuņzi kecqaņ gie-jeņic sipirickekacte
³⁷ â sapa biaņne i Wofuņ kimbeņ-ticnere
 zocbâruņte erâ imackekicnere.
³⁸ E laioņ iņucne kâte uupic-ticnaonec wefuwec;
 eme mâreņ-jeņic i zika sisipiric-ticnehecte
 â kimbeņ-ticnere zocbâruņte tuhutac fuawec
 fokac.”

26

Jeremia qâhâmoniņte mumbiņ

¹ Juda iņiwofuņ Jojakim, Josiare iņokâ hâcne, e iņiwofuņ gie-ticne fuņkeha Jeremiarao Wofuņtaonec dâņ ziņuc fuawec: ² “Wofuņ e kecziņuc mukac: Go Wofuņ nore taha ufuņte hae zoņao ferâ domazemec. Ehuc Judare hae sâko iņerakac irecnec iņic taha ufuņ-naneo fodape-nareniņte fișiņgopieņ jaņe dâņ jazacmurâ mutâcne-garepo sâc jazazemec. Ehuc dâņ moc mi hesoņkezemec. ³ Eme jaņe manarâ maņjeņic bârisiehuc hata-jeņic hehesicne behe-fâreneiņmu mecne, eme no busâqoc mana-jarehuc maņnane risieme eebapa-jeņic sâqocnere erâ wiac hâhâwicne fua-jareocte mupo i aka hecnepe fozejec. ⁴ Goki ine jazac, ‘Wofuņzi ziņuc mukac: Noņe dâņnane qikiņnehuc sâcmutâc dâņ iņarepo i mana rereņ mi eniņmuo, ⁵ ehuc kiņaņiņicfâc-nane, porofete hâcne, dameņ sâc iņoņerao sorec-jopaekopac jaņere dâņ mananiņte takic-iņopaocmuo ⁶ ine Silo hae ecnepo sâc ijaha ufuņ zi ecnepemu, erâ mupe mâreņte faio iņicne iņicne jaņe hae zirec sâwecdâņ muranzepieņ.’ ”

⁷ Eme taha bapa â porofete â ñic ñokac gâcne sâko jañe Jeremiãzi dâñ i Wofunje taha ufunjo muhame manambin. ⁸ Eme Jeremia e Wofunzi ñic ñokac sasawa dâñ jazaocce mutâcnecewec sâc i mutarame izia taha bapa â porofete erâ ñic ñokac gâcne sâko jañe e rorâ mumbin: “Go hâmo-jâmbânkezemec.” ⁹ Erâ mumbin, “Go Wofunje zâñeo âke hotahuc wemocte findandân zinjuc mumec: “Taha ufun zi i Silo hae wiac fuacnewec injucnea fuacnezejec, â hae zi ima bapie sesutac luarâ fozejec?” Injuc murâ ñic ñokac zengoma jañe Wofunje taha ufunjo qâturerâ Jeremia râsi ecnembin.

¹⁰ Eme Judañic fekiecne jañe wiac irec binje manarâ ñicwofunje fickonec waharâ Wofunje taha ufunjo ferâ Motâc Qârio waha ñembin. ¹¹ Ehame taha bapa â porofete jañe ñic fekiecne â ñic ñokac sasawa zinjuc jazambin, “Ñic keci e zikare binje ekac, i ñoñe ñañac hazec-ñejiczi manahapie hae zi râsi ecnehuc findandân muwec irec.”

¹² Jeremia eki ine ñic fekiecne sasawa â ñic ñokac gâcne sâko zinjuc jaza-fârewec: “Wofun e jahac ufun â hae sâko zi irec findandân hazec-ñejiczi manambin i mufuapemurâ sorecnuwec. ¹³ Irece zi juju â eebapa bianje bâfuaniñ, ehuc Wofun Anutu-ñejic ere mumutâc dâñ mana reren enin; eme wiac hâhâwicne fua-ñareocce muwec i busâqoc manahuc mañne risieme aka hecneme fozejec. ¹⁴ No nahac ine meñejicko fepac domakopac zi, irec ñoñe manapie biankekac me sâckekac irec sâcko wiac enarenin. ¹⁵ Zinjuc ine mana-jâmbânkenzepien: Qâhâmocnuniñmuo

ine ñic bahacmâc nore soczi ñoñere faio â hae sâko zi erâ ñecjucfâc-ticne jañere faio feocmu, i Wofunzi dân keci sasawa hahanne bahuc mu-fua-ñarepemurâ sorecnuwec irec.”

¹⁶ Jeremiazi inuc mume ñic fekicne â ñic ñokac zenngoma jañe taha bapa â porofete zinuc jazam-biñ: “Ñic keczi e zikare biñe aricne, e Wofun Anutu-nâñecte micte dân nâzâjec hâcne.”

¹⁷ Eme mâreñ irec soñañ kâcçene gâcne jañe faharerâ ñic ñokac tumañnemiñ zinuc jazam-biñ: ¹⁸ “Juda ñicwofun Hisikia juwec damen ira Morese haeonec ñic moc zâñene Mika, e porofete fua taniñkerâ Juda ñic ñokac jaza-fârewec, ‘Anutu Tâpiri Qunqasan Wofunzi mukac:

Zion tiki i nânâ gie inucne hec hetikic eniñmu,
â Jerusalem hae i ima bapie sesutac foha
taha ufunte tikio kâte uupic fuazejec.’

¹⁹ Inuc jazame Juda ñicwofun Hisikia â Judanic jañe e moc qâhâmombiñ me? Aricne, jañe Wofunte hâwic-jopaha mu huachuc ecnemiñ. Eme Wofun e busâqoc mana-jarehuc mañne risieme sisipiric wiac fua-jareocte muwec i aka hecneme fowec. Nâñac wiac hâhâwicne sâko fai-nâñecko feocte giene bazo engopenen hâcne.”

Porofete Uria qâhâmokicne

²⁰ Eme ñic moc juwec zâñene Uria, Sema-jare ñokâ, Kiriati-Jearim haeonec, eki inuc jaha Wofunte zâñeo âke hotahuc findañdân muwec. Ehuc Jeremiazi ewec irec sâc jaha hae â mâreñ zirec findañdân muwec hâcne.

²¹ Eme ñicwofun Jojakim â zikanic erâ fekicnefâc-ticne jañe dânñicne manapie mi sâckeme

ņicwofuņzi qâhâmoocte muwec. Uria eki ine irec biņe manarâ hâwickeme Aigita mâreņko wisewec. ²² Iņuc eme ñicwofuņ Jojakimzi Akaborore ñokâ Elenataņ erâ ñic gâcne ehac mâmâc raniņte Aigita mâreņko sorec-jopawec. ²³ Eme jaņe Uria rorâ Aigita mâreņkonec jowa warerâ ñicwofuņ Jojakimtao râembiņ; eki ine zikazi qâhâmorâ qâņqâņ-ticne ñic ñokac omane jaņere zâņeruņ gieu beheniņte muwec.

²⁴ Safaņte ñokâ Ahikam eki ine Jeremia e ñic ñokac jaņere meo feme qâhâmוןziņte ñezickewec.

27

Kionte dân

¹ Juda ñicwofuņ Zedekia, Josiare ñokâ hâcne, e ñicwofuņ gie-ticne fuņkerâ juhame Jeremiarao Wofuņtaonec dân kecziņuc fuawec: ² Wofuņzi kecziņuc nazawec: “Go muc â kion wiac bâfuarâ upegao râezemec. ³ Erâ Jerusalem haeo kiņaņ fisirâ Juda ñicwofuņ Zedekiarao fuambiņ jaņe ñicwofuņfâc-ņeņic kecziņuc i jaņere dân jaretec baranzepiņ: Edom ñicwofuņ, Moabi ñicwofuņ, Amon ñicwofuņ, Tiro ñicwofuņ â Sidon ñicwofuņ. ⁴ Erâ bombonfâc-ņeņic dân kecziņuc jazaniņte mujarezemec: ‘Anutu Tâpiri Quņqasaņ Wofuņ, Israere Anutu eki ziņuc mukac: Ñoņe bombonfâc-ņeņic kecziņuc jazanzepiņ: ⁵ “Mâreņ mecne, erâ mâreņte faio ñic â qowi juranņopieņ jaņe mecne i noni hâcne menane sicnehuc tâpiri sâko-nanezi bâfuac-jopapo, irec e me e râcnezo murâ râcnepemu. ⁶ Zi ine mâreņ

i sasawa kiñaŋ qaqa-nane Nebukaneza, Babe ɲicwofuŋ hâcne, ere meo râepe fokac, ehuc kâte qowi jaŋe wâc kiñaŋ qacneniŋte mujarepo. ⁷ Ɲicne ɲicne jaŋe e ɲokâ-ticne erâ ɲosa-ticnere kiñaŋ qahuc ju fekupie e jahacne mâreŋ-ticnere damenŋ maickezejec wâc; maickeme ɲicguru kâcqene â ɲicwofuŋ tâpirihec jaŋe rauckepie kiñaŋ qaqa-jeŋic ezejec.

⁸ “ ‘ “Ɲicguru moc ɲicwofuŋ-jeŋichec kiñaŋ qacneniŋte qikiŋneniŋmu me Babe ɲicwofuŋte tagi mi deniŋmu jaŋe zikazi me roroczi me huc hâmoczi bâtiŋ-jopa raku Babe ɲicwofuŋ ecnepe bâsirowec-jopa-fârezejec; Wofuŋ nore dâŋ iŋuc. ⁹ Irec porofete me findaŋdâŋ omane mumu me guŋ fuŋne mamana me mâsi bapare fuŋne mamana me qaŋgec bapa jaŋe dâŋ ziŋuc ɲazapie mi mananzepien: ‘Ɲoŋe Babe ɲicwofuŋ ere kiñaŋ qaqa moc mi jujâmbânkeniŋmu.’ ¹⁰ Jaŋe mâreŋ-ɲeŋickonec jâpec-ɲopaninŋte â noni bātâtiec-ɲopape sipirickeniŋte findaŋdâŋ burecne ɲazaenŋgopien. ¹¹ Ɲicguru moc Babe ɲicwofuŋ tagi-ticne dehuc kiñaŋ qacneniŋmu jaŋe ine mana-jarepe mâreŋ-jeŋickoa gie he sarac ehuc ɲec ju c enzepien, Wofuŋ nore dâŋ iŋuc.” ’ ”

¹² Juda ɲicwofuŋ Zedekia e ine ziŋuc muhuc dâŋ ijaha âzâcnepo: “Ɲoŋe Babe ɲicwofuŋ tagi-ticne dehuc e jahacne â ɲicfâc-ticne jaŋere kiñaŋ qahuc mi sipirickerâ sâcne juniŋmu. ¹³ Ɲicguru moc Babe ɲicwofuŋ kiñaŋ mi qacneniŋmu jaŋe sipirickeniŋte Wofuŋzi muwec. Eme go â ɲicfâcge ɲoŋe wemocte dâŋ i mana-bipierâ

zika â roroc â huc hâmoczi ñopame hâmoniñte muñgopien me? ¹⁴ ‘Ñone Babe ñicwofuñ ere kiñañ mi gajâmbâñkeniñmu’, porofete inuc ñazaenñgopien jañere dân mi mananzepien, jañe findañdâñ burecne ñazaenñgopien hâcne. ¹⁵ Wofuñte dân zinuñ: No jañe mi sorec-jopapo, aricne, jañe nore zâñeo âke hotahuc findañdâñ burecne ñazaenñgopien i beheç-ñopape ñone mecne â porofete findañdâñ ñazaenñgopien jañe mecne mâmâc sipirickeniñte inuc eenñgopien.”

Jeremiazi taha bapa â ñic ñokac unñdâñ jazakac

¹⁶ Eme no taha bapa â ñic ñokac zi sasawa zinuñ jazapo, “Wofuñzi kecziñuc mukac: Porofetefâc-ñeñic findañdâñ kecziñuc ñazaenñgopien jañere dân mi mananzepien, ‘Manañgopien, Wofuñ taha ufuñ-ticnere râqâc wiac i damen mi zoraha Babe haeonec risie wareocmu,’ findañdâñ i burec ehuc ñazaenñgopien hâcne. ¹⁷ Ñone dânñeñic mi manahuc Babe ñicwofuñ kiñañ qacnenzepien, inuc erâ sâcne juniñmu; hae zi wemocte sesutac luarâ foocte muñgopien? ¹⁸ Jañe porofete fârine moc juñgopienko â Wofuñ nore dân fojarekacko ine Anutu Tâpiri Quñqasañ Wofuñ no mu wâwâsic enarepie mupe nore taha ufuñko mecne, Juda ñicwofuñte fîcko mecne â Jerusalem haeo mecne râqâc wiac nâfocne fokac i Babe haeo mi baranzepien. ¹⁹ Anutu Tâpiri Quñqasañ Wofuñ no wâtuñ mecne, râqâc sâko â ñeñe wiac-ticne mecne, erâ taha ufuñte wâcwiac zanzañne hae zira fokac, irec dân mukopac. ²⁰ Babe ñicwofuñ Nebukaneza e Jojakimte ñokâ, Judare ñicwofuñ Jekonia erâ Judare â Jerusalemte

ņic fekicne sasawa Jerusalem haeonec Babe haeo bacjopa rawec damenĭ ira beheme fowec. ²¹ Irec Anutu Tâpiri Qunqasaņ Wofuņ, Israere Anutu no taha ufuņko â Juda ņicwofuņ ere ficko erâ Jerusalem haeo râqâc wiac zanzaņne fokac irec ziņuc mukopac hâcne: ²² Wiac i Babe haeo baranzepieņ, eme ira foha juku damenĭ moc maickeme no irec manasurâ mupe hae mâreņ zira mocwâc risiezejec, Wofuņ nore dâņ iņuc.”

28

Hananiazi findaņdâņ burecne muwec

¹ Eme jara damenĭ ijaha, Juda ņicwofuņ Zedekia e gie-ticne fuņkerâ bahuc juhame mosa 4 tarame Azurure ņokâ, porofete Hanania e Gibeoņ haeoneczi Wofuņte ufuņko taha bapa â ņic ņokac sasawa jaņere maio dâņ ziņuc nazawec: ² “Anutu Tâpiri Qunqasaņ Wofuņ, Israere Anutu eki ziņuc mukac: No Babe ņicwofuņ e tagi-ticne fai-ņeņjicko râewec i ņowac ro behepemu. ³ Jara jajahec mi taraha Babe ņicwofuņ Nebukaneza e Wofuņte ufuņkonec râqâc wiac hae zirecne Babe haeo barawec i mupe zira mocwâc risie warezejec. ⁴ Erâ i sawa mâcne, Jojakimte ņokâ Juda ņicwofuņ Jekonia e â Juda mâreņkoneo ņic Babe haeo bacjopa rakicne sasawa jaņe wâc mâmâc jowac-jopape hae mâreņ zira risie-fâreņiņmu, no Babe ņicwofuņ e tagi-ticne fai-ņeņjicko râewec i ņowac ro behec epemu hâcne, Wofuņ nore dâņ iņuc.”

⁵ Eme porofete Jeremia e porofete Hanania â taha bapa erâ ņic ņokac sasawa Wofuņte ufuņko

domambin jañere maio dân âzâcnewec. ⁶ Ehuc muwec: “Jâmbomac, Wofun e inuc ezejec! Go findandân mume irec fârine Wofunzi bâfuazejec, ehuc mume ufun-ticnere râqâc wiac mecne â kâpâcwâru ñic sasawa mecne Babe haeonec zira risie warezepien. ⁷ Mâc gore maio â ñic ñokac sasawa jañere maio dân kecziñuc mufuape man-azemec: ⁸ Porofete gâcne, go â no nâhâc mi fuarâ juhapere mâmâc jaha funkerâ juwefumbin jañe mâren bocjaha â ñicguru sâko ñicwofunhec jañere findandân muhuc zikare â rorocte â huc hâmocte dân mumbin. ⁹ Wamare findandân muhuc jukac porofete e jâmbomac Wofunzi soreme mukac me weninuc, irec fune i findan-ticnere fârine fuame sawa mana tarazo.”

¹⁰ Eme porofete Hanania e Jeremia kion-ticne upenaonec jâoc rorâ qazuwec. ¹¹ Qazurâ ñic ñokac sasawa jañere maio kecziñuc muwec: “Wofunzi ziñuc mukac: Jara jajahec mi taraha ine Babe ñicwofun Nebukaneza ere tagi ñicne ñicne jañere faio fokac i jowac ro behec epemu.” Jeremia eki ine mâc behec-joparâ rawec.

¹² Eme porofete Hanania e Jeremia kion-ticne upenaonec jâoc rorâ qazuwec, damen irec faicnao Wofunte dân Jeremiarao kecziñuc fuawec: ¹³ “Go rarâ Hanania âzâcne, ‘Wofunzi ziñuc mukac: Go kion jâczi bakicne qazu behec emen, noni ine irec okacne aenzi kion i bâfuapemu. ¹⁴ Anutu Tâpiri Qunqasañ Wofun, Israere Anutu no ziñuc mukopac hâcne: No ñicne ñicne zi sasawa jañere faio aen tagi râepe feocmu, eme Babe ñicwofun Nebukaneza ere kinan qahuc

junzepien; erâ jañe sawa mâcne, kâte qowi jañe wâc ere meo qikin-jopakopac.’ ” ¹⁵ Eme porofete Jeremia e Hanania zinjuc âzâcnewec: “Hanania, go manac, Wofuñ e go mi sorecguwec, go ine ñic ñokac keci jañe eatuc-jopatec burecko roweck-eeñgopien. ¹⁶⁻¹⁷ Irec Wofuñzi zinjuc mukac: ‘Manakic, no mâreñkonec bârâriecgupemu, go dâñgezi qafen-jopatec Wofuñ no râsi enarembinte jara zijaha hâmozemec.’ ” Eme porofete Hanania e jara ijaha mosa namba 7 ira hâmwec.

29

Jeremia e ñic kâpâcwâruo jumbin jañere papia qâreñkewec

¹ Porofete Jeremia e Jerusalem haeo ñehuc soñañ micne kâpâcwâru bacjopa rakicne irec zanzañe erâ taha bapa â porofete â ñic ñokac sasawa, Nebukanezazi Jerusalem haeonec Babe haeo bacjopa rawec jañe papiarae-jarewec irec dâñ zine hâcne. ² Ine ñicwofuñ Jekonia â neñgoc-ticne mecne, kiñañ qaqañcne erâ Juda mâreñkonec â Jerusalem haeonec ñic fekiñe jañe mecne, erâ fic bapa â aenji wiac bapa ñic jañe mâmâc Jerusalem haeonec bacjopa rakicne, damen irec faicnao papia râeme rawec. ³ Papia i Safañte ñokâ Elasa â Hilikiare ñokâ Gemaria jahe ñicwofuñ Zedekia eki Babe haeo ñicwofuñ Nebukaneza erao sorec-jofame barapic. ⁴ Papiare dâñ ine kecziñuc: “Anutu Tâpiri Çuñqasan Wofuñ, Israere Anutu e Jerusalem haeonec Babe haeo bacjopa rakicne jañe zinjuc jaza-fârekac: ⁵ ‘Ñoñe

fic barâ maṅnao juju fofu enzepien, erâ nânâ gie bâra fârine fuame nânzepien! ⁶ Nõje ñokac rocjoparâ motec bâfuac-jopanzepien, erâ ñokâfâc-ñenjik ñokac jarenzepien â otâfâc-ñenjik ñicko râec-jopanzepien; eme jañe naru motec rocjopapie ñõje mâren ira fua sawec epie zare-ñenjik mi wahazejec. ⁷ Nõje hae mâren jowac-ñopa rapo ira wama foocte giene banzepien, erâ hae mâren irec erâ Wofuñ no numu-narenzepien; mâren ira wama foha ñõje wama faio jaha juhâmoniñmu hâcne. ⁸ Anutu Tâpiri Çuñqasañ Wofuñ, Israere Anutu no zĩñuc mukopac: Porofete me findañdâñ mumufâc-ñenjik ñonden-ñenjik juengopien jañe eatuc-ñopazo epie mi mana-jarenzepien, ehuc guñ manaengopienzi irec dâñ mupie hazec mi râenzepien wâc. ⁹ Jañe nore zâñeo âke hotahuc findañdâñ ñazapie burec eekac hâcne, no jañe moc mi sorec-jopapo, Wofuñ nore dâñ inuc.’”

¹⁰ Wofuñ e kecziñuc mukac: “Babe hae jara damen 70 taracneme iqic-ñopapemu. Eme mumupañ dâñ biane fokac i fârinehec eocte hae mâren zira jowac-ñopape risie wareniñmu. ¹¹ No ñõjere dâñ weniñuc mana biric eekopac i mana-jâmbânkekopac, wamare dâñ hâcne, sisipiricte dâñ aricne; ine juju worickehuc juengopien i ñarepemurâ inuc eekopac, Wofuñ nore dâñ inuc. ¹² Eme ñõje wira wâwâsic enarepie mana-ñarepemu. ¹³ Nõje wira basac enareku bâfuacnuniñmu ine mañ hâcbuc jaha wira basac enarepie ¹⁴ mana-ñarepe bâfuacnuniñmu hâcne. Eme no kâpâcwâruonec

batarac-ɲopahuc mâreɲ sâc ɲicne ɲicne jaɲere ɲondenko bâtâtiéc-ɲopapo irecnec ro nusec eɲarerâ jowac-ɲopape hae mâreɲ beherâ raniɲte mupo ijaha mocwâc risie warezepieɲ. Wofuɲ nore dâɲ iɲuc.”

Porofete burecne jajahec jahere dâɲ

¹⁵ “Nɲone ine muɲgopieɲ, ‘Wofuɲ e Babe haeo porofete bâfuac-jopame junâreɲgopieɲ.’
¹⁶ Mananɲgopieɲ, Wofuɲ e ɲicwofuɲ Dawidire eri ɲeɲeo ɲekac ere dâɲ mecne, â ɲic ɲokac hae zirec maɲnao jufâreɲgopieɲ, qomâfâc-ɲeɲic kâpâcwâruo mi bacjopa rakicne, jaɲere dâɲ mâmâc bajukac. ¹⁷ Anutu Tâpiri Qunqasan Wofuɲ e ziɲuc mukac: ‘Jâmbomac, no mupe zika â nânâre hâhâmo erâ huc hâmoc fua-jarezejec, ehame jâmbô hândâɲne sâqorekicne ɲiczi mocwâc mi nânâne irec sâc enzepieɲ. ¹⁸ Eme zika â roroc erâ huc hâmoc izi jâpec-jopame mâreɲte ɲicguru sasawazi honec-joparâ hâwic-jopaocmu; ɲicne ɲicne ɲonden-jeɲicko bâtâtiéc-jopapo jaɲe jaɲerao sâc hehuc sâwecdâɲ munɲmu â bipic tatara ejareocmu, ehame mu ruruc â mu âkebic ejarenɲmu. ¹⁹ I dâɲnane mana rereɲ moc mi embiɲte iɲuc fua-jareocmu, Wofuɲ nore dâɲ iɲuc. No dameɲ sâc kiɲaɲɲicfâc-nane, porofete hâcne, ɲoɲerao sorec-jopape fâmbiɲ, ɲone ine sifu mi manambiɲ, Wofuɲ nore dâɲ iɲuc. ²⁰ Kâpâcwâru ɲic mupe Jerusalemkonec Babe haeo bacjopa rakicne ɲone sasawa Wofuɲ nore dâɲ mananzeɲieɲ.’

²¹ “Kolajare ɲokâ Ahaba erâ Masejare ɲokâ Zedekia jahe Anutu Tâpiri Qunqasan

Wofuñ ere zâñeo âke hotahuc findañdâñ burecne ñazaekopirecte Israere Anutuzi jahere ziñuc mukac: Manañgopien, no Babe ñicwofuñ Nebukaneza ere meo râec-jofape zâñe fai-ñejicko qâhâmoc-jofazejec. ²² Eme Judare ñicfâc sasawa Babe haeo bacjopa rakicne jañe jahere qâqin qahuc sâwecdâñ kecziñuc muhuc juniñmu: ‘Wofuñzi mume Zedekia â Ahaba fua-jactewec sâc ijaha go fua-garezejec, jahe Babe ñicwofuñzi zocko rikec-jofame hâmpic hâcne.’ ²³ Jahe Israe ñondenko sindañ ehuc âgofâc-jekic jañere ñokac jañehec boe sau ejupirec, ehuc no mi mutâcne-jactehape nore zâñeo âke hotahuc burecdâñ muromacke jupirec. No i manakopaczi mutaniñkekopac, Wofuñ nore dâñ iñuc.”

²⁴ Semaja Nehelam haonec e ine ziñuc âzâcnezemec: ²⁵ “Anutu Tâpiri Qunqasañ Wofuñ, Israere Anutu eki kecziñuc mukac: Go gahacne mañte Jerusalemte ñic ñokac sasawa â Masejare ñokâ, taha bapa Zefania hâcne, erâ taha bapa sasawa jañerao papia kecziñuc râetec rawec: ²⁶ ‘Wofuñ e taha bapa Jojada ere okacne taha bapa râecguwec, i Wofuñte ufuñko manjenic sifuckekicnezi findañdâñ burecne muñgopien jañere rucjari bahuc jâc fifitacko â aen niñginjo râec-jopacmurâ iñuc ewec. ²⁷ Eme zi wemocte Anatoti haonec Jeremiazi ñoñerao findañdâñ muhuc juekac e aka mi hecnekomec? ²⁸ Eki hâcne papia moc kecziñuc râe-nâreme Babe haeo ware fisiwec i: “Kâpâcwâru damen-ñejic i zoricne fokac, irec fic barâ mañnao juju fofu

enzepien, erâ nânâ gie bapie fârine fuame nâhuc junzepien.” ’ ”

²⁹ Taha bapa Zefania eki ine papia porofete Jeremia wosecnewec. ³⁰ Eme Wofunṭe dâṅ Jeremiarao kecziṅuc fuawec: ³¹ “Kâpâcwâru ṅic sasawa dâṅ ziṅuc râe-jaretec razejec, ‘Wofun e Nehelam hae rune Semaja ere dâṅ ziṅuc mukac: Semaja e mi sorehape findaṅdâṅ ṅazahuc bu-recdâṅko roweckeniṅte eatuc-ṅopawec. ³² Irec Wofun no ziṅuc mukopac: Manaṅgopien, no Nehelam rune Semaja â qâricfâc-ticne jaṅe irec okacne bazu-jarepemu. Qaricfâcne jaṅeraonec moczi ṅicguru zi jaṅere ṅondenko moc mi juzejec, ehuc ṅicfâc-nane jujuhâmo bâfua-jarepemu i wâc mi honezejec, e ṅic jaṅe Wofun no râsi enareninṅte mu qafeṅ ejarewec irec. Wofun nore dâṅ iṅuc.’ ”

30

Kâpâcwâruonec risieninṅte mupaṅke-jarekicne

- ¹ Wofunṭaonec dâṅ Jeremiarao fuawec i ziṅuc:
² Wofun, Israere Anutu e kecziṅuc mukac: “No dâṅ gazapo sâc i papia mocko qârenṅke-fârezemec.
³ Manakic, dameṅ moc maikeocmu ira Israe â Juda ṅicfâc-nane jaṅe kâpâcwâruonec batarac-joparâ ine mimiṅnefâc-jeṅic mârenṅ jarepo ira bârisiec-jopape rauckenzepien. Wofun nore dâṅ iṅuc.”
⁴ Wofun e Israere â Judare dâṅ muwec i kecziṅuc:
⁵ “Hâhâwicte erâ kio owa fuame manakopac, wama aricne, bipic tatara sawa fokac.
⁶ Mu wioc erâ honeniṅ, ṅiczi motec rocjopazo eṅgopien me weniṅuc?”

No wemocte ñic sasawa jañe ñokac gozi
 kicjopame eenjopien
 inuc ehuc mejenic gâjon-jeñicko râehapie
 honec-jopaekopac,
 ehame zâñe mai-jeñic weañke-fârekac?

⁷ Jei, dameñ keci i dameñ hâhâwicne,
 inucne moc mi fowec,
 i Jakobore zârâ hâriñ dameñ hâcne;
 e ine sifu irecnec batarazo.”

⁸ Anutu Tâpiri Qunqasan Wofun ere dân
 zinuc: “Dameñ ira keczinuc fuaocmu: No tagi
 qawe-jeñickonec jowac ro behec erâ niñgin-jeñic
 hetâcnepemu, eme jañe ñic jabane jañere kinan
 mocwâc mi qanzepien. ⁹ Aricne, jañe Wofun
 Anutu-jeñic no mecne â ñicwofun-jeñic Daw-
 idi âkendâñne-jarepemu e mecne mâmâc kinan
 qanâctenzepien.

¹⁰ “Kinanñic-nane Jakobo go mi hâwicguzejec,
 â Israe go mi fâfârezemec.
 Manakic, no mâreñ zorickonec bataracgupemu,
 â qâricfâcge jañe kâpâcwâru
 mâreñ-jeñickonec bataracjopapemu.
 Eme Jakobozi mâreñ-ticnao risierâ sañac mâteñ
 ñezejec,
 erâ juhâc qâhâmoha moczi moc hâhâwic mi
 ecnezejec.
 Wofun nore dân inuc.

¹¹ No hâcne baficguzore gohec jupemu;
 ñicne ñicne ñonden-jeñicko bêtâtiecgupo jañe
 bâsirowec-jopapemu,
 go ine mi bâsirowecgupemu;

aricne, sâcge manahuc bâtingupemu,
wemocko akicguhuc mi bâtinguzapo.
Wofuņ nore dân iņuc.”

Israe e hehesic-ticnere erâ sipirickeocmu

- 12 Wofuņ e kecziņuc mukac hâcne:
“Sipiricgukicne i hâhâwicne
â wic fogarekac i mi bâbâsomiene.
- 13 Moczi moc dânge mi dopeckeocmu,
wicgere marasiņ i mi fokac,
â mocwâc qițic qacmu i wâc mi fokac.
- 14 Âgofâcge jaņe sasawa gore nikec-jopawec,
jaņe gore mu wioc mocwâc mi eenġopieņ;
i noni kiņ bahacge â hehesicge bocjahare
râsi egarehuc qa bâtiņ hâhâwicne egarepo
irec.
- 15 Go sipiricgukicne â zâicge mi oomaene,
irec wemocte boc owackekomec?
No kiņ bahacge â hehesicge bocjaha fokacte
wiac i egarepo hâcne.
- 16 Irec go qâcġumbiņ jaņe qâcġopa-fârezo wâc,
go sipiricġumbiņ sasawa jaņe kâpâcwârue
bacġopa razo wâc;
mafa wiacge gowac rombiņ jaņe wiac-jeņic jowac
rozo,
â wiac fiuc rombiņ sasawa jaņere wiac i
mupe
fiuc roniiņmu jaha.
- 17 No mocwâc bâpiaņguhuc wicge bâsomiepemu,
Wofuņ nore dân iņuc.
Jaņe gore ziņuc mumbiņte: ‘Qaisockekicne’,
erâ ‘Ziō hâcne hone suņġiņ ecnekicne.’ ”
- 18 Wofuņzi ziņuc mukac:

“Manangopien, no Jakobo qoruc boze-ticne
 nehâmoocte mocwâc heqârepemu,
 â jufofo hae-ticne busâqoc manacnepemu,
 ehame hae i me i ñeñetac-ticnao heqârehuc
 banzepien,
 â ñicwofuñ fic i mârâc ñeweckoa ñezejec.

19 Eme ira mumuten gae â mu gâgâwi irec fânân
 fuazejec;

no basawec-jopape zare-jeñic mi wahazejec,
 no zâñe biñe bâfua-jarepe
 moczi ro waha âte mocwâc mi ejazejec.

20 Naru motecfâc-jeñic jañe mârâc jaha jumbiñ
 sâc ijaha erâ junzepien,

â kikefunfâc-jeñic jañe nore maio qin herâ do-
 manzepien;
 bâbâzâicfâc-jeñic jañe ine sasawa
 bâtiñ-jopapemu.

21 Ñicbomboñ-jeñic e jañacne guruonec moc
 fuazejec,

â guriñ bapa-jeñic e jañacne ñondenjkonec
 jaha;

eme no manacnehape mai-naneo ware fuazejec,
 me mi manacnehape moczi moc juju-ticnere
 manabâc mi ehuc

nore maio kosa moc fuazac?

22 Eme ñoñe ñicfâc-nane juhapie

no Anutu-ñeñic juzepac. Wofuñ nore dân
 iñuc.”

23 Manangopien, Wofuñtaonec mânân
 qicwânzâñnehec,

kimben-ticne hâcne fuarâ warekac;

oorân mânân hâhâwicnezi

ȋc hehesicne jaŋere faio waha qaocmu.
 24 Eme Wofuŋ e gie-ticne mana biric ewec sâc
 i fârine bâfua-fâreme sawa kimbeŋ-ticnere
 zocbâruiŋzi hâpooocmu.
 Nõŋe irec fuŋne i dameŋ tataranao mana
 taraniŋmu.

31

Busâqocte okacne bubiaŋ fuaocmu

1 “No dameŋ ira hâcne Israere kikefuŋ birine
 birine jaŋere Anutu juhape jaŋe ȋcfâc-nane
 jufârenzepieŋ.” Wofuŋte dâŋ iŋuc.

2 Wofuŋzi kecziŋuc mukac:

“Israe ȋc jaŋe juju mana mâreŋ-jeŋicko raniŋte
 rambiŋ,
 dameŋ ira zikare micko mi fembiŋ,
 ȋc nâfocne i jaŋe mâreŋ sawao aki anonoc
 bâfuambiŋ.

3 Ehame Wofuŋ no taickonec ware fua-jarehuc
 mupo:

No maŋjauiŋ eŋarehuc jupozi jukopac,
 irec aki anonoc-nane moc mi
 sakare-ŋareekopac.

4 O ȋokac zeŋoŋ Israe! No bâqârecgupe
 faharerâ domazemec,
 go sahaŋge mocwâc erickezemec,
 ehuc gae woŋgâŋ eenŋopieŋ jaŋere birio
 huzemec.

5 Samaria tiki mâreŋko waiŋ gie mocwâc saraze-
 mec,
 eme saraniŋmuzi fârine fuame nânzepieŋ.

6 Eme zoaņ moc maickeocmu ira Eferaim tiki
 mârenko
 ruc bapa jaņere wiwira kecziņuc fuaocmu:
 ‘Ajoc, Wofuņ Anutu-nâņectao Zionko fe-
 naņ!’ ”

7 Wofuņ e kecziņuc mukac:
 “Jakobo zeri bubiaņ ecneniņ,
 â ñicne ñicne micne-jeņic kiwac qawac ec-
 nenin!

Hahaņne bahuc ziņuc muhuc mutenkeniņ,
 ‘Wofuņ e ñicfâcne jaņe bafic-jopawec,
 Israe ñic zanzaņne jaņe hâcne.’

8 Manaņgopien, no faic mârenkonec jowac-jopa
 wârepemu,
 â mâreņ qaņeņnaonec ro nusec ejarepemu,
 erâ ñonden-jeņicko tiņtuņ, kike demba, kiwechec
 â kogocheç juņgopien jaņe mâmâc;
 eme jaņe ñic guru sâkozi zira risie
 warezepien.

9 Jaņe kiohuc risieniņmu,
 eme noni bâmiriņ-jopahuc jowac-jopahape
 wâreniņmu;
 ehuc wâneņ hatao mi fâfâc-jopaha opâo
 fisinzepeņ;
 no Israe mamac ecnehuc jahape
 Eferaim e mârâc ñokâ-nane jukac hâcne.

10 “Ñicne ñicne ñoņe Wofuņ nore dâņ mananiņ,
 erâ nucne nucne taicko forakac ira mu-
 saweniņ:
 ‘Israe bâtâtiēc-jopapo no ro nusec erâ
 lama soņaņzi lamafâcne soņaņ-jopaekac

irec sâc hone mainj ejarepemu.’

11 Wofuņ no Jakobo firuepo,
ehuc tâpiri-ticne sirickehuc jukac
ere meonec batarapo hâcne.

12 Jaņe fisirâ Zion tikio zeri gae heninmu,
ehuc Wofuņ noraonec taha wiac kecziņucte
mana ziziweninmu:

Padi jacgoņ, wainj, wokemaņ, lama motecne â
bulimakao;
eme juju-jeņic i hoezi jufu gie bâgunuckeekac
irec sâc ehame nânâ opâre mocwâc mi
hâmoniņmu.

13 Inuc fuame ņokac zeņoņ jaņe gae wohuc bubian
mananiņmu,
erâ ņic socqâri â ņicqizec jaņe zeri eniņmu.
No ki mamakuc-jeņic hetikiepe zeri fuazejec,
â bâmiriņ-jopahuc busâqoc irec okacne bu-
bian qajarepemu.

14 No taha bapa mâriri tahac-jopape
bubian faio junzepieņ,
â ņicfâc-nane jaunj bacjopape gapec-jopazejec.
Wofuņ nore dâņ inuc.”

Rahezi qiefâcne jaņere kiokac

15 Wofuņzi kecziņuc mukac:

“Rama haeo ojowa, ki uu â mu mamakuc sâko
fuakac.

Rahezi qiefâcne jaņere kiokac;
qiefâcne jaņere erâ bâmiriņkeniņte eipiņgopiņ,
wiac omae-fârembiņte hâcne.”

16 Wofuņzi kecziņuc mukac:

“Go ojowa â ki uu behetec zâņeucge kereņkezejec;

manakic, zâic giegere furine i fokac,
Wofuŋ nore dân iŋuc.

Jaŋe râsi jaŋere mâreŋkonec risie
wareniŋmu.

17 Qâricfâcge jaŋe juju bianŋne fua-jareocmu,
â ñokâfâcge jaŋe mame sâko hae-jeŋicko
mocwâc risieniŋmu hâcne.

Wofuŋ nore dân iŋuc.

18 No Eferaimzi mu mamakuc ehuc mume man-
apo,

‘Go bâtiŋnumeŋ, eme no bulimakao rângeŋe
iŋucne

bâbâtiŋte fuŋne manapo.

Go Wofuŋ Anutu-nane jukicte risiepemurâ
mana-naretec maŋnane bârisiezepac.

19 No go behecgurâ busâqoc manapo,
ehuc fuŋne-nane mana tararâ mimiehuc
amec-nane bofacepo.

No qurutuarâ maŋnane omaekac,
no socqâri juhuc wiac miminehec bâfuapo
irec okacne fua-narekac hâcne.’

20 Eferaim e ñokâ bian-nane
â joroc-nane mi jukac me?

No râsi ecnehuc dânticne muekopac sâc
sifu ere mocwâc manasukopac hâcne;

irec maŋnanezi ere ecneekac,
no busâqoc manacnezore enarekac.

Wofuŋ nore dân iŋuc.

*Israe ñic jaŋe risiepie Anutuzi jam-
buŋ-jopaocmu*

21 “Go qânâzi ma âkendânŋehuc hatare wiac gâcne
râe razemec,

ehuc hata ramen i hone dendenec!
 Israe ñokac zeñon go risiec,
 hae wiacge ñerakac ira risie warezemec!

²² Israe ñokac zeñon, go râpecnumenzi
 wemocte manjahec boc ekomec?

Manakic, Wofun no mârenko mâsi qâricne moc
 bâfuapemu,
 ine ziñuc: Ñokaczi ñic ñezickehuc juocmu.”

²³ Anutu Tâpiri Qunqasan Wofun, Israere
 Anutu e kecziñuc mukac: “No kâpâcwâruonec
 batarac-jopapemu damen ira Juda mârenko â
 hae sâko-ticne ñerakacko dân ziñuc mocwâc mu-
 niñmu:

‘O tiñnere ñeñe hae â tiri tiki,
 Wofunzi jambunġujejec!’

²⁴ Eme Juda hae sâko-ticne sasawa jaje irec
 mañnao jufârenzepien, hesarac ñic â lama
 bulimakao bajuhuc mâren râreckeenġopien
 jaje mâmâc. ²⁵ No hâcne rokawekicne
 jaje gumeqin-jopapemu â betanġekicne jaje
 bâġunuc-jopape âke mâten-jopa-fârezejec.”

²⁶ Inuc nazahame ġunġonec qârerâ zâñe
 fitâcnepo, ehuc ġunġe anġac manapo.

3âzâfic qâricnere dân

²⁷ Wofunġe dân kecziñuc fokac: “Manakic,
 damen moc maickeocmu ira Israe kikefun
 â Juda kikefun jambun-jopape ñic mecne
 qowi mecne ukichec erâ fua sawec enzepien.

²⁸ Eme qâfiec-jopazore â heropiec-jopazore
 â sipiric-jopazore â bâsirowec-jopazore erâ
 bâzâic-jopazore ruc bajarehuc jupo irec sâc
 jaha heqârec-jopazore â sarac-jopazore hone

sonaṅ ejarehuc jupemu, Wofuṅ nore dâṅ iṅuc.

²⁹ Dameṅ ira ziṅuc mocwâc mi muniṅmu:

‘Mimiṅne jaṅe waiṅ hândâṅ zazacne nâjumbiente qâricfâc-jeṅic jaṅere micsiec ariweekac.’

³⁰ Aricne, ṅic sasawa jaṅe jaṅacne kiṅte erâ hâmoniṅmu, â waiṅ hândâṅ zazacne nâniṅmu sâc micsiec-jeṅic ariweocmu.”

³¹ Wofuṅ e kecziṅuc mukac: “Manaṅgopieṅ, dameṅ moc maickeocmu ira noni Israe kikefuṅ â Juda kikefuṅ jaṅehac zâzâfic qâricne moc bâfuapemu. ³² No mârâc jaha mimiṅnefâc-jeṅic Aigita mâreṅkonec jowac-jopapemurâ mejeṅicko rohuc jaṅehac zâzâfic epo, zâzâfic iṅucne mâcne.

Zâzâfic i rujeṅic no juipiehape sifu mana suac-nuhuc bâtâcnembiṅ, Wofuṅ nore dâṅ iṅuc.

³³ Eme dameṅ mukicne i maickeme Israe kikefuṅ jaṅehac zâzâfic epemu ine kecziṅuc: No sâcmutâc dâṅnane maṅjeṅicko râepe huocmu, erâ buhândâṅ-jeṅicko qâreṅkepe foocmu, eme no Anutu-jeṅic jupemu, â jaṅe kikefuṅfâc-nane juniṅmu. Wofuṅ nore dâṅ iṅuc. ³⁴ Eme ṅic

moczi moc âgofâcne me qomâfâcne jaṅehac ziṅuc muhuc qaqaṅu gie mocwâc mi baniṅmu: ‘Wofuṅte fuṅne mananiṅ!’ Mâcne, jaṅe waha-kicnezi mecne fekicnezi mecne mâmâc manacnu-fâreniṅmu. Fuṅne ziṅucte manacnuniṅmu: No kiṅjeṅic behe-jarepemu, ehuc sindaṅ-jeṅicte mocwâc mi manasupemu. Wofuṅ nore dâṅ iṅuc.”

³⁵ Zoanṅzi zoaṅ sâc tamaeocce muekac,

â mosa bâpiṅ ṅafe sâc tamaeniṅte mutâcne-jareekac,

â hâweczi qiriñ qame siri-ticne fânânkeocte
 muekac
 zâñe-ticne Anutu Tâpiri Qunqasañ Wofuñ
 eki hâcne ziñuc mukac:

³⁶ “Mumutâc sanañ i hâcne nore maio moc arictac
 eocmuo
 ine Israere qâricfâc jañe nore maio ñicguru
 moc buc erâ juju

i iñuc jaha arictac jâmbân eocmu.
 Wofuñ nore dân iñuc.”

³⁷ Wofuñzi ziñuc mukac:

“Faic sambânñte sâc bapane fome muzac
 me mârenñte hobetenñe duñ ira fokac

i mana gufuc eene ezac ine no Israe qâricfâcne
 jañe wiac ewefuhuc jumbiñ irec erâ wâc
 beheç-jopa-fârezapo.
 Wofuñ nore dân iñuc.”

³⁸ Wofuñzi ziñuc mukac: “Manañgopien,
 dameñ moc maickeocmu ira Wofuñ nore hae
 sâko i Hananele ere fic hân bafekicne irecneç
 fuñkerâ heqâre ware raku Tuteuruñ Motâc sâko
 domakac ira bataraniñmu. ³⁹⁻⁴⁰ Ehame sâc meda
 ine zuhuckerâ râepie dândânñe raku Garebe
 tikio fisizejec, erâ ira ñehasickerâ Goaopec
 razejec. Eme ñic qânqân â zafe wânenñ â hae
 mârenñ foraku Kidoroñ opâo mickekac erâ zoañ
 wewefunaopec Becâsic Motâc irec tuturuñko
 tarakac i sasawa Wofuñ nore biñe ehuc tiri
 fozejec. Eme sisipiric me ima bapa i ira mocwâc
 mi fua-jâmbânñkezejec.”

32

Jeremia e Anatoti haeo mâreŋ moc furine bawec

¹ Juda ƚicwofuŋ Zedekia e ƚicwofuŋ juha jara 10 ewec, â Nebukaneza e ƚicwofuŋ juha jara 18 eme Wofuŋtaonec dâŋ Jeremiarao fuawec zine hâcne. ² Dameŋ ira Babe ƚicwofuŋ momorifâc-ticne jaŋe Jerusalem hae somâ bambiŋ, ehame Jeremia e Juda ƚicwofuŋte hae zoŋao momori jaŋe soŋaŋ jumbiŋko kâpâcwâruo ƚewec. ³ Juda ƚicwofuŋ Zedekia eki ziŋuc muhuc kâpâcwâruo barâ ira râeme ƚewec hâcne: “Go wemocte findaŋdâŋ ziŋuc mumeŋ: ‘Wofuŋzi mukac: Manaŋgopieŋ, no hae zi Babe ƚicwofuŋ ere meo râepe rauckezec. ⁴ Eme Juda ƚicwofuŋ e Kaldea jaŋe sâcne mi wise-jareocmu, aricne, e Babe ƚicwofuŋ ere meo râepe fejâmbânkeocmu, eme jahe nazaŋ gazaŋ ehuc hohone ezepirec. ⁵ Eme e Zedekia Babe haeo baraocmu, ira juhame iqickezepac. Noŋe Kaldea ƚic jaŋehac zika qahuc sâcne mi sasaŋkeniŋmu. Wofuŋ nore dâŋ iŋuc.’ ”

⁶ Eme Jeremiazi muwec: “Wofuŋte dâŋ norao ziŋuc fuawec: ⁷ Manakic, mamac wârânge Salum ere ƚokâ Hanamelezi gorao fisirâ muocmu, ‘Go mâreŋ-nane Anatoti haeo fokac i furine bac; gore zâŋe bâbâni fokacte furine bacmurâ sâcmutâczi mana-garekac.’ ⁸ Eme Wofuŋzi muwec irec sâcko fuarâ mamac wârân-nanere ƚokâ Hanamele e momori jaŋere hae zoŋao fisirâ nazawec: ‘Benjamin mâreŋko Anatoti hae ira mâreŋ-nane fokac i furine bac; goki hâcne furine barâ rauckecmurâ sâmutâczi mana-garekac; gore biŋe eocte furine

bac me!’ Injuc mume mana tarapo: Wofunje dân ine hâcne.

⁹ “Eme no mamac wârânj-nanere ñokâ Hanamele eraonec Anatoti haeo mâreñ fowec i rorâ furine siliwa moneñ 17 râcnepo. ¹⁰ Ehuc furi bapare papia qâreñkerâ maqâreñ râerâ ñic gâcne ejarepe honehapie moneñ i woserâ râcnepo. ¹¹ Izi ine furi bapare papia basanañkekicne â mi basanañkekicne i mâmâc rocjofapo. ¹² Erâ mamac wârânj-nanere ñokâ Hanamele ere maio mecne â papiao zâñe-jeñic râembiñ ñic i jañere maio mecne, erâ Judañic gâcne momori jañere sacmañko ñefârembiñ jañere maio mâmâc Masejare ñosa, Neriare ñokâ Baruku e hâcne râcnepo. ¹³ Ehuc mai-jeñicko domahuc Baruku ziñuc mutâcnecnepo: ¹⁴ ‘Anutu Tâpiri Qunqasan Wofun, Israere Anutu e ziñuc mukac: Go papia zi, furi bapare papia basanañkekicne â mi basanañkekicne i rorâ hapec mocko râetec hurâ dameñ zora fozejec. ¹⁵ Anutu Tâpiri Qunqasan Wofun, Israere Anutu e ziñuc mukac hâcne: Fic mecne, mâreñ mecne, waiñ gie mecne i mâreñ zira mocwâc furine bahuc juzo.’ ”

Jeremiazi numuwec

¹⁶ Eme furi bapare papia i Neriare ñokâ Baruku râcnerâ Wofuntao ziñuc muhuc numupo: ¹⁷ “O Wofun Anutu, sambânj â mâreñ i goki hâcne tâpiri sâkogezi â mesanañgezi bâfuac-jofameñ. Go wiac moc ezo murâ mi eipiekic. ¹⁸ Go ñic tausenje tausenje mañzi zâfic-jopahuc juekic, â mamac jañere kiñtofa i qâricfâc-jeñic jañere faio gurucke rahuc juekic. O Anutu sâko tâpiri

rune, go Anutu Tâpiri Qunqasan Wofuŋ, zâŋege inuc hâcne. ¹⁹ Mamana birige kâcqene sâko â eebapage i tâpirinehec, zâŋegezi ñic zenqoma hata-jenîc honeekic, ehuc ñicne ñicne ru sâc hata raenqopien irec sâcko okacne bazu-jareekic. ²⁰ Go Aigita mârenko mâsi â wiac zâŋe furu bahuc jumen, erâ Israe â ñic gâcne jaŋerao damen zinuczia bahuc juekic jaha; ehuc zâŋe binjege bâfuamen i mincgaç tâtâc fokac wâc. ²¹ Go Israe ñicfâcge jaŋe Aigita mârenkonec mâsi â wiac zâŋe furu bahuc tâpiri â mesanange sicnerâ wiac hâhâwicne sâko bâfuahuc jowac-jopatec wahambin. ²² Ehame mâren zi mimiñnefâc-jenîc jarecmurâ mupaŋkemen i hâcne jaremen; mâren moc susu â baŋaç fusucmarâ qâmbâriŋkeekac hâcne. ²³ Eme jaŋe razirâ rauckehuc gore dân mana reren mi ejumbien, â sâcmutâc dângere sâcko wâc mi jujumbien, erâ goki wiac eniŋte mutâcne-jaremen i qatara-fâre jumbien jaha; inuc epie mutec zârâ hâriŋ sasawa zi fai-jenîcko fewec hâcne. ²⁴ Manakic, hae ronîŋte somâre zae i âke suepie biac hae sac maŋfunko ware ñekac, ehame zika â nânâ babasa â huc hâmoc fokacte hae i biac somâ bapa Kaldea ñic jaŋere meo feocmu. Goki dân mumen i fâricnehec ewec hâcne, go gahac honekic i! ²⁵ O Wofuŋ Anutu, go ine hae i Kaldea ñic jaŋere meo fezo eha sifu zinuc nazamen: ‘Go ñic gâcne rocjopatec honehapie mâren monenzi furine bazemec.’ ”

Wofuŋzi Jeremia dân bâtikiecnawec

²⁶ Eme Wofuŋte dân Jeremiarao kecziŋuc fuawec: ²⁷ “Manakic, Wofuŋ noni hâcne wiac

jujune sasawa irec Anutu, no wiac mocte moc mi eipiepemu. ²⁸ Irec no hae zi Kaldea ñic jañere meo, â Babe ñicwofuñ Nebukaneza ere meo râepe ro rauc ezejec. ²⁹ Kaldea ñic jañe hae zi somâ baengopienzi mañao wefurâ turuñkepie zazejec, erâ bâiñnuniñte ficbupu gâcne wâwâneñ bakicne irec faio Baali nemu hosâc âsu rikecne jumbienñ â waiñ wiac nemu gâcne jañere taha muhuc honke-jare jumbienñ fic i mâmâc zazejec. ³⁰ Israe ñic â Judañic jañe qie-jeñickonecteañ wiac hone añac mi ecneekopac i hâcne ejumbienñ; Israe ñic jañe hâcne dameñ sâc eebapa-jeñiczi bâiñnuhuc jumbiñ, Wofuñ nore dâñ iñuc. ³¹ Hae zi bambiñ dameñ ira rune jañe fuñkerâ bâiñnuhuc juwefukuhapie kimbenñ â aaric mana-jarehuc jupozi jukopac, irec hae i zâñe mai-naneonec bârâriepemu. ³² I Israe ñic â Judañic jañe jañac mecne, ñicwofuñfâc-jeñic mecne, fekicnefâc-jeñic mecne, taha bapa â porofetefâc-jeñic mecne, Juda mâreñ rune mecne, erâ Jerusalem ñecjucfâcticne mecne, jañe mâmâc bâiñnuhuc hehesic bâfua-fârembiñte iñuc epemu. ³³ Jañe maicnurâ mâcne, râpecnurâ domambiñ, ehuc dameñ sâc dâñ jaza qazuc ehuc jupo i sifu mi manambiñ â bâbâtiñte takic-jopawec wâc. ³⁴ Jañe nemuqâñfâc-jeñic mamakâcne i ine taha ufuñ nore zâñe fokac i gâc hecneniñte ira baferâ âkendâñ-jopambiñ. ³⁵ Jañe naru motecfâc-jeñic Moleke nemu ere biñe qahuc rikec-jopaniñte Beñ-Hinom wâneñko Baali nemu ere bâzi ririke toma bambiñ. No ine wiac iñucne moc mi mutâcne-jarepo â jañe wiac mamakâcne iñucne

ehuc Juda eatuckepie sâqocne baocete moc mi manasupo.

³⁶ “Hae zi zika â roroc â huc hâmoczi qakume Babe ñicwofuñ ere meo feocmu’, ñoñe iñuc muengopien, Wofuñ Israere Anutu noni ine hae irec dân ziuñuc mukopac: ³⁷ Manakic, no aaric â kimbenj â mamana sâqoc mâretec mana-jarehuc mâreñ sâc bătâtiec-jopapo irec-nec mocwâc ro nusec ejarerâ jowac-jopape hae mâreñ zira risierâ wamao junzepien. ³⁸ Eme jañe ñicfâc-nane juhapie no Anutu-jenic juzepac. ³⁹ Eme no mañ mamana mocjaha â juju hata mocjaha tahac-jopape damenj sâc no arañ banarehuc junzepien, i jañe jañacne â qâricfâc-jenic juhâc qâhâmoniñte iñuc ejarepemu. ⁴⁰ Erâ no jañehac zâzâfic fofu sanañ epemu, ehuc ehâmo-jarepemurâ moc mi râpec-jopazepac, â no arañ babanare irec fuñne qazu-jarepe jañe mañzi manahuc no wâc mi râpecnunzepien. ⁴¹ Aricne, no hone añac ejarehuc ehâmo-jarepemu, ehuc mañ â qâqâtâc-nane jañerao furu jaha râepe foha mâreñ zira jâmbomacko sarac-jopapemu.”

⁴² Wofuñ e ziuñuc mukac hâcne: “No ñicguru zi jañere faio zârâ hâriñ sâko hâcne râepe fewec, iñuc jaha wiac biañne mupañke-jarekopac sâc i tahac-jopa-fârepemu. ⁴³ Eme mâreñte fuñne ziuñuc muengopien, ñic â qowi tâmiric tuhutac fokac, erâ Kaldea ñic jañere meo fewec, ira hâcne mâreñ mocwâc furine bazo. ⁴⁴ Monenji mâreñ furine baniñmu, ehuc furi bapare papiâ qârenkerâ ñic gâcne ejarepie ware honehapie basanañkeniñmu. Benjaminj mârenko â

Jerusalem rârec rârec â Juda hae ƚerakac â tiki mâreƚ â wâneƚko â Negebe mâreƚko hae ƚerakac ira iƚuc hâcne eniƚmu; no busâqoc faio juju-jeƚic i hetikiepe bubiaƚ faio juju-jeƚic fuaocmu irec. Wofuƚ nore dâƚ iƚuc.”

33

Anutu e Jerusalem hae heqâreme mâririhec eocmu

¹ Eme Jeremia e momori jaƚere sacmaƚko niƚƚiƚko jaha juhame Wofuƚtaonec dâƚ mocwâc fuacneme arec jajahec ewec, ine kecziƚuc:
² “Wiacte wiac bâfua-fâreekac â fua taniƚkeocte manatâc qâtâc eekac, zâƚene Wofuƚ, eki hâcne ziƚuc mukac: ³ Go wira basac enaretec micgao ropemu, ehuc wiac qeƚ bipinehec â game hukicne, goki kâuc baekic i hâcne gaza gowatuc epemu. ⁴ Hae kecziƚec fic â Juda ƚicwofuƚ jaƚere fic â somâre zae wiac ima qahuc râsi sanaƚke-jarenzepeneƚ muhuc heropiembiaƚ, fic irec Wofuƚ Israere Anutu no ziƚuc mukopac:
⁵ No hehesic-jeƚic sasawa irec erâ hae zi zâƚe mai-nane bâsoƚkecnehuc aaricko â kimbeƚko jopapo ƚic i jaƚere qâƚqâƚ i Kaldea ƚic jaƚe ware zika qahuc fic i hefuseniaƚmu. ⁶ Manakic, no hae i heqârêrâ bâpiaƚkepemu, ehuc rune jaƚe wama fofu dunduƚ â fofu sanaƚ bâfua-jarepemu. ⁷ Erâ Juda â Israe ƚic busâqoc faio juju-jeƚic i hetikiepe bubiaƚ faio juju-jeƚic fua-jareocmu, ehame bâpiaƚ-jopapemu. ⁸ Jaƚe sâqocne bahuc bunaneo bambiaƚ irec kiƚ bârâriehuc baqaqac-jopapemu, â sindaƚ ehuc râpecnumbiaƚ

irec kiŋ bahac i bâtâmire-jare-fârepemu. ⁹ Eme Jerusalem hae i wiac biaŋne sasawa ecnepe mârenko ŋicne ŋicne mananiŋmu sâc jaŋere maio mumuteŋ-nane â aŋac-nane â zeri-nane â zâŋe rara biaŋ-nane ezejec. Eme wiac biaŋne â wama bâfuacne-fârepe honerâ bipic tatara ejareha qarac qarac qanzepieŋ.”

¹⁰ Wofuŋzi kecziŋuc mukac: “Hae mâreŋ zira, ŋoŋe ŋic â qowi tâmiric tuhutac fokac ira wiac kecziŋucte fânâŋ mocwâc fuame mananzepieŋ:

¹¹ Aŋac zeri â danŋe bubiaŋ â ŋic ŋokac biŋe qaŋac eeŋare; erâ Wofuŋte ufuŋko danŋe taha bafehuc hahaŋne barâ ziŋuc muniŋmu, jaŋere zeri fânâŋ mâmâc:

‘Anutu Tâpiri Qunqasaŋ Wofuŋ e mumbiaŋkeniŋ!

Wofuŋ e uruc jaun-ticnehec hâcne,

â aki anonoc-ticne fofu sanaŋ foomu!’

No mâreŋ zira busâqoc faio juju fokac i hetikiepe mârâc bubiaŋ faio juju fowec irec sâc fuarâ fozejec, Wofuŋ nore dân iŋuc.”

¹² Anutu Tâpiri Qunqasaŋ Wofuŋ e ziŋuc mukac: “Mâreŋ zi ŋic â qowi tâmiric tuhutac fokac erâ hae-ticne ŋerakac ira mâreŋ kecqaŋnehec mocwâc fuazejec, eme lama soŋaŋ jaŋe ira lamafâc-jeŋic ejarepie waha fomananzepieŋ. ¹³ Tiki mârenko me wânenko me Negebe mârenko me Benjaminîŋ mârenko me Jerusalem rârec rârec me Juda mârenko hae ŋerakac ira lama wosec-jopaekaczi soŋaŋ-jopahame mocwâc sicne fotâc enzepieŋ. Wofuŋ nore dân iŋuc.”

Dawidi oso gitecnere findanđan

14 Wofunzi kecziñuc mukac: “Manakic, damen moc maickeocmu ira Israe â Juda kikefun janere mumupañ dânbian mupo i fârio qaocmu. 15 Ehame zoañ damen ira mupe Dawidire oso gitecne tiñne moc fuazejec, eme eki hâcne mârenko gie-ticne mumutiñ dân â tiñnere sâcko bahuc juzejec. 16 Damen ira Juda bafickezo â Jerusalemko wama foomu, ehame hae irec zâñe ziñuc munim: ‘Wofun e tiñne-nâñec.’ ”

17 Wofun e kecziñuc mukac hâcne: “Israe kikefunte eri ñeño ñic babasa i Dawidiraio mi fuazejec. 18 Eme ñic moc damen sâc nore maio qowi bâzi rikeocte me taha bâzi rikeme hosâc-ticne feocte me bâzire qowi qa hezuc eocte ñic babasa i Lewire taha bapafâc janerao mi fuazejec.”

19 Eme Wofunte dân Jeremiarao ziñuc fuawec: 20 “Wofunzi kecziñuc mukac: No ñafe â zoañ jahehec zâzâfic epo i ñoñe sâcne hetâcnepie ñafe furec sâckoa mocwâc mi eocmuo 21 ine kiñaññic-nane Dawidi ehac zâzâfic epo i iñuc jaha sâcne hetâcnezo, eme ñokâ-ticne moc mi fuarâ eri ñeñe-ticnao ñicwofun ñeocmu, â Lewi guruonec taha bapa, kiñañ qaqañ-nane janhehec zâzâfic epo i wâc sâcne hetâcnezo. 22 Sambânko bâpiñ ñerakac i sâcne mi wowosene â hâwecmecko mongen forakac i fahuc sâcticne sâcne mi mamane, eme no kiñaññic-nane Dawidire qâricfâc â Lewire guruonec nore kiñañ qahuc juniñmu jañe basawec-jopape irec sâc jaha enzepien.”

23 Wofunte dân Jeremiarao kecziñuc fuawec: 24 “Ñic keci jañe dân muhuc juenjopien i moc

hone manac ekomec me? Ine zinjuc: ‘Wofun e njcguru jajahec bâwosâec-jofawec i hâcne hone sunjin ejaetekac.’ Jaje injuc muhuc njcfâc-nane qaisoc-jopaengopien, ehuc jajere manapie njcguru moc buc mocwâc mi junjopien ekac. ²⁵ Irec Wofun no zinjuc mukopac: No nape â zoan jahehec zâzâfic epo, erâ sambân â mâren jahere sâcmutâc râepo i moc behepe omaeoc-muo ²⁶ ine Jakobo â kinanjin-nane Dawidi jahere qâricfâc jaje wâc hone sunjin ejarepemu. Erâ jajere guruonec Abraham â Isaka erâ Jakobo qâricfâc-jenjin jajere njcwofun mocwâc mi rowosâec-jopapemu. No busâqoc faio juju-jenjin i hetikiepe bubian faio juju fua-jareme aki anonoc ejarepemu hâcne.”

34

Jeremiazi Zedekia unjan azâcnekac

¹ Babe njcwofun Nebukaneza e momori gurufâc-ticne zengoma â mâren sâc njcguru ere meo jufârembin erâ njcguru gâcne sasawa jajehec Jerusalem â hae piticfâc-ticne furu jaha somâc-jopambin damen ira Wofuntaonec dân Jeremiarao fuawec i keczinjuc: ² “Wofun Israere Anutu e zinjuc mukac: Go ra Juda njcwofun Zedekia e dân azâcnerâ muc, Wofunzi zinjuc mukac: ‘Manakic, no hae zi Babe njcwofun ere meo râepe feme turunkeme zazejec. ³ Ehame go ere meonec waharâ sâcne mi wisecmu, aricne, jaje rojâmbânjurâ ere meo râecgupie fecmu, eme Babe njcwofun ehac zâjezi hohonec enicmu â miczi dân nazan gazan enicmu, erâ irec faicnao

Babe haeo razemec.’ ⁴ Juda ñicwofuñ Zedekia go ine Wofuñte dâñ manac! Wofuñ e gore zîñuc mukac: ‘Go zikare nânâ mi ecmu. ⁵ Go wamao hâmozemec. Eme apa ñosafâcge go mi fuarâ juhantec mârâc jaha ñicwofuñ juwefumbuñ jañe hâmpie hosâc âsu rike-jare jumbien inuc jaha go rike-garerâ gore zîñuc muhuc makuc baniñmu: “Jai, bomboñ-nâñec!” ’ No inuc eniñte mupo hâcne. Wofuñ nore dâñ inuc.”

⁶ Eme porofete Jeremia e dâñ i sasawa Juda ñicwofuñ Zedekia Jerusalem haeo âzâcne-fârewec. ⁷ I Babe ñicwofuñ ere momorifâc jañe Jerusalem hae â Juda mârenje hae nâfocne ñepic, Lakisa â Azeka hâcne biac somâ bacjofahapie inuc ewec; Judare hae basanañkecicne jañeraonec hae i jahe hâcne nâfocne ñepic.

Kiñañ qaqa jujure dâñ

⁸ Ñicwofuñ Zekedia e kiñañ qaqa rambañko râ râec-jopa irec dâñ moc mufua-jareocte Jerusalem hae rune zengoma jañehac zâzâfic ewec; eme faicnao Wofuñtaonec dâñ Jeremiarao fuawec irec binañ zi. ⁹ Zîñuc fuaocte zâzâfic embiñ: Ñic sasawa jañe Hebiraio kiñaññic ñokacfâc-jenñic firuec-jopanzenpiñ, ehame Judañic moczi Judañic qomâ-ticne mocwâc ecneme kiñañ qaqa-ticne mi juzejec. ¹⁰ Eme ñic fekcicne mecne wahakicne mecne zâzâfic embiñ jañe sasawa dâñ i mana reren embiñ, ehuc kiñaññic ñokacfâc-jenñic jañe mocwâc mi bacjopapie jujareninje firuec-jopambiñ; ine hâcne jañe dâñ mana reren ehuc rambañ juniñte

firuec-jopambiņ. ¹¹ Juku zâhec ine maņjenic risieme kiņaņņic ñokac firuec-jopambiņ jaņe mocwâc rocjoparâ bawahac-jopahuc kiņaņ qaqa bacjopambiņ.

¹² Iņuc epie Wofuņte dâņ Jeremiarao kecziņuc fuawec: ¹³ “Wofuņ Israere Anutu e ziņuc mukac: No mimiņnefâc-ņeņic Aigita mâreņkonec, kiņaņ qaqa jumbiņkonec hâcne batarac-joparâ kecziņuc muhuc jaņehec zâzâfic epo, ¹⁴ ‘Ñoņeraonec moczi Hebiraio qomâ-ticne furine bame kiņaņ qaqa-ticne jukume jara 7-ko firuezejec; e jara 6 sawa kiņaņ qaņareme firuepie rambaņ juzejec hâcne.’ Mimiņnefâc-ņeņic jaņe ine dâņnane mana rereņ mi embiņ, â dâņnanere hazec-jeņic wâc mi râembiņ. ¹⁵ Ñoņe ine maņneņic bârisierâ nore maio wiac tiņkeekac i ehuc ñic kiņaņ qaqahec sasawazi qomâfâc-jeņic firuec-jopaniņte dâņne mumbiņ. Ehuc nore zâņe fokac fic ira mai-naneo zâzâfic embiņ. ¹⁶ Zi ine maņneņic risieme ru sâc kiņaņņic ñokacfâc-ņeņic rambaņko juniņte ejareme sâc firuec-jopakicne jaņe kiņaņ qaqa mocwâc bacjopaniņte zoqac erâ rocjopahuc zâņe-nane bâsâqorembiņ. ¹⁷ Irec Wofuņ no ziņuc mukopac: Ñoņe dâņnane mana rereņ mi embiņ, ehuc ru sâc qomâfâc-ņeņic rambaņko juju i mi bâfua-jarembiņte noni rambaņ fuņmoc mupe fua-ņarezejec; ine zika â huc hâmoc erâ roroczi ñoņerao niņgiņ tâmiric gie bazejec, Wofuņ nore dâņ iņuc. Eme mupe mâreņko ñicne ñicne jaņe honec-ņoparâ bipic tatara ejarezejec.

¹⁸ “Â zâzâfic-nane hetâcnembiņ erâ nore maio

zâzâfic embiñ irec dân mana reren wâc mi embiñ jañe bulimakao motecne hefâuuckepie dâkâne jajahec eha ñonden-jeñicko fotâcnembiñ irec sâc ejarepemu. ¹⁹ Ehuc Juda fekicnefâc-ticne â Jerusalemte fekicnefâc, â ñicwofunṭe soñañ sâko, â taha bapa erâ mâren irec ñic ñokac omane bulimakao hefâuuckekicne irec ñondenṅao fotâcnembiñ ²⁰ jañe hâcne râsifâc-jeñic â juju-jeñic sipirickeninṭe muṅgopien jañere meo râec-jopape fenzepien, eme qâñqâñfâc-jeñic i sawa wipe â kâte qowi jañere nânâ enzepien. ²¹ Eme Juda ñicwofunṭ Zedekia â fekicnefâc-ticne jañe inuc jaha râsifâc-jeñic â juju-jeñic sipirickeninṭe muṅgopien jañere meo râec-jopapemu, Babe ñicwofunṭ momorifâc-ticne beheç-joparâ rambin jañere meo hâcne. ²² Manakic, no dân mutâcne-jarehuc ejarepe hae zira risienzepien; eme zika qaku ro rauc ehuc turunṅepie zazejec. Ehame Judare hae ñerakac i ima bape tuhutac fozejec. Wofunṭ nore dân inuc.”

35

Rekaba kikefun jañe micreren bâfuambin

¹ Josiare ñokâ Jojakim e Judare ñicwofunṭ juhame Wofunṭaonec dân Jeremiarao fuawec i kecziñuc: ² “Go Rekaba kikefun jañerao rarâ dân jazahuc jowac-jopatec Wofunṭ nore ufunṅko fic mañne mocko fepie wainṭ opâ gumec-jopazemec.” ³ Dân inuc fua-nareme no Habaziniare ñosa, Jeremia mocte ñokâ Jazania e mecne â hahac qafâcne â ñokâfâcne mecne erâ Rekaba kikefunṭ

furu jaha jaņe māmâc rocjopapo. ⁴ Rocjoparâ Wofunĵe ufunĵko Igedalia ere ņokâ Hanaj, Anuture ņic fârine hâcne, ere motecfâc jaņere ficmaņko râec-jopapo. Ficmaņ izi ine ņic fekicne jaņere ficmaņ irec heririņnao â Salumte ņokâ Maseja, motâc soņaj juwec ere ficmaņ faicnao fowec. ⁵ Eme Rekaba kikefunĵkonec ņic jaņe waiņ râqâc fusucmakicne â kap râe-jarehuc jazapo: “Waiņ opâ nâniņ!” ⁶ Jaņe ine mumbiņ: “Nâņe waiņ opâ mi nâeņgopeneņ, i Rekaba ņokâ-ticne, mamac-nâņec Jonadaba eki hâcne ziņuc mutâcne-nârewecte, ‘ņoņe waiņ opâ moc mi nâhuc junzepieņ, ņoņe mecne â qâricfâc-ņeņic fua rahuc juniņmu jaņe mecne. ⁷ ņoņe fic moc mi banzepieņ, â wiac hândâņne moc mi tienzepieņ, erâ waiņ gie he sarac me ro rauc mi enzepieņ wâc; ņoņe ine qoruc bozeo ņec foc erahuc junzepieņ, iņuc ehuc mâreņ jaba juņgopieņ ira dameņ zora jufenzepieņ.’ ⁸ Eme nâņe mimiņne-nâņec Jonadaba, Rekabare ņokâ hâcne, e dâņ mutâcne-nârewec i mana rereņ efârembeņ, irec nâņe mecne ņokac naru motecfâc-nâņec jaņe mecne waiņ opâ moc mi nâeņgopeneņ. ⁹ Erâ fic wiac barâ maņnao juju fofo ee i wâc mi eeņgopeneņ, â waiņ gie me nânâ gie me wiac gâcne irec ukicne i wâc mi rauckerâ bajueņgopeneņ. ¹⁰ Nâņe qoruc bozeo ņeņe juju ehuc mimiņne-nâņec Jonadabazi dâņ mutâcne-nârewec sâc i mana rereņ efârembeņ hâcne. ¹¹ Eme Babe ņicwofuņ Nebukaneza e mâreņ zirec râsi fisime mumben, ‘Ajoc, Kaldea momorifâc-jeņic â Siria momorifâc-jeņic jaņere

hâhâwicte erâ Jerusalem haeo fenzepenen.’ Inuc murâ Jerusalem haeo wefumben junḡopenen hâcne.”

¹² Eme Wofunḡe dâḡ Jeremiarao zîḡuc fuawec:

¹³ “Anutu Tâpiri Qunḡqasaḡ Wofunḡ, Israere Anutu e kecziḡuc mukac: Go ra Judare ḡicfâc â Jerusalem hae rune zîḡuc jazac: Nḡe bâbâtiḡ bâsuehuc dâḡnane mana rerenḡ eniḡte takic-ḡopakac me? Wofunḡ nore dâḡ inuc.

¹⁴ Rekabare ḡokâ Jonadaba e ḡâricfâcne jaḡe waiḡ opâ mi nâniḡte muac-jopawec, eme jaḡe dâḡticne mi qatarambiḡ; ehuc waiḡ opâ moc mi nâhuc jumbiḡzi junḡopienḡ jaha, i mimiḡne-jeḡic ere sâcmutâc dâḡ renḡeniḡte. No dâḡ zuzuhuc jaha ḡazahuc jupo, ḡeḡe ine dâḡnane mi manambiḡ.

¹⁵ Eme no kiḡaḡḡicfâc-nane sasawa, porofete hâcne mu ḡâmoc zîḡuc eḡarenḡte zuzuhuc jaha ḡeḡerao sorec-jopapo: ‘Nḡe ru sâc maḡḡeḡic bârisierâ hata hehesic-ḡeḡic behenzepienḡ, ehuc eebapa biaḡne bâfuarâ nemu jaḡerao qohotahuc kiḡaḡ mi qajarenzepienḡ; inuc epie ḡeḡe â mamacfâc-ḡeḡic mârenḡ ḡarepo ira jusanaḡkeniḡmu.’ Nḡe ine hazec-ḡeḡic râehuc dâḡnane mi manambiḡ. ¹⁶ Jâmbomac, Rekabare ḡokâ Jonadaba ere ḡâricfâc jaḡe mimiḡne-jeḡiczi sâcmutâc jarewec i mana rerenḡ embiḡ; ḡicguru zi jaḡe ine nore dâḡ moc mi manambiḡ.

¹⁷ Irec Wofunḡ Anutu Tâpiri Qunḡqasaḡ Wofunḡ, Israere Anutu hâcne, no kecziḡuc mukopac: Mananḡopienḡ, no Judare ḡicfâc â Jerusalem hae rune sasawa jaḡere faio zârâ hâriḡ feocte uḡ sawaḡ eḡarepo i mupe fârio qafâreocmu, i dâḡ

jazape mi manambin̄te â wira-jarepe okacne mi bătikie-narembin̄te.”

¹⁸ Rekaba kikefun̄ jaņe ine Jeremiazi zin̄uc jazawec: “Anutu Tâpiri Qun̄qasaņ Wofun̄, Israere Anutu eki keczin̄uc mukac: N̄one mimiņne-ņeņic Jonadaba ere sâcmutâc dâņ manahuc mumutâc dâņticne furu jaha mana rereņ embiņ â dâņ mutâcne-ņarewec irec sâcko jâmbân̄ wiac ebac embiņ. ¹⁹ Irece Anutu Tâpiri Qun̄qasaņ Wofun̄, Israere Anutu no zin̄uc mukopac: Jonadaba, Rekabare ñokâ hâcne, e damen̄ sâc ñic moc nore maio kin̄aņ qaqa gie baocce mi basa-jâmbân̄kezejec.”

36

Nicwofun̄zi papia zocko rikewec

¹ Josiare ñokâ Jojakim e Judare ñicwofun̄ jume jara 4 eha Wofun̄taonec dâņ keczin̄uc Jeremiarao fuawec: ² “Go papia foforiekicne moc rorâ Israere dâņ â Judare dâņ erâ ñicne ñicne jaņere dâņ gazapo i qâreņke-fârec, ine Josiare damen̄ko fun̄kerâ gazapozi gazahuc juwefuku miņecgac gazakopac jaha dâņ i hâcne. ³ Eme Juda kikefun̄ jaņe sisipiric sasawa fua-jareocce manasuhuc jukopac, irec biņe manarâ ru sâc hata-jeņic hehesicne beheniņmu mecne; in̄uc epie no kin̄ bahac-jeņic â sâqocne-jeņic bătâmirepemu.”

⁴ In̄uc âzâcneme Jeremiazi Neriare ñokâ Baruku hefârewec, eme Wofun̄ e dâņ âzâcne-fârewec i Baruku e Jeremiazi âzâcne mutâc ewec sâc papiao qâreņkewec. ⁵ Ehame Jeremiazi Baruku zin̄uc muhuc mutâcnecewec: “No Wofun̄te ufun̄ko fepere aka henarekicnere sâcne mi

fepemu. ⁶ Irec goki ferâ Wofunṭe dân gaza mutâc epe sâc papiao qârenkemec i Wofunṭe ufunṭo ñic ñokac nânâ sowa jujure hombanṭe fisihapie wose-jarezemec, erâ Juda hae ñerakackonec ñic wefunṭopienṭe jaṅe mâmâc wose-jarezemec. ⁷ Inṭuc etec jaṅe mu huacbuc ehuc Wofunṭe maio daperâ ru sâc eebapa-jeṅic hehesicne i beheniṅmu mecne; Wofunṭi ñicguru zi kimbeṅ repicne qajarehuc aaric sâko mana-jareocte muwec hâcne.” ⁸ Eme Neriare ñokâ Baruku e porofete Jeremiazi dân âzâcne mutâc ewec i mana rereṅ efârehuc Wofunṭe dân papiao qârenkewec i Wofunṭe ufunṭo ñic ñokâc wose-jarewec.

⁹ Eme Josiare ñokâ, Judare ñicwofunṭe Jojakim e ñicwofunṭe jume jara 4 â mossa 9 tarazo ewec damenṭe ira ine Jerusalem hae rune zeṅgoma â Juda hae ñerawec irec ñic ñokac Jerusalem haeo fisimbiṅ sasawa jaṅe Wofunṭe maio sowa jujure hombanṭe moc ñeniṅte mumbiṅ. ¹⁰ Ñehapie Baruku e Jeremiare dân papiao qârenkekicne i Wofunṭe ufunṭo wose-jarewec, ine Safanṭe ñoka qârenṅic Gemaria ere ficmanṅko ñic ñokac sasawa jaṅere maio wosewec hâcne. Ficmanṅ izi ine Wofunṭe ufunṭ-ticnere hae zoṅa faicpec Motâc Qâricnere heririṅko ñewec.

¹¹ Eme Mikaja e Gemariare ñokâ â Safanṭe ṅosazi Wofunṭe dân papiao qârenkekicne i mana-fârewec. ¹² Manarâ ñicwofunṭe ficko hurâ qârenṅic ere ofisio fewec. Ferâ ñic fekcicne kecziṅuc jaṅe tumanṅnehapie honec-jopa-fârewec: Qârenṅic Elisama â Semajare ñokâ Delaja â Akaboro ere ñokâ Elenatanṭe â Safanṭe ñokâ

Gemaria â Hananiare ñokâ Zedekia erâ fekiecne gâcne sasawa. ¹³ Mikaja eki ine Barukuzi ñic ñokac papiaonec dâñ wose-jareme manawec i jaza-fârewec. ¹⁴ Jazame ñic fekiecne sasawa jañe Netaniare ñokâ Jehudi, Selemiare ñosa, Kusire apa hâcne e Baruku zîñuc âzâcneocte erao sorembiñ: “Go ñic ñokac papia wose-jareme i hâcne rorâ wahazemec.” Eme Baruku, Neriare ñokâ hâcne, e papia i rorâ jañerao huwec. ¹⁵ Eme jañe âzâcnerâ mumbiñ: “Go waha ñehuc wose-nârec!” Inuc mupie Barukuzi wose-jarewec. ¹⁶ Eme jañe dâñ i mana-fârerâ hohonec ehuc bipic tara-jareme Baruku âzâcnemiñ, “Nâñe dâñ i furu jaha ñicwofuñ âzâcnenzepeneñ!” ¹⁷ Baruku ine zîñuc wiocnemiñ: “Go muc, dâñ i weniñuc erâ qârenke-fâremeniñ; eki mume sâc qârenkemen me weniñuc?” ¹⁸ Barukuzi ine dâñ zîñuc bâtikie-jarewec: “Jeremia e dâñ i sasawa miczi nazame tindezi papiao qârenkepo.” ¹⁹ Eme ñic fekiecne jañe Baruku âzâcnemiñ: “Go â Jeremia ñohe ra soñkenic, ehuc wena junicmu i ñic moc mi jazapire mananzepeniñ.”

²⁰ Inuc âzâcnerâ papia i qârenñic Elisama ere ficmañko soñkerâ ñicwofuñte hae zoñao fembiñ, ehuc wiac fuawec irec dâñ ñicwofuñ âzâcne-fâremeniñ. ²¹ Âzâcniepie ñicwofuñzi Jehudi e papia roocte sorewe; eme eki qârenñic Elisamare ficmañkonec ro bafisiwec, bafisirâ ñicwofuñ â ñic fekiecne ñicwofuñ orânkehuc doma-fâremeniñ jañe wose-jarewec. ²² Eme mosa namba 9 maickewecte ñicwofuñ e hoe dameñte

ficko ñehame mañfuñnao zafeo zoc zahuc fowec. ²³ Eme Jehudi e ombâñne 3 me 4 wosewec sâc ñicwofuñ e sâqe moteczi bătâcnerâ zocko beheme huwec; iñuc ekume ine papia i zafeo zoc zahuc fowec ira hurâ zafârewec hâcne. ²⁴ Ñicwofuñ â kiñaññicfâcne jañe zeñgoma dân i mana-farerâ sifu bipic-jenic mi tarawec; ehame ñaqi-jenic wâc mi bâsuckembiñ. ²⁵ Eme Elenatañ â Delaja erâ Gemaria jañe ñicwofuñ papia mi rikeocte zoqâchec numucnepie mi mana-jarewec wâc. ²⁶ Aricne, ñicwofuñ e ñokâ-ticne Jeramele â Azariele ere ñokâ zâñene Seraja erâ Abedere ñokâ Selemia jañe qâreññic Baruku â porofete Jeremia rocjofaniñte mujarewec, Wofuñzi ine sonjofawec.

Papia harierâ qâreñkekiecne

²⁷ Eme Baruku e Jeremiazi dân âzâcne mutâc ewec sâc qâreñkewec irec papia i ñicwofuñzi zocko beheme zafâreme Wofuñte dân kecziñuc Jeremiarao fuawec: ²⁸ “Go papia qâricne moc roc, erâ papia rañqanao dân fowec â Juda ñicwofuñ Jojakimzi rikewec ijaha harierâ qâreñke-fârezemec. ²⁹ Eme Juda ñicwofuñ Jojakim ere dân ine ziñuc muzemec, ‘Wofuñzi kecziñuc mukac: Go papia keci kecziñuc muhuc zocko behetec zawec: “Wemocte ziñuc qâreñkemen: Babe ñicwofuñ e fisi-jâmbânkerâ mâreñ zi ima bahuc ñic â qowifâc-ticne bâsirowec-jopaocmu?” ³⁰ Irec Wofuñ no Juda ñicwofuñ Jojakim gore ziñuc mukopac: Qâricfâcge jañeraonec moczi Dawidire eri ñeño mi ñezejec, ehame qâñqâñge i mâc kosa behepie

30aŋ fârorocko â ɲafe mâmâtenko fozejec. ³¹ Eme go gahacne â qâricfâcge erâ kiŋaŋɲicfâcge ɲoŋe kiŋ bahac-ɲeɲicte okacne bazu-ɲarepemu; ehuc ɲoŋe mecne, Jerusalem hae rune mecne â Judare ɲicfâc mecne sisipiric wiac fua-ɲareocte uŋdâŋ ɲaza-fârepe mana suambiŋ i mupe fârio qaocmu.’ ”

³² Eme Jeremia e papia qâricne moc rorâ Neriare ɲokâ qâreŋɲic Baruku e râcnewec, eme Juda ɲicwofuŋ Jojakim eki papia zocko beheme zawec irec dâŋ i Jeremiazi âzâcne mutâc ewec sâc furu jaha mocwâc qâreŋkewec. Erâ i sawa mâcne, dâŋ iŋucne gâcne bocjaha râe zuhuc ekicne.

37

Jeremia e kâpâcwâru ficko râekicne

¹ Babe ɲicwofuŋ Nebukaneza e Jojakimte ɲokâ Konia ere okacne Josiare ɲokâ Zedekia ɲicwofuŋ âkendâŋneme eki Juda mâreŋko ɲicwofuŋ gie bahuc juwec. ² Mâc e jahacne mecne, kiŋaŋɲicfâc-ticne mecne â mâreŋ irec ɲic ɲokac mecne jaŋe porofete Jeremiazi Wofuŋte dâŋ jazawec i mana takirembiŋ.

³ Ehame ɲicwofuŋ Zedekia e sifu Selemiare ɲokâ Jehuka erâ Masejare ɲokâ taha bapa Zefania jahe porofete Jeremia ziŋuc âzâcnenicte erao sorec-jofawec: “Go Wofuŋ Anutu-nâŋec e nâŋere erâ wira wâwâsic ecnezemec!” ⁴ Jeremia e ine kâpâcwâru ficko biac mi râembiŋte ɲic ɲondenko rac warec ehuc jaha juwec. ⁵ Damerŋ ira Faraore momorifâc jaŋe râsi fisiniŋte Aigita mâreŋ biac behembiŋ, eme Kaldea ɲic Jerusalem somâ bahuc

jumbinzi biñe-jeñic manarâ Jerusalem beherâ rambin.

⁶ Eme Wofunje dân porofete Jeremiarao kecziñuc fuawec: ⁷ “Wofun Israere Anutu e ziñuc mukac: Juda ñicwofunzi no mu wioc enarenicte ñic jajahec sorec-jofame warepic jahe e ziñuc âzâcnezepirec, ‘Manakic, Farao momorifâc-ticne bafic-ñopaninje warehuc jumbin jañe mocwâc Aigita mâreñ-jeñicko risiezo engopien. ⁸ Kaldea ñic jañe ine risie ware hae zi somâ barâ ro rauc ehuc turuñkepie zaocmu. ⁹ Irec Wofun no ziñuc mukopac: Ñoñe ziñuc muhuc maññeñic mi eatuckenzepien: “Kaldea ñic jañe beheç-nâporâ rasananñeniñmu,” jañe mi rajâmbânñeniñmu, aricne. ¹⁰ Me Kaldea ñic jañere momorifâc ñoñehet zika gie baengopien i sananñerâ jopa-fârepie muzac ñic zâpâ jopakicne nâfocne sawa jañe sifu ru sâc qoruc boze-jeñic konec faharerâ hae zi turuñkepie zazac.’ ”

¹¹ Farao momorifâc-ticne jañe fisizo ehapie Kaldea ñic jañe Jerusalem hae beherâ rambin. ¹² Rahapie Jeremia e Benjamin mâreñko rarâ ira soctofâc-ticne jañehet mâreñ rukeç qaqaare dân moc fuawec i mutaraocte Jerusalem hae behezo ewec. ¹³ Ehuc ine Benjamin Motâcko fisime ñic moc zâñene Iria, Selemiare ñokâ â Hananiare ñosa hâcne, e ira momori soñan domaweczi Jeremia ziñuc muhuc aka hecnewec: “Go Kaldea ñic jañerao wisezo ekic.” ¹⁴ Jeremiazi ine muwec: “Burec, no Kaldea ñic jañerao wisezo mi ekopac.” Iria eki ine dân i mana-bipiehuc Jeremia rorâ ñic fekcicne jañerao barawec. ¹⁵ Eme ñic fekcicne

jaņe ine Jeremiare aaric-jopame qarâ qâreņņic Jonataņ ere ficko kâpâcwâru bambiņ, fic i mutarapie kâpâcwâru fic ewec hâcne.

Zedekia â Jeremia jahe dâņ muc manac epic

¹⁶ Iņuc ehuc Jeremia fic maņne moc, haroņaņko gufukicne erâ opâ nombâņhec ira râepie ņeha zoaņ bocjaha tarawec. ¹⁷ Juku zoaņ mocko ine ņicwofuņ Zedekiazi dâņ râeme rame Jeremia erao jowa fembiņ. Eme ņicwofuņzi erific-ticnao kamierâ wiocnehuc muwec: “Wofuņte dâņ moc fokac me?” Jeremiazi muwec: “Fokac.” Erâ muwec: “Go Babe ņicwofuņ ere meo fecmu.” ¹⁸ Iņuc murâ ņicwofuņ Zedekia dâņ ziņuc zuhuckerâ âzâcnewec: “No go â kiņaņņicfâcge me ņicguru zi ņoņe wemo wiac sâqocne moc eņarepore kâpâcwâru ficko râecnumbiņ?” ¹⁹ Me porofetefâc-ņeņic dâņ ziņuc ņaza jumbieņ jaņe weni, ‘Babe ņicwofuņ e ņoņe me mâreņ zi râsi mi fisi-ņareocmu?’ ²⁰ Irec ņicwofuņ-nane, zi mupe manac: Go nunumu-nane kecziņuc mana-narec mac: No qâreņņic Jonataņ ere ficko hâmozipore mutec ira mocwâc mi bârisiecnunzepieņ.” ²¹ Eme ņicwofuņ Zedekiazi mume Jeremia e momori ņic jaņere hae zoņao bara soņaņkehuc jumbiņ. Ehuc ira zoaņne zoaņne nânâ poroņ bapa jaņeraonec nânâ poroņ hâcbuc moc râcnehuc jukupie haeo nânâ poroņ omae-fâreme sawa behembiņ. Iņuc ehapie Jeremiazi momori jaņere hae zoņao juwec hâcne.

38

Jeremia nombâņkonec fârepie wefuwec

¹ Mataņ ere ņokâ Sefatia â Pasahurure ņokâ Gedalia â Selemiare ņokâ Juka erâ Malikiare ņokâ Pasahuru jaņe Jeremiazi ņic ņokac sasawa dâņ kecziņuc jazawec i mana-fârembiņ: ² “Wofuņzi ziņuc mukac: Moc e hae zira ņeocmuzi zikare nânâ eocmu, â nânâre me huc hâmocte sipirick-eocmu; â moc e Kaldea ņic jaņerao wiseocmu e ine juju-ticne ņezickehuc zikare nâfocne erâ juocmu. ³ Wofuņ e ziņuc mukac: Hae zi i jâmbomac Babe ņicwofuņ momorifâc-ticne jaņere meo feme ro rauc eniņmu.” ⁴ Iņuc mume ņic kâcqene jaņe ņicwofuņ âzâcnembiņ, “ņic keci mutec qâhâmonzepieņ! E dâņ iņucne jazahuc hae zirec maņnao momori zanzâņne juņgopieņ jaņe mecne erâ ņic ņokac gâcne sasawa jaņe mecne maņņeņic bawahaekac; ņic e ņicguru zi jaņe juhâmoniņte mâcne, sipirickeniņte manasuhuc juekac.” ⁵ ņicwofuņ Zedekiazi ine muwec: “Sâcne, meņeņicko feoc, ņicwofuņ e ņoņere dâņ qaocte tâpiri mi focnekac i!” ⁶ Iņuc mume Jeremia rorâ ņicwofuņte ņokâ Malikia ere opâ nombâņ momori jaņere hae zoņao fowec ira behepie huwec, ine repazi niņgiņkerâ râepie huwec. Opâ nombâņko ine opâ aricne, sohoņ sawa fowecte Jeremiazi sohoņmaņko hurâ bâutuckewec.

⁷ Ebemelec, Etiopianec ņic kâcqene moc e ņicwofuņte erificko juweczi Jeremia opâ nombâņko behepie huwec irec biņe manawec. Ehame ņicwofuņ e damaņ ira Benjamin Motâcko ņewec. ⁸ Irec Ebemeleczi ņicwofuņte erific beherâ ņicwofuņtao ra ziņuc muhuc âzâcnewec: ⁹ “O ņicwofuņ-nane, ņic keci jaņe porofete Jeremia

wiac ecne-fârerâ opâ nombânko behepie huwec i mâsi sâqoc qaqocne; e haeo nânâ poroŋ omaekacte ira nânâ tâmiric ŋeku hâmoocmu i!” ¹⁰ Mume ŋicwofuŋzi Etiopia ŋic Ebemelec âzâcnewec, “Go zirecnec ŋic jahec â moc rocjopatec ra Jeremia e hâmozacte nombânkonec fârepie wefuzejec!” ¹¹ Eme Ebemelec e ŋic i rocjoparâ ŋicwofuŋte ficko mafafic rurumaŋnao fic maŋne moc fowec irecnec qoruc wambane â ŋaqi wiac suckekicne i rorâ repao niŋgiŋkerâ opâ nombânko Jeremiarao râeme huwec. ¹² Izi ine Etiopia ŋic Ebemeleczi Jeremia ziŋuc âzâcnewec: “Go qoruc wamba â ŋaqi wiac suckekicne i repazi nâguzacte fitackec.” Mume Jeremiazi iŋuc ewec. ¹³ Eme jaŋe Jeremia repazi opâ nombânkonec fârepie wefuwec. Iŋuc epie Jeremia e momori jaŋere hae zoŋao juwec.

Zedekiazi Jeremiaronec dâŋ manaocte muwec

¹⁴ Ŋicwofuŋ Zedekia e porofete Jeremiazi Wofuŋte ufuŋko motâc namba 3 ira fuacneocte dâŋ râeme rawec. Eme Jeremia e ra fisime ŋicwofuŋzi ziŋuc âzâcnewec: “No dâŋ moc wio-garezo ekopac, irec go wiac moc mi hesoŋke-narezemec.” ¹⁵ Eme Jeremiazi Zedekia âzâcnewec, “No dâŋ gazape qâhâmocnuniŋte mucmu i! Â dâŋ gaza mutâc epe ine sifu mi mana-narecmu.” ¹⁶ Iŋuc mume ŋicwofuŋ Zedekiazi Jeremia bucko kamierâ mupaŋkecnewec, “Juju bâfua-nârewec Wofuŋ e jujâmbânkecacte no mi qâhâmocgupemu â ŋic jujuge sipirickezo muŋgopieŋ jaŋere meo wâc mi râecgupemu.”

¹⁷ Eme Jeremiazi Zedekia âzâcnewec, “Wofuņ, Anutu Tâpiri Qunqasaņ Wofuņ â Israere Anutu e ziņuc mukac: Go Babe ņicwofuņ fekicnefâc-ticne jaņerao hucmuo ine jucmu, eme hae zi turuņkepie mi zahame go â wiacfâcge ņoņe sâcne juniņmu. ¹⁸ Babe ņicwofuņ fekicnefâc-ticne jaņerao mi hucmuo ine hae zi Kaldea ņic jaņere meo feme turuņkepie zaocmu, ehame go gahacne wâc sâcne mi wise-jarecmu.”

¹⁹ Iņuc mume ņicwofuņ Zedekiazi Jeremia ziņuc âzâcnewec: “No Judaņiczi Kaldea ņic jaņere guruo biac humbiņ juņgopieņ jaņere hâwicnukac; jaņere meo râecnupie penaroņ ehuc kosa enarenziņkohec.” ²⁰ Jeremiazi ine muwec: “Jaņere meo mi râecguniņmu, go Wofuņte dâņ gazakopac i manarâ sâcne juhâmocmu â jujuge mi sipirickeniņmu. ²¹ Go qatararâ jaņerao mi hucmuo ine Wofuņzi dâņ kecziņuc naza nowatuc ewec i fârinehec eocmu: ²² Manakic, Juda ņicwofuņte erificko ņokac nâfocne juniņmu jaņe sasawa Babe ņicwofuņ fekicnefâc-ticne jaņerao amec-jopa hupie kecziņuc muniņmu:

‘Ojai, ņic âgofâcge jaņe
eatucguhuc bawahacgumbiņ,
eme zi sohoņmaņko juhaņtecne
behecguņgopieņ.’

²³ ņokac naru motecfâcge sasawa jaņe ine Kaldea ņic jaņerao amec-jopa huniņmu, erâ go gahacne wâc sâcne mi wise-jarecmu, aricne, rocgurâ Babe ņicwofuņ ere meo râecgupie fecmu â hae zi turuņkepie zaocmu.”

²⁴ Eme Zedekiazi Jeremia âzâcnewec, “Gohec

dâŋ muc manac ekoperec irec biŋe ŋic moczi moc mi manazejec, manapie zikare biŋe ezicte. ²⁵ Me gohec dâŋ muc manac ekoperec i fekiecne jaŋe manarâ gorao fisirâ muninŋmu, ‘Go ŋicwofuŋ dâŋ âzâcnemeŋ me ŋicwofuŋzi go gazawec i nâzâc! Mufua-nâretec akicgunanŋmu.’ ²⁶ Inŋuc mupie ine zinŋuc jazazemec: ‘No ŋicwofuŋ dapecnerâ Jonatanŋte ficko mocwâc mi risiepemurâ mana-nareocte numucnepo, no ira hâmozipore.’ ” ²⁷ Eme zâhec ine jâmbomac ŋic fekiecne sasawa jaŋe Jeremiarao fisirâ mu wioc ecnepie ŋicwofuŋzi dâŋ âzâcne mutâc ewec sâc jazawec. Eme dâŋ muc manac ekicne irec biŋe moc mi manambiŋte nininŋkerâ behembiŋ. ²⁸ Jeremiazi ine momori jaŋere hae zoŋao jukuhame dameŋ maickeme râsi jaŋe Jerusalem hae ro rauc embiŋ.

39

Râsi jaŋe Jerusalem hae rombiŋ

(Nŋic II 24:20–25:21; Bin II 36:17–21; Jer 52:3–

30)

¹ Zedekia e Juda ŋicwofuŋ erâ juhame jara 9 tataranao mosa namba 10 ira Babe ŋicwofuŋ Nebukaneza e momorifâc-ticne sasawa rocjopame fisirâ Jerusalem hae somâckembiŋ. ² Eme juku Zedekia e ŋicwofuŋ juhame jara 11 irec mosa 4 â zoaŋ gie bapa namba 9 ira haesac âeckekupie hawec fuawec. ³ Eme Babe ŋicwofuŋ ere ŋic fekiecne kecziŋuc jaŋe haeo ferâ motâc zâzâŋinŋko domawec ira waha ŋembiŋ: Nerega-Sareze, Samega-Nebo, Sasakim ŋic

fekicne jaņere micne, Nerega-Sareze, qaņgec bapa jaņere micne erâ Babe ņicwofuņ ere ņic fekcicne gâcne sasawa. ⁴ Ehamē Juda ņicwofuņ Zedekia â momorifâcne sasawa jaņe honec-joparâ wisembiņ, ehuc ņicwofuņte jufu gieopec ra sac jajahec jahere ņondenko motâc domawec i fotâcnerâ ņafeo hae beherâ Jordan ņânenkopec rambiņ. ⁵ Kaldea momori ņic jaņe ine jâpec-jopa raku Jeriko mâreņ burocnao Zedekia bâfuambiņ; erâ ro Babe ņicwofuņ Nebukaneza Hamati mâreņko Ribela haeo ņewec erao barambiņ. Eki ine dâņticne mutarawec. ⁶ Erâ Babe ņicwofuņzi mume Ribela haeo ira Zedekiazi honeha ņokâfâc-ticne qâhâmoc-jopambiņ, erâ Judaniċ fekcicne sasawa jaņe iņuc jaha Babe ņicwofuņzi mume qâhâmoc-jopa-fârembiņ. ⁷ Zedekia e jahacne ine mume zâņene âke hâpombiņ, erâ Babe haeo baraniņte kâpâcwâruzi niņgiņkemiņ. ⁸ ņicwofuņte erific â hae rune jaņere fic wiac i Kaldea ņic jaņe rikepie zâseņkewec, erâ Jerusalem haere qânâsac i heroc qârapiemiņ. ⁹ ņicwofuņ momori fuņfuņfâc-ticne jaņere micne zâņene Nebuzaradaņ e ņic ņokac zanzaņne haeo jumbiņ â erao wisembiņ jaņe kâpâcwârū bacjoparâ Babe haeo amec-jopa rawec. ¹⁰ ņic hapetac, fic hae tâmiric gâcne ine ņicwofuņ momori fuņfuņfâc-ticne jaņere micne Nebuzaradaņzi Juda mâreņkoa juniņte mana-jarehuc waiņ gie â mâreņ jarewec.

Nebukanezazi Jeremia ņezickewec

11 Babe ȋicwofuȋ Nebukanezazi momori fuȋfuȋfâc-ticne jaȋere micne Nebuzaradaȋ e Jeremiare dâȋ zȋȋuc âzâcne mutâc ewec: 12 “Go mutec bafisipie hone soȋaȋ ecnehuc sahaç-ticne moc mi bâzâickezemec, aricne, e jahac dâȋ gazame sâc ine wiac ecnezemec.” 13 Eme ȋicwofuȋ momorifâc-ticne jaȋere micne Nebuzaradaȋ â ȋic feçicne jaȋere micne Nebusazibaȋ â ȋaȋȋec bapa micne-ȋeȋic Nerega-Sareze erâ Babe ȋicwofuȋ feçicnefâc-ticne sasawa 14 jaȋe ȋiȋaȋ soreç-jopapie Jeremia momori jaȋere hae zoȋaoneç bafisipie rambaȋko juoçte Gedalia, Ahikamte ȋokâ, Safaȋte ȋosa hâcne erao râembiȋ. Inȋuc epie ȋicfâc-ticne jaȋere ȋondenȋko juwec hâcne.

Wofuȋzi Ebemelec ȋezickeoçte muwec

15 Jeremia e momori jaȋere hae zoȋao jaha juhame Wofuȋte dâȋ kecziȋuc fuacnewec: 16 “Go ra Etiopia ȋic Ebemelec âzâcneç, ‘Anutu Tâpiri Ƞuȋȋasaȋ Wofuȋ, Israere Anutu e zȋȋuc mukac: Manacic, no hae zireç findaȋdâȋ mupo i bâbâpiaȋ mâcne, sisipiric fuacneoçte mupe fârio ȋaocmu; damaȋ ira gore zâȋe faio fârinehec eoçmu hâcne. 17 Go gahacne ine damaȋ ira bataracȋupemu, eme go ȋic hâhâwic bajareekic jaȋere meo moc mi râecȋunzepieȋ. 18 Aricne, go zikare nânâ ezicte no ȋezicȋu-jâmbâȋȋepemu, eme norao roweçke-huc jumeȋte mi sipirickehuc juȋuge zuhuckerâ juzemec. Wofuȋ nore dâȋ inȋuc.’ ”

40

Jeremia e ñic ñokac zanẓaṅne jaṅehec juwec

¹ Ñicwofuṅ momori funfunfâcne jaṅere micne Nebuzaradaṅ e Jeremia bâfuarâ Rama haeo ira rame Wofuṅtaonec dâṅ fuacnewec. Jeremia e damaṅ ira kâpâcwâru ñic Jerusalem haeonec â Juda mâreṅkonec Babe haeo bacjopa raniṅte rambiṅ jaṅere ṅondenko niṅgiṅhec mâmâc rawec.

² Eme ñicwofuṅ momori funfunfâc-ticne jaṅere micnezi Jeremia hefârerâ ẓiṅuc âzâcnewec: “Wofuṅ Anutuge e hae mâreṅ ẓi wiac hâhâwicne i hâcne fuacneocte dâṅne mufuawec. ³ Erâ Wofuṅ bunao bahuc dâṅticne mana rereṅ mi embiṅte dâṅ muwec i fârine bâfuame wiac keci fua-ṅarekac hâcne. ⁴ Erâ manac, no ẓi mege kâpâcwâruzi basanaṅkekicne i firue-garekopac; eme go gahac, nohec Babe haeo razo murâ razeperec eme no ira hone soṅaṅ egarepemu; me nohec Babe haeo razore mi egarekacko beherâ ṅezemec. Manakic, mâreṅ bocjaha forakac, irec go ira me ira razore manatec sâccekacko razemec. ⁵ Ñezo murâ ine Gedalia, Ahikamte ñokâ, Safaṅte ṅosa hâcne erao risie razemec; Babe ñicwofuṅzi ñic e hâcne Juda mâreṅte soṅaṅ âkendâṅnewec, irec ñic ñokac jaṅerao ẓuhuckerâ ehec juzo murâ juzemec, me ira me ira razore manatec sâccekacko razemec.” Momori micne e iṅuc murâ hatare nâsiṅ â bubiaṅte wiac râcnehuc soreme rawec. ⁶ Eme Jeremia e Ahikamte ñokâ Gedalia erao Mizipa haeo rawec, erâ ehec ñic ñokac nâfocne mâreṅ ira jumbiṅ jaṅere ṅondenko juwec.

7 Momori micne jaņe ņicfâc-jeņic jaņehec hae mâreņ ira siņsaņ qarâ juhuc ziņuc mana-fârembiņ: Babe ņicwofuņ e Ahikamte ņokâ Gedalia mâreņ soņaņ âkendâņnehuc ņic ņokac naru motec â mâreņ irec ņic omane Babe haeo mi bacjopa rakicne jaņe hone maiņ ejareocte mucnewec. 8 Iņuc manarâ ņic kecziņuc jaņe ņicfâc-jeņic jaņehec Mizipa haeo Gedalia erao ra fisimbiņ: Netaniare ņokâ Isimae, Karea ņokâ jahec-ticne Johanaņ â Jonataņ, Tanahumeti ere ņokâ Seraja, Efai Netofa haeonec ere ņokâfâc erâ Makati ņokâ-ticne Jezania. 9 Eme Ahikamte ņokâ, Safaņte ņosa Gedalia e jaņe â ņicfâc-jeņic ziņuc musanaņke-jarehuc jazawec: “Ņoņe Kaldea ņic kiņaņ qajareniņte mi hâwic-ņopazejec; ņoņe mâreņ zijaha juhuc Babe ņicwofuņ kiņaņ qacnehuc sâcne juhâmoniņmu. 10 No nahac Mizipa haeo ņehuc Kaldea ņic warehuc juniņmu sâc jaņere maio dâņmumu-ņeņic erâ jupemu. Ņoņe ine waiņ â oliwa hândâņne â wiac gâcne i qa roro damenķo rowaņ-ņeņicko râe guruc erâ hae ro rauc embiņ sâc ira ņec juc enzepieņ.” 11 Babe ņicwofuņ e ņic nâfocne jaņe Juda mâreņko juniņte mana-jarehuc Gedalia Ahikamte ņokâ, Safaņte ņosa hâcne soņaņ âkendâņne-jarewec i Judaniņ Moabi me Amon me Edom mâreņko me mâreņ ira me ira juhuc biņene mana-fârembiņ. 12 Irec Judaniņ sasawa hae mâreņ sâc bātâtiēc-jopakicne irecnec risierâ Juda mâreņko Mizipa haeo Gedalia erao fisimbiņ. Erâ waiņ hândâņ mecne, jâcfâri mecne i mâriri sâkohec fuame ro guruc embiņ.

Isimaezi Gedalia râsi ecnewec

¹³ Kareare ñokâ Johanañ â momori micne jañe hae mâreñ ira sinşañ qarâ jurambinzi ra Mizipa haeo Gedalia erao fuambin. ¹⁴ Ehuc âzâcnembin, “Amonñic jañere ñicwofuñ Balisi e Netaniare ñokâ Isimaezi qâhâmocguocte soreme fisiwec go i moc manakic me?” Ahikamte ñokâ Gedalia e ine dânjenjicte maname fârine mi ewec. ¹⁵ Eme Johanañ, Kareare ñokâ hâcne, e Mizipa ira Gedalia kamierâ zîñuc âzâcnewec: “Mana-naretec ra Netaniare ñokâ Isimae qâhâmozepac, eme ñic moczi moc mi manazejec. E wemocko qâhâmocgume Judañic gorao tumañne-fârehuc rârecguñgopienzi mocwâc tâtiepie Judañic nâfocne jañe wâc sipirickeninmu?” ¹⁶ Ahikamte ñokâ Gedalia e ine Karea ñokâ-ticne Johanañ zîñuc âzâcnewec: “Go inuc mi ejâmbânkezemec, go Isimaere dân mukic i burec.”

41

¹ Eme mosa namba 7 ira Isimae, Netaniare ñokâ â Elisamare ñosa hâcne, e ñicwofuñ guruonec fuakicne â ñicwofuñte ñic kâcçene moc juweczi ñic 10 jañehc Mizipa haeo Ahikam ñokâ-ticne Gedalia erao fuambin; eme ira mâmâc ñehuc nânâ nâmbin. ² Ehuc Netania ñokâ-ticne Isimae â ñic 10 ehc jumbin jañe faharerâ Ahikamte ñokâ Gedalia, Safañte ñosa hâcne e zikazi qambin; inuc ehuc Babe ñicwofuñzi mâreñ soñañ âkendânnewec ñic e hâcne qâhâmombin. ³ Erâ Isimae â ñicfâcne jañe Judañic Gedaliahec Mizipa haeo jumbin jañe mecne â Kaldea momori ñic ira jumbin jañe mâmâc qâhâmoc-jopa-fârembin.

Nic gâcne qâhâmoc-jopakicne wâc

⁴ Gedalia qâhâmombiñ irec biñe ñic moczi moc mi manaha hae furewec. ⁵ Hae fureme ine Sikem, Silo â Samaria haeonec ñic 80 busâqocte erâ meczâwâ-jeñic bâtâcnekicne â ñaqi-jeñic bâsuckekicne â sahaç-jeñic kosa hetâcnekicne jañe taha bâzi â hosâc âsu ririkere wiac Wofunçe taha ufunço bafeninçe fisimbiñ. ⁶ Eme Netaniare ñokâ Isimae e bâfuac-jopaocte Mizipa haeonec kio kio waha rawec, raku bâfuac-jopará ziñuc jazawec: “Ñoñe ware Ahikamte ñokâ Gedalia erao feniñ.” ⁷ Eme hae zâzâñiñko fe fisipie Isimae Netaniare ñokâ e â ñic ehac jumbiñ jañe qâhâmoc-jopará mi opâ nombânko beheç-jopapie hunzepieñ i! ⁸ Jañeraonec ñic 10 jañe ine Isimae ziñuc âzâcnembiñ: “Mi qâhâmoc-nâpoc, nâñe wiac kecziñuc gieo soñkemberñ fonârekac: Jacgoñ, padi, wokemañ â bañac.” Inuc mupie âgofâc-jeñic jañehaç mi qâhâmoc-jopahuc mâc beheç-jopawec.

⁹ Isimaezi ñic qâhâmoc-jopawec jañere qâñqañ i opâ nombânko beheç-jopame humbiñ; nombân i kâcçene, erâ i ñicwofuñ Asa eki Israe ñicwofuñ Basazi râsi fisihame mume rombiñ. Nombân ira hâcne Netaniare ñokâ Isimaezi mume ñic qâhâmoc-jopakicne jañe beheç-jopapie hurâ fusembiñ. ¹⁰ Nïcwofuñ momori funfunfâc-ticne jañere micne Nebuzaradañ eki ñic ñokac nâfocne Mizipa haeo jumbiñ â ñicwofuñ otâfâcne jañe Ahikamte ñokâ Gedaliazi soñañ-jopaocte erao râec-jopawec. Eme Netaniare ñokâ Isimae e ñic ñokac nâfocne i jañe hâcne rocjopará Amonñic

jaņere mârenko wiseocte kâpâcwârueo bacjopa rawec.

¹¹ Eme Kareare ñokâ Johanaņ â momori micne gâcne sasawa ehac jumbiņ jaņe Netaniare ñokâ Isimaezi mâsi repic qapicne efârewec irec biņe manambiņ. ¹² Manarâ ñicfâc-jeņic rocjopa-fârerâ Netaniare ñokâ Isimae ehac zika qaniņte rambiņ; raku Gibeoņ hae heririņko opâ zâkâņ sâko fowec ira bâfuambiņ. ¹³ Eme ñic ñokac Isimaehec jumbiņ jaņe Kareare ñokâ Johanaņ â momori micne sasawa ehac fisimbiņ jaņe honec-joparâ bubiaņ mana-fârembiņ. ¹⁴ Ehuc Isimaezi Mizipa haeonec amec-jopa rawec ñic ñokac i jaņe sasawa e râpeckerâ Kareare ñokâ Johanaņtao rafârembiņ. ¹⁵ Netaniare ñokâ Isimae ine ñic 8 jaņehac wiserâ Amoņņic jaņerao rambiņ. ¹⁶ Netaniare ñokâ Isimae e Ahikamte ñokâ Gedalia qâhâmora ñic ñokac nâfocne Mizipa haeonec amec-jopa rawec jaņe hâcne Kareare ñokâ Johanaņ â momori micnefâc-ticne jaņe rocjopambiņ. Ine ñic mecne, momori mecne, ñokac naru motec mecne erâ ñic fekicne mâmâc, jaņe Johanaņzi Gibeoņ haeonec bârisiec-jopawec hâcne. ¹⁷ Erâ raku Betelehem hae bâqiņkehuc Kimiham tomafic ira ñemanambiņ, erâ irecnec Aigita mârenko raniņte manasumbiņ. ¹⁸ Netaniare ñokâ Isimae e Ahikamte ñokâ Gedalia, Babe ñicwofuņzi mâreņ soņaņ âkendâņnewec e hâcne qâhâmowecte Kaldea ñic jaņere hâwic-jopaha raniņte mumbiņ.

Jeremia e Johanaŋtao dâŋ râme rawec

¹ Eme momori micne sasawa â Kareare ñokâ Johanaŋ â Hosajare ñokâ Azaria erâ ñic ñokac fekicne wahakicne sasawa ² jaŋe porofete Jeremia-arao rarâ zĩŋuc âzâcnembiŋ: “Go dâŋnâŋec man- arâ Wofuŋ Anutuge ñic zanzãŋne mac zi nâŋere erâ numucnezemec. Go gahacne zâŋezi hone- kic, nâŋe bocjaha jumbenzi afecne sawa embenj juŋgopenen. ³ Eme Wofuŋ Anutuge e wena ranãte â wemo wiac ebac enãte nâzâ nâwotuc ezejec.” ⁴ Eme porofete Jeremiazi jazawec: “Sâcne, manakopac, dâŋ muŋgopien irec sâcko Wofuŋ Anutu-ŋenji numucnepemu, eme Wo- fuŋzi dâŋ okacne bâtikie-nareme sâc ŋazapemu; no dâŋ moc mi hesoŋke-ŋarepemu.” ⁵ Jaŋe ine Jeremia zĩŋuc âzâcnembiŋ: “Wofuŋ Anutugezi dâŋ nâzâ mutâc ecmurâ nâŋerao sorecguocmu i mutec mana rerenj mi efârenãŋmuo ine Wofuŋ e jahac mumutanĩŋ ñicnâŋec fârine â siocmâc ehuc fuŋne-nâŋec rituzejec. ⁶ Nâŋe Wofuŋ Anutu-nãŋectao sorecguŋgopenen e dâŋ bianje me sâqocne nâzâme ine sifu dâŋticne mana rerenj enzepenen; iŋuc hâcne juhâmonãte Wofuŋ Anutu-nãŋecte micdâŋ mana rerenj enzepenen.”

Aigita mâreŋko mi raniŋte jazawec

⁷ Zoãŋ gie bapa 10 tarame Wofuŋtaonec dâŋ Jeremiarao fuawec. ⁸ Eme Kareare ñokâ Johanaŋ â momori micne ehac jufârembiŋ erâ ñic ñokac fekicne wahakicne jaŋe sasawa hefârec-jopawec. ⁹ Erâ jazawec, “Wofuŋ, Israere Anutu, e wâwâsic dâŋŋenji âzâcnepemurâ sorecnumbiŋ eki hâcne zĩŋuc mukac: ¹⁰ ‘Ñoŋe mâreŋ zira

jusananķeniņmuo ine bafaharec-ņoparâ mocwâc mi bârândiņ-ņopapemu, â sarac-ņoparâ mi qâfiec-ņopapemu, no wiac hâhâwicne eņarepo irec busâqoc manakopac hâcne. ¹¹ Ñoņe Babe ñicwofuņ hâhâwic bacneeņgopieņ i behenzepieņ, ñoņe ere mi hâwic-ņopazejec, Wofuņ nore dâņ iņuc; no bafic-ņopahuc ere meonec batarac-ņopapemurâ ñoņehc jukopac hâcne. ¹² No buuruc eņarepemu, eme eki busâqoc mana-ņarehuc mâreņ-ņeņickoa juniņte mutara-ņarezejec.’ ¹³ ‘Nâņe mâreņ zira mi junzepenē’, ñoņe iņuc muhuc Wofuņ Anutu-ņeņicte dâņ qatarahuc dâņ ziņuc zuhuckerâ muniņmu: ¹⁴ ‘Aricne, nâņe Aigita mâreņko zika mi fokacko â zikare qeņfânâņ mi fuaocmu erâ nânâre mi hâmonaņmu ira ra junzepenē.’ ¹⁵ Iņuc muniņmuo ine Juda guruonec ñic nâfocne juņgopieņ ñoņe Wofuņte dâņ mananiņ: Anutu Tâpiri Quņqasaņ Wofuņ, Israere Anutu e ziņuc mukac: ‘Ñoņe jâmbomac Aigita mâreņko razore qizec qahuc ira juniņte raniņmuo ¹⁶ ine zikare hâhâwic bajuņgopieņ zika izi hâcne Aigita mâreņ ira bâfuac-ņopaocmu, erâ rorocte mezac-ņopakac roroc izi Aigita mâreņko fisi-ņareme sipirickeniņmu hâcne. ¹⁷ Aigita mâreņko ra juniņte qizec qaņgopieņ ñic i jaņe ira zikare nânâ efâreniņmu, erâ nânâre â huc hâmocte sipirickeniņmu; eme sisipiric mupe fai-jeņicko feocmu i jaņeraonec moczi moc mi wisecnerâ juocmu.’

¹⁸ “Anutu Tâpiri Quņqasaņ Wofuņ, Israere Anutu e kecziņuc mukac hâcne: ‘Aaric â

kimben- nanezi Jerusalem necjucfâc-ticne jaņere faio fewec inuc jaha kimben- nane Aigita mâreņko raniņmu ņoņere faio honkepe feocmu; eme ņoņe sâwecte biņe ehapie ņic gâcnezi honec-ņoparâ bipic tatara ejarezejec, musâqorec-ņopapie mimi busâqoc fai-ņeņicko fezejec, ehame hae mâreņ zi mocwâc mi honenzepieņ.’ ¹⁹ O Judanic nâfocne, ņoņe Wofuņzi ziņuc ņazakac, ‘Aigita mâreņko mi ranzepieņ!’ Irec no miņecgac uņdâņ ņazakopac i mana-jâmbâņkeniņ me! ²⁰ Manaņgopieņ, ņoņe ziņuc muhuc Wofuņ Anutu-ņeņic erao sorecnuhuc ņaņac juju-ņeņic zârâ zâpâ faio râezo embiņ: ‘Go nâņere erâ Wofuņ Anutu-nâņec numucnezemec, eme Wofuņ Anutu-nâņec e dâņ i me i mume nâzâ-fâretec mana rereņ enzepeneņ.’ ²¹ Eme no dâņ i hâcne miņecgac mufua-ņarekopac, ņoņe ine Wofuņ Anutu-ņeņicte dâņ mufua-ņare-fârepemurâ ņoņerao sorecnuwec i ņazape mana rereņ moc mi eņgopieņ. ²² Irec ziņuc mana-hâmonzepieņ: ņoņe rarâ juniņte eņarekac hae mâreņ ira hâcne zikare nânâ ehuc wâc rorocte â huc hâmocte sipirickenzepieņ.”

43

Aigita mâreņko rambiņ

¹ Eme Jeremia e Wofuņ Anutu-jeņiczi dâņ âzâcne-fârehuc jaņerao sorewec i ņic ņokac sasawa jaza-fârewec. ² Jaza-fâreme Hosajare ņokâ Azaria â Kareare ņokâ Johanaņ erâ ņic râņgeņne gâcne sasawa jaņe Jeremia kecziņuc âzâcnemiņ: “Go burec ekomec, Wofuņ

Anutu-nâñec e zinjuc nâzâcmurâ mi sorecguwec, 'Ñoñe Aigita mârenko juniñte mi ranzepien.'
³ Aricne, Neriare ñokâ Baruku eki ine Kaldea ñic jañere meo râec-nâpooçmurâ manasuhuc mu qafen egareekac hâcne, jañe qâhâmoc-nâponiñte me Babe haeo kâpâcwâruo bacnâpo raniñte injuc eekac." ⁴ Eme Kareare ñokâ Johanañ â momori micne sasawa erâ ñic ñokac gâcne sâko jañe Wofunñte dâñ qatarahuc Juda mârenko mi ñembiñ.
⁵ Aricne, Kareare ñokâ Johanañ â momori micne sasawa jañe Juda guruonec ñic zanzañne ñicne ñicne jañerao bôtâtiec-jopakicnaonec Juda mârenko ñec juc eniñte risiembiñ jañe hâcne rocjopa-fârembiñ. ⁶ Ine ñic ñokac naru motec mecne, ñicwofunñte otâfâc mecne, â ñicwofunñ momori funñfunñfâc-ticne jañere micne Nebuzaradanzi Ahikamte ñokâ Gedalia, Safañte ñosa erao ñic râec-jopa-fâreme jumbiñ jañe mecne, erâ porofete Jeremia â Neriare ñokâ Baruku jahe mâmâc rocjopambiñ. ⁷ Rocjoparâ Wofunñte dâñ mana rerenñ mi ehuc ine Aigita mârenko rambiñ; raku Tapanese haeo fisimbiñ.

⁸ Eme Wofunñte dâñ i Tapanese hae ira Jeremiarao kecziñuc fuawec: ⁹ "Go qânâ kâcçene rorâ Tapanese ira Faraore ficmotâc funñnao Judañiczi honehapie mârenko duckezemec. ¹⁰ Erâ jazazemec, 'Anutu Tâpiri Qunqasañ Wofunñ, Israere Anutu e zinjuc mukac: Manakic, no kiñaññic-nane, Babe ñicwofunñ Nebukaneza hâcne, ecnepe ware fisirâ qânâ duckepazirec fainao eri ñeñe-ticne heme ñezejec, erâ ñeñe botâñnao qoruc bupu erinehec fâreme

domazejec. ¹¹ E ware Aigita mâren̄te tâpiri qame wahaocmu, ehame hâmocte biñe i hâmocko râec-jopaocmu, â kâpâcwârure biñe i kâpâcwârueo bacjopa raocmu, erâ zikare biñe i zikazi jopaocmu. ¹² Erâ nemufâc-jeñic jañere taha ufuñ i turuñkeme zaocmu â nemuqâñ wiac i baraocmu. Erâ lama soñañ moczi ñaqi-ticnaonec fitic wiac ro behec eekac irec sâc Aigita mâren̄ ecnehuc wâcwiac-ticne jâoc roocmu; ehame moczi aka mi hecneha mocwâc risie raocmu. ¹³ Zoante nemu mujumbien̄ ere jâmâ wâtun̄ qânâzi bakicne i qazurâ Aigita mâren̄te nemufâc jañere ufuñ zoczi rikeme zafâreocmu.’ ”

44

Jeremia e Judan̄ic Aigita mâren̄ko jumbin̄ jañe findan̄dân̄ jazawec

¹ Judan̄ic sasawa Aigita mâren̄ko Migidoli â Tapanese â Memfisi haeo erâ Patarosi mâren̄ko jumbin̄ jañere dâñ Jeremiarao kecziñuc fuawec: ² “Anutu Tâpiri Qun̄qasañ Wofun̄, Israere Anutu e ziñuc mukac: Jerusalem hae â Juda mâren̄ko hae gâcne sâko ñerakac jañe wiac hâhâwicne mupe fua-jare-fârewec i ñoñe ñañec hone manac embin̄. Erâ manan̄gopien̄, jañe ima bacjopa-kicne miñecgac sesuctac foran̄gopien̄ jaha. ³ I hehesic-jeñicte in̄uc ejarekicne; jañe ra nemu furune, jañe mecne ñoñe mecne â mamacfâc-ñen̄ic jañe mecne mi manac-jopambin̄, jañe hosâc âsu rike-jarerâ kiñañ qajarehuc bâin̄numbin̄ hâcne. ⁴ No kiñaññicfâc-nane sasawa, porofete hâcne,

jañe dameñ sâc zîñuc ñazaniñte socec-jopa ju-pac: ‘Ñoñe wiac mamakâcne qaisockeekopac ì moc mi enzepieñ.’ ⁵ Jañe ine dânane mi manambiñ â hazec-jeñic wâc mi râembiñ, irec hehesic-jeñic mi behehuc zuhuckerâ nemu hosâc âsu rike-jare jumbieñ. ⁶ Eme irec hâcne kim-beñ â aaric-nanere zocbârũzi Juda hae ñerawec ira mecne â Jerusalem haeo mecne mâmâc bârũkewec; ehame hae wiac zankerâ tuhune qarâ foweczi miñecgac fokac jaha.

⁷ “Zi ine Anutu Tâpiri Qũñqasañ Wofũ, Israere Anutu hâcne, no zîñuc mukopac: Judare qâricfâc, ñoñe wemocte guru-ñeñicko ñic ñokac naru motec â qie jañe sirowe-fâreniñte wiac hâhâwicne sâko ñucne bâfuãgopieñ? ⁸ Ñoñe wemocte sipirickeniñte â mâreñko ñicne ñicne jañere ñondenko sâwecte biñe â mimi busâqocte biñe eniñte Aigita mâreñko juzore fisirâ nemu hosâc âsu rike-jareñgopieñ, ehuc eebapa-ñeñic izi hâcne no bâiñnuñgopieñ? ⁹ Ñoñe mamacfâc-ñeñic â Juda ñicwofũñfâc â ñonâñfâc-jeñic jañe hehesic embiñ irec mecne erâ ñoñe ñañac â ñokacfâc-ñeñic Juda mâreñko â Jerusalem haeo hehesic bâfuambiñ irec mâmâc biac nkec-ñopawec me? ¹⁰ Ñoñe ine irec busâqoc moc mi manambiñ erâ mi manahuc juñgopieñ; ñoñe nore mi hâwic-ñopawec â nore sâcmutâc â dânsanãñ ñoñe â mamacfâc-ñeñic ñarepo irec sâcko wâc mi jumbiñ.

¹¹ “Irec Anutu Tâpiri Qũñqasañ Wofũ, Israere Anutu no zîñuc mukopac: Manañgopieñ, no Judãñic bâsirowec-ñopa-fârepemurâ râsi enãrepe sisipiric fua-ñãrezejec. ¹² Eme Judãñic zãnzãñe

Aigita mârenko rarâ juniŋte mumbiŋ jaŋe bâsirowec-jopapemu, jaŋe Aigita mârenko sipiricke-fâreniŋmu, zikare â rorocte hâmo sipiric eniŋmu; fekiecne mecne wahakicne mecne jaŋe mâmâc zikare nânâ eniŋmu â nânâre hâmo sipiric eniŋmu hâcne, eme ŋic gâcnezi jaŋerao qâqiŋ qahuc sâwecdân â sosopec dâŋ â mu hâhâwic dâŋ â mumusâqoc dâŋ muniŋmu. ¹³ Ehame Aigita mârenko juŋgopieŋ jaŋe Jerusalem hae rune ejarepo irec sâc jaha ejarehuc zika â roroc â huc hâmoc izi bâtiŋ-jopapemu. ¹⁴ Eme Judaniŋ zanzaŋne Aigita mârenko juniŋte fisimbiŋ jaŋeraonec moczi moc Juda mârenko risieocte sâcne mi wiserâ ra juocmu; jaŋe risierâ ira ŋec juc eniŋte maŋhâhâŋ ejare-bipieha mi risieniŋmu hâcne, jahecmaczi sawa wiserâ risieniŋmu.”

Sawa qânikinŋte ŋokac wofuŋ kiŋaŋ qacnembin

¹⁵ Nonâŋfâc-nâŋec jaŋe nemu hosâc âsu rike-jare jumbieŋ, iŋuc manambiŋ ŋic i jaŋe mecne, â ŋokac guru sâko domambiŋ jaŋe mecne, erâ ŋic ŋokac Aigita â Patarosi mârenko jufârembiŋ jaŋe mâmâc Jeremia dâŋ ziŋuc bâtikiecnembin: ¹⁶ “Go Wofuŋte micte dâŋ nâzâmec i mana rereŋ mi enaŋmu. ¹⁷ Aricne, nâŋe dâŋ mupaŋkembeŋ sâc irec fârine bâfuananŋmu hâcne, ine kecziŋuc: Sawa qânikinŋ irec ŋokac wofuŋ e nâŋe mecne, mamacfâc-nâŋec mecne, ŋicwofuŋfâc-nâŋec mecne â kâcqenefâc-nâŋec mecne Juda mârenko hae ŋerakac ira â Jerusalem haeo ejumbeneŋ irec sâc jaha hosâc âsu rikecnehuc waiŋzi taha râcnenaŋmu. Nâŋe dameŋ ira nânâ fonârewecte

nâ gapec embeñ, ehuc sâcne juhapene wiac hâhâwicne moc mi fua-nârewec. ¹⁸ Sawa qânikiñ irec ñokac wofuñ hosâc âsu ririkecne â wainzi taha hohonkecne i behembeñ dameñ ira hâcne funkerâ wiacte wiac basahuc juhapene zika â roroczi sipiric-nâpoekac.” ¹⁹ Erâ zuhuckerâ mumbiñ, “Nâñe sawa qânikiñ irec ñokac wofuñ hosâc âsu rikecneengopeneñ â wainzi taha honkecneengopeneñ, ehuc nânâ poronzi hawari-ticne bahuc rikeengopeneñ â wainzi taha honkecneengopeneñ i ñowefâc-nâñec jaje kâuc bahapie eengopeneñ me?”

²⁰ Inuc mupie Jeremia e ñicguru zengoma, ñic â ñokac erâ gâcne sâko dân inucne bâतिकeñembiñ jaje ziñuc jazawec: ²¹ “Macne, ñoñe mecne, macfâc-ñeñic mecne, ñicwofuñfâc-ñeñic mecne, fekicnefâc-ñeñic mecne â ñic ñokac gâcne jaje mecne Juda mârenko hae ñerakac ira â Jerusalem haeo hosâc âsu rike jumbiñ, Wofuñ e irec manasurâ bune zâzâfic qawec. ²² Wofuñ e juju â eebapa-ñeñic hehesicne â mamakâcne i zuhuckerâ hone manac eocte takickewec. Eme irec hâcne mâreñ-ñeñic i tuhutac fuawec; ehame ñiczi honepie bipic tataranehec â sâwechec ewec. Eme tuhutac luarâ foweczi miñecgac inucnea fokac. ²³ Ñoñe hosâc âsu rikehuc Wofuñ bunao bambiñ, ehuc dâncticne mana rereñ mi embiñte â sâcmutâc dâncticne â dânsanañ-ticne erâ mutaniñ dâncticne irec sâcko mi jumbiñte wiac hâhâwicne kecizi fai-ñeñicko fewec i miñecgac fokac jaha.”

²⁴ Erâ Jeremia e ñicguru zengoma â ñokac

sasawa jaŋe zuhuckerâ zîŋuc jazawec: “Juda mâreŋkoneczi Aigita mâreŋko jufâreŋgopieŋ ñoŋe Wofuŋte dâŋ zi mananiŋ: ²⁵ Anutu Tâpiri Qunqasaŋ Wofuŋ, Israere Anutu e kecziŋuc mukac: Ñoŋe â ñokacfâc-ŋeŋic micŋeŋiczi dâŋ zîŋuc mupaŋkerâ meŋeŋiczi irec fârine bâfuaeŋgopieŋ: ‘Nâŋe sawa qânikinŋte ñokac wofuŋ hosâc âsu rikecnenanŋte â wainzi taha honkecnenanŋte dâŋ mupaŋkembeŋ i soŋaŋkehuc junzepeneŋ.’ Sâcne, murâ iŋuc eniŋ, ehuc mumupaŋ dâŋŋeŋicte fârine bâfua-jâmbânkeniŋ! ²⁶ Irece Juda mâreŋkoneczi Aigita mâreŋko jufâreŋgopieŋ ñoŋe Wofuŋ nore dâŋ mananiŋ: No zîŋuc mukopac hâcne: Manaŋgopieŋ, no zâŋe sâko-naneo qetickehuc zîŋuc mupaŋkekopac: Juda mâreŋkoneczi Aigita mâreŋko juŋgopieŋ ñoŋeraonec moczi zâŋe-nane mu bâuac ehuc zîŋuc mocwâc mi muzejec, ‘Wofuŋ Anutu e jujâmbânkecac.’ ²⁷ Jâmbomac, bâbâpiaŋ mâcne, sisipiric fua-ŋareocte ruc bahuc jukopac; ehame Juda mâreŋkonec Aigita mâreŋko juŋgopieŋzi zikare â nânâre hâmo sipiric enzepieŋ, iŋuc eku arictac efârenzepieŋ. ²⁸ Â zika maŋnaonec wiseniŋmuzi ine Aigita mâreŋkonec Juda mâreŋko risieniŋmu, erâ i afecne maczi sawa eniŋmu; ehuc Juda mâreŋkoneczi Aigita mâreŋko juniŋte rambiŋ irec ŋic zanzaŋne jaŋe nore dâŋzi me jaŋacne dâŋzi fârinehec ewec i mana tara-fâreniŋmu. ²⁹ Eme irec maqâreŋ kecziŋuc fua-ŋarezejec: No hae mâreŋ zira hâcne bâtiŋ-ŋopapemu; eme uŋdâŋ ŋazapo i jâmbomac fârio qaocmu, iŋuc mana taranzeŋpieŋ, Wofuŋ

nore dân injuc. ³⁰ Erâ zuhuckerâ zinjuc ñazakopac: Mananġopien, no Farao Hofara, Aigita ñicwofuñ hâcne, e râsifâc-ticne â juju-ticne sipirickezo munġopien jañere meo râepemu, ine Juda ñicwofuñ Zedekia e Babe ñicwofuñ Nebukaneza ere meo râepo irec sâc, e hâcne râsi ecnehuc juju-ticne sipirickezo muwec.”

45

Jeremiazi Baruku dân âzâcnewec

¹ Josiare ñokâ Jojakim e Juda ñicwofuñ jume jara 4 eha Neriare ñokâ Baruku e Jeremiazi dân âzâcne mutâc ewec sâc i papiao qârenkewec. Ehame porofete Jeremia e dân zinjuc âzâcnewec: ² “Wofuñ, Israere Anutu e Baruku gore dân zinjuc mukac: ³ Go mukomec, ‘Jei, no zâic manahuc juhape Wofuñ e wiac busâqocnehec zuhuckerâ râe-narekac! No kio huse eku dockerâ manfâsâc mi juekopac.’ ⁴ Irec go Baruku âzâcnec, Wofuñzi keczinjuc mukac: Manakic, no wiac mupe fuawec i mocwâc sipirickeekopac, â wiac sarapo i mocwâc unuckeekopac, ine mârenj sasawa injuc ecneekopac. ⁵ Ehame go gahacne wiac fekicne fua-gareocte egarekac me? I mi mac ezemec! Manakic, no mupe mârenjic sasawa sisipiric fua-jareocmu, go ine hae mârenj ira me ira ra sisipiric tâmiric jucmurâ mana-garekopac.”

46

Aigita mârenjte findanđân

¹ Ñicne ñicne jañere erâ Wofuñte dân porofete Jeremiarao fuawec zine hâcne. ² Aigita

mâreŋte dâŋ â Aigita ŋicwofuŋ, zâŋene Farao Neko ere momori guru irec dâŋ. Jaŋe Eufрата opâo, Kakemisi haeo domahapie Babe ŋicwofuŋ Nebukaneza eki jopawec. Ine Josiare ŋokâ Jopakim e Juda ŋicwofuŋ erâ juhame jara 4 ewec damenŋ ira.

³ “Ŋoŋe maro piticne â kâcŋene hepie hume zikare ware birickeniŋ!

⁴ Becâsic becsahac wiac râe-jare-fârerâ
 ŋaŋacne wâc ferâ ŋeniŋ,
 aenŋdu hepie huoc, damu sându gâteckenŋiŋ,
 â maruku wâc hepie huoc!

⁵ Hâc, no ine wemo honekopac?
 Jaŋe hâwic-jopaha wiseŋgopienŋ i!
 Qac momorifâc-jeŋic bawahac-jopakicnere
 siŋsaŋ qahuc wise wisehuc risie fi mi
 enŋgopienŋ.

Rârec rârec hâhâwic sasawa,
 Wofuŋte dâŋ iŋuc.

⁶ Ŋic kike afeczi eipierâ sâcne mi wiseocmu,
 â ŋic tâpiri wânzâŋheczi sahad-ticne sâcne mi
 ŋezickeocmu.

Faic mâreŋko Eufрата opâ mecnao fâfâc-jopame
 waha jopaocmu hâcne.

⁷ “Mozi Nilu opâ iŋucne siwiŋnerâ sokakac,
 ehuc opâ-ticnezi opâ sâko iŋucne ruminehec
 fisikac me?

⁸ Aigita mâreŋzi hâcne Nilu opâ iŋucne siwiŋnerâ
 sokakac,
 â opâ-ticne i opâ sâko iŋucne ruminehec
 fisikac.

Ehuc mukac: No sokarâ mâreŋ qofackepemu,
 ehuc hae ƚerakac ine ima bahuc
 ƚecjuçfâc-ƚeŋic bâsirowec-jopapemu.

⁹ Ajoc, becâsic ƚoŋe gasackeniŋ,
 keretac ƚoŋe zocnehec raniŋ!

ƚic qac momori ƚoŋe zikare afeckeninŋ,
 Etiopia â Puti mâreŋ rune maro hepïe huekac
 â Ludi mâreŋkonec tepere fuŋne mamana
 ƚoŋe hâcne.

¹⁰ Zoanŋ gie bapa i Anutu Tâpiri Çuŋqasanŋ Wofuŋ
 ere zoanŋ,
 okac babazure zoanŋ hâcne,
 e ira râsifâc-ticne jaŋere okac babazu gie
 baocte.

Zika-ticnezi damenŋ ira ƚic nâcƚopahuc
 socƚeŋic nâ gapec tâmiric nâku biric boroc
 eocmu.

Anutu Tâpiri Çuŋqasanŋ Wofuŋ e fâic mâreŋko
 Eufрата opâo taha bâzi moc fuacneocte
 giene baocmu hâcne.

¹¹ O Aigita ƚokac zeŋoŋ,
 go Gileade haeo ferâ wokemanŋ rozemec!
 Go marasiŋ wiac bocjaha i maŋgânŋ rohuc juekic,
 go mocwâc mi bianŋkemu.

¹² ƚicne ƚicne jaŋe mimi busâqocgere biŋe
 mananŋgopiŋ,
 â kio owage i mâreŋ sâckerâ fokac.

Momori moc e momori âgo-ticnehec hehetuŋ
 ehuc
 rândinŋkerâ mâmâc jaha mâreŋko waha jo-
 faekac hâcne.”

13 Babe ñicwofuñ Nebukaneza e Aigita mârenj
 ima baocete fisizo ewec irec dân Wofuñzi porofete
 Jeremia âzâcnewec i kecziñuc:

14 “Aigita mârenjko musaweniñ,
 â Migidoli ira mufuaniñ;
 Memfisi â Tapanese haeo ira mufuaniñ wâc,
 ehuc muniñ: ‘Go sanañkerâ zawiehuc do-
 mac,
 wiac rârecguhuc fokac
 i zikazi qâcke-fâreocmu hâcne.’

15 Qac momorige e fuñne weniñucte sanañkerâ
 mi domahuc rândiñkewec?
 I Wofuñzi herândiñkewec irec.

16 Guru sâkofâcge jañe fâfâc-jopame waha
 jopawec,
 ehame ziñuc nazañ gazañ embiñ:
 ‘Ajoc, fific gururiñfâc-nâñec jañere zikare erâ
 fahare guru-nâñecko â fufua hae
 mârenj-nâñecko risienañ.’

17 Farao, Aigita ñicwofuñ ere zâñe ziñuc muniñ:
 ‘Damenj qâtirihuc ojawa qaqa.’

18 “Wofuñ Sâko, zâñene Anutu Tâpiri Qunqasan
 Wofuñ
 e ziñuc mukac:
 No jujâmbânjekopacte Taboro tikizi
 tiki gâcne jañere ñondenjko ñekac,
 â Karamele tikizi hâwec heririñko ñekac
 irec sâc ñic moczi ware fisiocmu.

19 Aigita ñecjucfâc-ticne ñoñe wisezore
 he wiac-ñeñic bâmockeniñ!
 Memfisi hae zoczi zâsenjkeme
 sesuctac fuarâ foocmu.

- 20 “Aigita mâreŋ e bulimakao ŋokacne qâricne
hawari bianŋ inucne,
e hâcne faic mâreŋkonec neŋgeczi râsi fisic-
neocmu.
- 21 Momorifâc-ticne mâreŋ ira jaba juhuc
monenŋte erâ zika gie baenŋopien
jaŋe bulimakao wokemaŋnehec inucne;
jei, jaŋe wâc inuc jaha fotikierâ mâmâc
wiseniŋmu,
jaŋe sisipiric damenŋ-jeŋic, bâbâtiŋ damenŋ-jeŋic
hâcne
izi maic-jopame mi sanaŋkeniŋmu.
- 22 “Fânâŋ-ticne i homazi foforâ juhuc
fânâŋkeekac inucne;
râsifâc-ticne jaŋe tâpirihec fisiniŋmu,
ehuc jâc qafaraenŋopenenŋ
irec sâc râric barâ fisi-jareniŋmu.
- 23 Jaŋe jâckâte-ticne uupicnehec i sifu
qafaranzeŋpienŋ,
jaŋe qirikiŋ jaŋere zare jâuruenŋopienŋ,
mi wowosec-jopane.
- 24 Aigitare otâ e qurutuaocmu,
e faic mâreŋkonec ŋicguru moc jaŋere meo
feocmu hâcne.
Wofuŋ nore dânŋ inuc.”

Israere bâbâmiriŋ dânŋ

- 25 Anutu Tâpiri Quŋqasanŋ Wofuŋ, Israere
Anutu e ziŋuc mukac: “Manenŋopienŋ, no Tebenŋ
mâreŋkonec Amonŋ nemu mecne â Farao mecne
erâ Aigitare nemu â ŋicwofuŋ jaŋe okacne
fisi-jarepemu, Farao erao qohotaenŋopienŋ jaŋe
hâcne. 26 No juju-jeŋic sipirickezo muŋopienŋ

jaņere meo r ec-jopapemu; Babe  icwofuņ
Nebukaneza   kiņ  icf c-ticne k c ene jaņere
meo h cne. Juku wiac i fua tarama Aigita
m reņko  ic m r c jaha  eņe juju ejumbien
irec s c mocw c  eņe juju enzepien, Wofuņ nore
d ņ inuc.

27 “Kiņ  ic-nane Jakobo go ine mi h wicguzejec,
  Israe go mi f f rezemec;
manakic, no h cne m reņ taickonec bataracgu-
pemu
er  q ricf cge jaņe k p cw ruo juņgopien
m reņ irecne jowac-jopa warepemu;
eme Jakobo e m reņ-ticnao risier  wama faio
juzejec,
er  mana mezac t miric juha
moczi moc mu h h wic mi ecnezejec.

28 Kiņ  ic-nane Jakobo no gohec jukopacte
mi h wicguzejec.
Tuņgupe  icne  icne jaņere  ondenko hur  jumen
jaņe sasawa b sirowec-jopapemu,
go ine mi b sirowecgupemu.
Aricne, mana manahuc sawa b tingupemu,
okacne t miric m c j mb ņ jucmur 
ine mi manakopac. Wofuņ nore d ņ inuc.”

47

Filisa  ic jaņere findaņd ņ

¹ Farao e zika qahuc Gaza hae ima mi bahame
Filisa jaņere biņe Wofuņte d ņ porofete Jeremi-
arao fuawec zine h cne.

² Wofuņzi kecziņuc mukac:

“Manaņgopieņ, faic mârēņkonec opâ sâko ware-
huc jukac,

 fisirâ rumi iņucne roma roma baocmu,
ehuc mârēņ â fainao wiac forakac,
 erâ hae maņnao ņec juc eeņgopieņ
 jaņe mâmâc qâuruc-jopa-fâreocmu.

Eme ņic jaņe owa bitaņ enzepieņ,
 â mârēņ ņecjufâc-ticne jaņe kio huse
 efârenzepieņ.

³ Becâsicfâc-ticne jaņere kike fânâņ
 â keretac â zafeņgâņnere fânâņ irec erâ
mamac jaņe naru motecfâc-jeņic
 honec-jopaniņte mi fotikieņiņmu,
 bipic tatara ejareha maņjeņic gâckeme iņuc
 eniņmu.

⁴ I Filisa ņic jaņe sipiricke-fâreniņte
 â Tiro â Sidon jaņere âgofâc nâfocne
 juņgopieņ
 jaņe wâc siroweniņte dameņne maickekacte
 iņuc eniņmu.

Wofuņ noni hâcne Filisa ņic,
 Kafatori nuc irecnec ņic zanzaņne
 sipiric-jopapemu.

⁵ Gaza haezi makuc bakac,
 â Asikalon haezi niniņkekac.
Anaka ņic irec zanzaņne ņoņe sa hac-ņeņic
 hetâcneeņgopieņ i wezimucko beheniņmu?

⁶ Ņoņe muņgopieņ: ‘Jei, Wofuņte zika
 go wezimucko ņemanacmu?
Go becsahacgao risierâ huc,
 erâ niniņkerâ fohuc juzemec!’

7 Mâc Wofuŋ noni giedân mucnepore
wemocko ŋemanaocmu?
No hâcne Asikalon hae â hâwec mâreŋ
ira ra râsi ejareocte mutâc necnepo.”

48

Moabi mâreŋte findaŋdân

1 Moabi mâreŋte dâŋ. Anutu Tâpiri Qunqasan
Wofuŋ, Israere Anutu e ziŋuc mukac:

“Jei, Nebo hae i ima bakicne,
â Kiriataim hae i mimi qaqa ecnerâ raucke-
kicne.

Hae sanaŋ i qurutuawec
â heroc qâropiekicne.

2 Moabi zâŋe biŋe-ticne omaewec.

Sisipiric fuacneocte râsi jaŋe Hesiboŋ haeo
dâŋticne mana biric ehuc ziŋuc muŋgopieŋ:

‘Ajoc, mâreŋ i imackenaŋ,
eme irec rune ŋicguru mocwâc mi
junzepieŋ!’

Eme Madameŋ haeo go iŋuc jaha bâniniŋguzo,
eme zikazi kikeo kikeo egarehuc
bâjâpecguocmu.

3 “Mananiŋ! Horonaim haeonec kio owa ziŋuc
fuarâ warekac,
‘Ima samaki â sisipiric sâko!’

4 Moabi i ima bakicne,
eme irec kio owa epie Zoari haeo ira
manaŋgopieŋ.

5 Jei, Luhiti haeo kiohuc feŋgopieŋ,
jei, Horonaim heâŋko wahahuc sisipiricte erâ
kio owa epie dâŋ ziŋuc fuakac:

- 6 Wiseniņ, juju-ņeņic ņezickeniņ;
 kâte donġi irec sâcko mâreņ burocnao juniņ!
 7 Go ficsanaņ ņerakac â moneņ mafa wiage foga-
 rekac
 irec manatec fewecte gowac rozo,
 â Kemosi nemu e taha bapafâc-ticne jaņehc
 kâpâcwâru ficko ranzepieņ.
 8 Sisipiric ņic e hae ņerakac sâc fisi-jareocmu,
 hae moc mi akickeocmu;
 ņic opâ qacnerâ juranġopieņ jaņe omaeniņmu
 â wâneņne wâneņne jaņe sisipiricte biņe
 eniņmu,
 ine Wofuņ noni mupo irec sâcko.

- 9 “Moabi fafakec râcnepie
 furuc furuc qarâ wisezejec;
 hae-ticne ņerakac i sesuctac fuarâ fozejec,
 maņnao ņic mocwâc mi junzepieņ!

10 “Moc e Wofuņte gie zoqac tâmiric mâc
 bâpârâckeocmu e sâwecte biņe ezejec, â ņic moc
 e zika-ticne soczi ruacnezacte aka hecneocmu e
 iņuc jaha sâwecte biņe ezejec.

Moabi ņic okacne fisi-jareocmu

- 11 “Moabi ņic jaņe juwicnaonectean
 wama faio juwarembiņ.
 Ehuc moseņ e mâreņ ijaha sesuc-ticne barâ ba
 eekac
 irec sâc jaha jaņe mâreņ-jeņicko jurâ ju em-
 biņ,
 ehame batac bawarec mi ejarekicne,
 â kâpâcwârue moc mi bacjopa rakicne.

Irec juju-jeñic aṇacnehec foweczi fokac,
â hosâc-jeñic mi omaewec.

12 “Irec manañgopien, damen moc maick-
eocmu ira ine gie bapa ñic râec-jopape fisi-jarerâ
rowañfic-jeñic heroc qâropieninmu â zocjenic
hetâc qâtâtieninmu. 13 Inuc fuame Moabi ñic
jane nemu-jeñicte mimierâ qurutuanzepien, ine
Israe kikefunzi Bete haeo roweckehuc mimierâ
qurutuawec irec sâc.

14 “Ñoñe wemo-ñeniczzi zinjuc muninmu:
‘Nâñe ñic qac momorihec â zikanñic fârine?’

15 Ima bapazi Moabi mârenj â hae-ticne sasawa
fisi-jareocmu,
ehame ñicmotecfâc-jeñic sanañne jaje
zikare nânâ eninmu.

Wofun Sâko, Anutu Tâpiri Qunqasanj Wofun
nore dân inuc.

16 Moabi sisipiric damen-ticne bembenkekac,
â zârâ zâpâ-ticne i biac jaha maickezo ekac.

17 Râreckehuc ñec juc eenjopien
â zâñe-ticne manaenjopien ñoñe sasawa
busâqoc manacnenin,
ehuc munin: ‘Ñicwofun gunu sananj bianj
i weninmu erâ hericke zan ewec?’

18 “Diboñ hae rune,
ñoñe popoonec waharâ rufe faio ñenin,
Moabi mârenje ima bapazi fisi-ñarerâ
ficsananj-ñenñic heroc qâropieocmu hâcne.

19 Aroe haere ñecjucfâc,

ņoņe hatamecko ra zâņe fipie raoc!
 Ehuc ņic ņokac wisehuc juņgopieņ
 jaņe wio-jarehuc munieņ, ‘Wemo wiac moc
 fuawec?’

20 Moabi e qurutuawec, maņticne omaewec
 hâcne;
 kio huse â kio owa enieņ!

Ehuc Moabi ima bakicne
 i Aroneņ opâo fisirâ mufuanieņ.

21 “Mareņ wâņeņ sâko i okacne fisicnewec, hae
 kecziņuc jaņe fisi-jarewec hâcne: Holoņ, Jaza â
 Mefata, 22 erâ Diboneņ â Nebo â Bete-Dibilataim,
 23 erâ Kiriataim â Bete-Gamulu â Bete-Meoneņ,
 24 erâ Kerioti â Bozera erâ Moabi mâreņko
 hae sâko gâcne sasawa, bembeneņko me zoricko
 ņeraņgopieņ jaņe mâmâc. 25 Moabi tâpiri-ticne
 bawahakicne â mene qazukicne, Wofuņ nore dâņ
 iņuc.

*Moabi ņic jaņe Israe mu gâgâwi ecnepie
 sâqorewec*

26 “Opâ sanâņ gumepie maņne sifuckezejec, e
 Wofuņ râsi ecnehuc sahaç fefe boc ewec irec.
 Moabi e waha qarâ e jahacne mamaņu ruame
 ņic jaņe honerâ mu gâgâwi ecnenzepieņ. 27 Me
 goki Israe mu gâgâwi mi ecnehuc jumeņ me? E
 fiuc roro jaņere ņondenko moc bâfuakicne, irec
 ere dâņ mu bâuac ehuc qizec fofotaric ecnehuc
 jumeņ me?

28 “O Moabi mâreņte ņecjuçfâç,
 ņoņe hae sâko beherâ qânâ hawecko juneņ
 me!
 ņoņe sâro fozic wipe jaņe hârâç mecko

- sareņ-jenċ baenġopienġ irec sâc eniġ!
 29 Nâġe Moabi saġac fefe-ticnere manambenġ,
 saġac fefe-ticne i hâhâwicne.
 E pepec zâġehhec, penaronġhec,
 pepec sâkohec â maġfefehec.
 30 Wofuġ no pepec penaronġ-ticne manakopac;
 jawadâġ-ticne i racne â eebapa-ticne i wiac
 fârine aricne.
 31 No irec hâcne Moabi jaġere erâ
 kio huse ekopac,
 Moabi sasawa jaġere erâ kio owa ekopac,
 â Kiri-Heresi ġic jaġere erâ makuc bakopac.
 32 O Sibemanec waiġ ġizec, no gore erâ kiokopac
 i Jazere haere kiombiġ irec sâc sawa mâcne,
 fehuc kiokopac hâcne.
 Qaġenġfâcġe jaġe hâwec fotâcnerâ
 haġ baraku Jazere haeo fisimbiġ.
 Sisipiric ġic eki ine ro nusec damenġko fisirâ
 nânâ wiacġe â waiġ hândâġe imackewec.
 33 Bubianġ â zeri i mârenġ guc-ticnehec
 â Moabi mârenġ ira arictac ewec;
 noni mupe oto sâko ġerakac ira waiġzi omaezeġec,
 waiġ bapazi waiġ hândâġne aġara hehuc
 mocwâc mi âte pisickeniġmu,
 aġara heniġmu i aġara fârine aricne.

Moabi qa sipiric ecneniġmu

- 34 “Hesibonġ â Eleale rune kio owa-jenċicte
 fânânġ i raku Jahazi ira fisikac; jaġe marac
 fânânġ-jenċ bafaharepie Zoarionec Horonaim â
 Egela-Selisia fisikac, i Nimirim opâzi zicke kerenġ
 ekac wâc. 35 No Moabi ira bâzi ririkere tikio
 ferâ nemu-jenċ hosâc âsu rikecneenġopienġ jaġe

hâcne omaec-jopapemu, Wofuᅇ nore dân iᅇuc.
³⁶ Irec maᅇnanezi Moabi mâreᅇte erâ ᅇafe wipe iᅇucne dânᅇhuc kio huse ekac, â Kiri-Heresi ᅇic jaᅇere erâ maᅇnanezi ᅇafe wipe iᅇucne dânᅇhuc kio huse ekac; i huhure wiac-ᅇeᅇic sipirickewecte.

³⁷ “Qizec â meczâwâ-ᅇeᅇic i bâtâcne-fârekiecne; mesahac-ᅇeᅇic sasawa hetâcnekiecne â matenᅇ qonaᅇkepie waha domakac. ³⁸ Moabi mâreᅇte ficbupu sâc wâwâneᅇ bakiecne irec faio â hae zoᅇa sâc ira ki mamakuc fua-fârekac; i noni Moabi mâreᅇ kuzi qaisockehuc qanzaᅇekiecne irec sâc qanzaᅇepo, Wofuᅇ nore dân iᅇuc. ³⁹ Jei, qanzaᅇekiecne i sâc moc, â kio huse eenᅇopieᅇ i sâc moc! Jei, Moabi e fotikierâ mimiehuc wisekac i sâc moc! Ehame râreckehuc ᅇec juc eenᅇopieᅇzi nifepupu ecneenᅇopieᅇ, ehuc ere manapie bipic tataranehec ekac.”

⁴⁰ Wofuᅇ no zᅇiᅇuc mukopac hâcne:

“Manᅇᅇopieᅇ, moczi tucwibe iᅇucne Moabi râsi
 fisicnerâ
 fakecne qaratiehuc sâocke-fâreocmu.

⁴¹ Ehame hae ᅇerakac i ro rauc eniᅇmu
 â ficsanaᅇ wiac i sakareniᅇmu.

Dameᅇ ira Moabi qac momorifâc-ticne jaᅇere
 maᅇ

i ᅇokac moc motec roocte gozi kime
 maᅇne gâckeekac irec sâc eocmu.

⁴² Moabi qa sipiric ecnepie
 ᅇicguru mocwâc mi juocmu,
 e Wofuᅇ no fenarehuc penaroᅇ ewec irec.

⁴³ O Moabi ᅇecjucfâc,
 ᅇoᅇe hâhâwic â nombâᅇ â wiwitic wiac

izi maic-ɲopazejec, Wofuɲ nore dâɲ iɲuc.
 44 Eme moc e wiac hâhâwicne wisecneocmu
 e nombânko huzejec,
 â moc e nombânkonec wefuocmuzi
 wiwiticko ferâ kizejec.
 No Moabi rune jaɲere faio wiac i hâcne
 okac babazu dameɲ-jeɲicko râepe feocmu,
 Wofuɲ nore dâɲ iɲuc.

45 “Nɲic wiseniɲmu jaɲe betaɲkerâ
 Hesiboɲ haere mumucko domaniɲmu;
 Hesiboɲ haonec ine zoc
 â Sihonɲe fickonec zocbâruɲ fuarâ
 Moabi ɲic ojowa qaɲgopieɲ jaɲere qizec
 zâseɲkeocmu.

46 Jei, Moabi rune!
 Kemosi nemu ɲicfâc-ticne ɲone
 sipiric-ɲopakicne;
 naru motecfâc-ɲeɲic jaɲe rocjoparâ
 kâpâcwârue bacjopa rakicne hâcne.

47 No ine dameɲ tataranao Moabi kâpâcwârue
 juju-ticne
 i mupe arictac eocmu.”
 Wofuɲzi Moabi mâreɲte okacdâɲ muwec i zira
 tarakac hâcne.

49

Amonɲic jaɲere findaɲdâɲ

¹ Amonɲic jaɲere dâɲ. Wofuɲzi kecziɲuc
 mukac:
 “Israe e ɲokâfâcne moc mi jucneɲgopieɲ me?
 Me merâfâc-ticne rauckeniɲte
 irec ɲic wâc arictac me?”

Eme Milikom nemu e Gade mâreŋ wemocte
 rauckewec,
 â ɲicfâcne jaŋe wemocte hae sâko-ticne
 ɲerakac irec maŋŋao ɲec juc eenɲopien?

² Irec mananiŋ: Damerŋ moc maickeocmu
 ira Amonɲic jaŋere hae sâko Raba irec mupe
 zikare ojowa fuacnezejec;
 eme hae i sesuctac fuarâ foha
 hae piticfâc-ticne zoczi zâseŋ-jopazejec.

Eme Israe e mâreŋ-ticne jâoc rombin
 i mocwâc jowac rozejec, Wofuŋ nore dân
 iŋuc.

³ “O Hesibon hae, go ima bapazi fisi-garekacte
 kio owa ezemec;
 Rabare otâfâc ɲoŋe wira wâwâsic enzepien,
 ɲoŋe materŋ qonaŋkehuc ki mamakuc eniŋ,
 ehuc ɲaŋaczia sahaç-ɲeŋic hetâc qâtâcneniŋ!
 Milikom nemu e taha bapafâc-ticne
 â fekiçnefâc-ticne jaŋehac kâpâcwâru ficko
 raniŋmu hâcne.

⁴ Naru maŋrâŋgeŋe micrereŋ tâmiric
 go mâriri rowaŋgao roweckehuc
 wemocte opâwâcgere penaroŋ boc ekomec,
 ehuc mukomec, ‘Mozi sâcne
 sanaŋke-nareocmu?’

⁵ Manakic, no mupe rârecguhuc juenɲopien
 jaŋeraonec wiac hâhâwicnezi fua-garezejec,
 Anutu Tâpiri Quŋqasaŋ Wofuŋ nore dân iŋuc.
 Eme ɲoŋe ru sâc bâtâtiç-ɲopazo,
 ehame wiseniŋmu jaŋe moczi moc mi hetu-
 maŋ-jopaocmu.

6 Eme juku zâhec ine Amonjic kâpâcwâruo
juju-jeñic
i mupe arictac eocmu, Wofuñ nore dân inuc.”

Edomjic janjere findanđan

7 Edomjic janjere dân. Anutu Tâpiri Qunqasan
Wofuñ e kecziñuc mukac:

“Temañ hae mâreñko mañqârân arictac efârewec
me?

Fuñne mamana jañe mamana-jeñic
omaewec

â mañqârân-jeñic sifuckewec me?

8 O Dedan mâreñ rune,
ñoñe zirecnec wiserâ ra soñkepañkeniñ!

No Esau, Edom hâcne sisipiric-ticne,
okac damañ-ticne hâcne i fainao râepe
feocmu irec.

9 Waiñ hândânne bătâcneñgopieñ ñic i jañe
fisi-garerâ hândân nâfocne mi behepie
foocmu,

ñafeo fiuc roro jañe fisirâ ejareme sâc
roniñmu.

10 No hâcne Esau wiac-ticne jâoc rofârekopac,
â haesoñ-ticne ñerakac i
bataniñke-fârekopac,
irec soñkeocte eipiekac.

Naru motecfâcne mecne,
qomâfâc-ticne â diguracfâc-ticne jañe
mâmâc
jopa sipiric ejarekicne, eme arictac ewec.

11 Bekâfâcge beheç-jopatec noni hone main
ejarezepac,
â hozecfâcge jañe norao roweckenzepieñ.”

12 Wofunzi zîruc mukac: “Manakic, opâ zazacne nânâ irec sâc mi jumbinzi sifu nâjâmbânkeniñmuo ine go wemocko bâbâtiñ tâmiric mâc jufecmu? Aricne, go bâbâtiñ tâmiric moc mi juhuc opâ zazacne nâjâmbânkezemec jaha. ¹³ No nahacne zâneo qetickehuc mupañkepo; ñic gâcnezi Bozera haere qâqîñ qahuc mu hâhâwic â mimi busâqoc â sâwecdân munzepieñ, ehame hae piticfâc-ticne sasawa jañe sesuctac fuarâ fonzepieñ sanañ. Wofun nore dân inuc.”

14 Eme Jeremiazi muwec:
 No Wofunțaonec biñedân moc manapo,
 ehame ñicne ñicñe jañerao kiñaññic moc
 zîruc muocte sorewec:
 “Ñoñe qâturerâ Edom râsi fisikneniñ,
 zikare faharenîñ!

15 Manakic, ñicne ñicne jañere ñondenko
 bawahacgupe qaisocgunzepieñ.

16 Ñic gâcne jañe gore hâwic-jopame
 honec-joparâ mañge sifuckeme mañfefe
 emeñ,
 haroñañ hawecko me tiki botânko
 jukomec go hâcne.
 Go tucwîpe inucne sareñge hahanço jâmbân bate-
 cne
 no sifu irecnec tungupe huzemec,
 Wofun nore dân inuc.

17 “Edom e niniñ siareren fuarâ foha ñic sa-
 sawa jâurunîñmu jañe bipic tatara ejareocmu, â
 qa bâtiñ ecnekicne irec mu ruruc ecneniñmu.

18 Ine Sodom â Gomora â hae gâcne rârec-jofahuc ñerambin jañe sisipiric fua-jarewec irec sâc jaha fuacneme ñiczi ira ñec juc mocwâc mi enzepien, â hae mañnao jaba juju i wâc mi fuazejec, Wofuñ nore dân ñuc. 19 Manakic, laion e Jordan uupickonec wefurâ lama jañere sapao fisiekac irec sâc jaha ututuñ jâpec-jopape wisenzepien; ehame ñic moc biac bâwosâekicne e irec soñañ juocte mucnepemu. Me no ñucne mozi moc jukac? Me mozi moc dângeo râecnucmu? Me mo soñañzi nore maio sanañkerâ domaocmu? 20 Irec Wofuñ no Edom mârenñe dân mupañkepo i mecne â Temañ mârenñe rune jañere dân mana biric epo i mâmâc mananiñ: Jei, lama wahakicne jañe wâc mâmâc bawisec-jopaniñmu. Jâmbomac, wiac fua-jareocmu irec erâ sapa-ñenic weañkerâ focmu. 21 Jañe rândiñkerâ jopame fânânñ sâko fuame mârenñi qiqiteckeocmu, ehame kio owa-ñenic i Hâwec Bâbâronko mananiñmu. 22 Manakic, moczi tuwipe ñucne faharerâ furuc furuc qahuc Bozera hae râsi fisicnerâ fafakecne qaratiehuc sâockeocmu. Dameñ ira Edom qac momorifâc-ticne jañere mañ i ñokac moc gozi kime mañne omaeekac irec sâc eocmu.”

Damasko haere findañdân

23 Damasko irec dân.

“Hamati â Arapada hae rune jañe
 biñe bâronñ moc manambiñte qurutuambiñ.
 Mana mezac ehapie manjenñic omaekac,
 mañwama bâfuaninñte eipienñgopienñ.

24 Damasko hae rune jañe manjenñic betañkeme
 wiseniñte fotikiambiñ,

- jane qarac qarac qan̄gopien̄;
 ehame ɲokac gozi kime hâwickeha
 zâic manaekac irec sâc ejarekac.
 25 Jei, hae zâne bin̄eh̄ec â zeri-ticnehec
 i sesuctac jâmbân̄ fuarâ fokac i!
 26 Irec ɲicmotecfâc-ticne jane hae zoŋa-ticnao
 hâmonīmu,
 â zikan̄jicfâc-ticne jane zoaŋ ira
 sipiricke-fârenīmu;
 Anutu Tâpiri Qun̄qasaŋ Wofuŋ nore dân̄ in̄uc.
 27 Eme no Damasko haere sac turuŋkepe zaocmu,
 ehame Ben̄hada erific wiac-ticne
 zâsen̄kezejec.”

Kedara â Hazoro irec findan̄dân̄

- 28 Kedara mâren̄ rune â Hazoro hae irec ɲicguru
 ɲicwofuŋ-jeŋic̄ec Babe ɲicwofuŋ Nebukanezazi
 jopawec jan̄ere dân̄.
 Wofuŋzi zinuŋc mukac:
 “Ajoc, ɲoŋe Kedara mâren̄ râsi ecnehuc ira
 ran̄zepien̄,
 ehuc zoaŋ wewefunaonec ɲic jopan̄zepien̄!
 29 Qoruc boze-jeŋic̄ â lamafâc-jeŋic̄ jowac rozo,
 bilan̄ke â wâcwiac-jeŋic̄ gâcne mâmâc;
 kamelefâc-jeŋic̄ bacjopa razo,
 ehame ɲic zinuŋc mu ojowa ejaren̄zepien̄:
 ‘Rârec rârec wiac hâhâwicne fofârekac i!’
 30 Hazoro rune, ɲoŋe wisenī,
 Babe ɲicwofuŋ Nebukaneza e wiac repicne
 en̄arezo maŋkekacte
 â sipiric-ɲopaoc̄te dân̄ne manasu biric ekacte
 bâruŋ jaha ra tâmirerâ son̄kepaŋkenī me!
 Wofuŋ nore dân̄ in̄uc.

- 31 “Ajoc, ñeje faharerâ ñicguru mana mezac
tâmiric
wama faio juengopien jañe râsi fisi-jarenin;
jañe hae-jeñicte motâc babasanañ-ticne aricne,
bucjenic jungopien hâcne,
Wofuñ nore dân inuc.
- 32 Kamelefâc-jeñic jowac ronzeñien,
â hae qowifâc-jeñic guru sâko i ñeñere biñe
ezejec.
Noni ine qizec susuc-jeñic naki ñifec â ñifec
bâtâcneengopien
ñic i jañe hâcne mâreñ sâc
bâtâtiéc-jopapemu,
erâ mupe rârec rârec irecnec sisipiriczi
maic-jopazejec,
Wofuñ nore dân inuc.
- 33 Eme Hazoro hae i kâte qâto jañere ñeñe hae
ezejec,
ehuc sesuctac fohuc juzejec sanañ.
Ehame moczi moc ira ñec juc mocwâc mi ezejec,
â ñic moczi mañnao ju fofo wâc mi ezejec.”

Elamñic jañere findañdâñ

34 Juda ñicwofuñ Zedekia e ñicwofuñ gie-ticne
funkerâ juha Elamñic jañere dân Wofuñtaonec
porofete Jeremiarao fuawec ine zinuc:

35 Anutu Tâpiri Qunqasañ Wofuñ e keczinuc
mukac: “Manakic, no Elamñic tâpiri-jeñicte
ñesin, tepe-jeñic hâcne i bazu-jarepemu. 36 Ehuc
mupe mâreñ tuturuñe 4 irecnec mânâñ 4 jañe
fisirâ Elamñic jopapie faic â juwic, ñifec â ñifec
rafârenzeñien. Erâ Elamñic qâtâtiéc-jopakicne
jañe ñicguru juranngopien sasawa jañerao sâckerâ

fisiniŋmu. ³⁷ Râsi ejarehuc juju-jeŋic sipirick-
 ezo muŋgopieŋ jaŋere maio ejarepe maŋjeŋic
 gâckezejeŋic; ehame sisipiric, maŋnanere zocbâruŋ
 hâcne, i fai-jeŋicko râepe fezejeŋic, â mupe
 zikazi bâjâpec-jopa rahuc nâmiziec-jopazejeŋic,
 Wofuŋ nore dâŋ iŋuc. ³⁸ No dâŋ mumutara
 ŋeŋe-nane Elam mâreŋko hepe ŋezejeŋic, erâ
 ŋicwofuŋ-jeŋic mecne, fekicnefâc-jeŋic mecne
 mâmâc bâsirowec-jopazepac. ³⁹ Dameŋ tataranao
 ine Elamte faio wiac hâhâwicne râepe fewec i
 bârâriezepac, Wofuŋ nore dâŋ iŋuc.”

50

Babe haere findaŋdâŋ

¹ Wofuŋ e Babe hae â Kaldea mâreŋte dâŋ
 porofete Jeremia ere micko râeme mufuawec i
 kecziŋuc:

² “Ŋicne ŋicne jaŋere ŋondenko dâŋ binaŋ ziŋuc
 ejarepie mananzepieŋ,
 ehame filac fârepie fezejeŋic!
 Dâŋ moc mi hesoŋkehuc musaweniŋ:

‘Babe hae i ro rauc ekicne,
 Beli nemuzi qurutuawec,
 â Merodac nemu e henzaŋ qanzaŋnekicne;
 nemuqâŋfâc-jeŋic jaŋe qurutuambiŋ,
 â qâŋ qâqâtâcfâc-jeŋic henzaŋ
 qanzaŋ-jopakicne.’

³ “Faic mâreŋkonec hâcne ŋicguru moc jaŋe
 râsi fisi-jarerâ mâreŋ-jeŋic ima baniŋmu, eme
 ŋic moczi moc ira ŋec juc mocwâc mi ezejeŋic,

aricne, ñic mecne qowi mecne irecneç wiserâ ratâmirenzepeñ.”

⁴ Wofuñzi zĩñuc mukac: “Damenñ ira Israe ñic â Judanñic jañe mâmâc jaha kiohuc ware fisiniñmu, ehuc Wofuñ Anutu-jeñic no wira basac enareniñmu. ⁵ Jañe Zionñ hatare mu wioc eniñmu, ehuc irapeç zâñe fihuc muniñmu: ‘Ajoc, nâñâc Wofuñtao qohotarâ zâzâfic fofosanañ moc enzepeñeñ, eme irec ninikeç moc mi fua-jâmbânkezejec.’

⁶ “Ñicfâc-nane jañe lama sifuckekicne iñucne; sonañfâc-jeñic jañe eatuc-jopapie qac qâsoric embiñ, jañe ejarepie tiki mâreñko rac warec ehuc jumbiñ, ehuc mâreñ tikine facne bazu beheç eku sapa-jeñicte nikeç-jopawec. ⁷ Eme bâfuac-jopambiñ sâc jañe nâcñjopambiñ, â kisâfâc-jeñic jañe mumbiñ, ‘Nâñe kiñ mi hotâckenğopeneñ, jañe Wofuñ sapa-jeñic fârine, mamacfâc-jeñic jañe worickehuc jumbiñ e hâcne bunao bambiñ irec.’

⁸ “Ajoc, ñeñe Babe haeoneç wiseniñ, Kaldea ñic jañere mâreñ beheniñ, ehuc lama ñicne jañe gurufâc-jeñic bânie-jareenğopieñ irec sâc eniñ. ⁹ Manañğopieñ, no faic mâreñkoneç ñicne ñicne guru sâko mu qafeñ ejarepe Babe hae râsi fisicnenzepeñeñ, ehuc meo roroc erâ sanañkehuc rauckenzepeñeñ, tepe motec-jeñic ine zikanñic fârinezi metariñ mi risieekac e iñucne. ¹⁰ Iñuc fuame Kaldea mâreñ i zikare mateñ eocmu, eme mateñ ronñmu jañe sâcñjopa-fârezejec, Wofuñ nore dân iñuc.

¹¹ “Oi, nore mâreñkoneç wiac fiuc rombiñ

ɲoŋe bubianɲ manazo murâ mananiɲ,
 â zeri ezo murâ eniɲ,
 ehuc bulimakao motecne kecqaŋ geunao
 kiwac qawac eenɲopienɲ iɲuc eniɲ,
 â becâsic ɲicnezi dâŋsâko dâŋeekac iɲuc
 dâŋeniɲ!

12 Nengoc-ɲeɲiczi ine qurutua-jâmbânkeocmu
 â rocɲopawec e mimieocmu;
 jâmbomac, e ɲicne ɲicne jaɲere wahamicne ehuc
 mâreɲ burocne â kereɲne â sawane iɲucne
 ezejec.

13 I Wofuɲ kimbeɲ-nanere erâ tuhutac fuame
 ninɲ siarereɲ fojâmbânkeocmu;
 eme Babe hae jâurunɲmu sâc jaɲe bipic tatara
 ejareocmu,
 â zârâ zâpâ-ticnere mu ruruc ecneniɲmu.

14 Tepeɲic sasawa ɲoŋe Babe hae somâ baniɲ,
 jaɲe sâqocne bahuc Wofuɲ bunaneo bam-
 biɲte
 tepe qâtâcnepie haeo feoc,
 tepe motec moc mi sakareniɲ!

15 Rârec rârec ziɲuc muhuc aɲara heniɲ:
 E dockewec, wâtuɲ-ticne rândiɲke qawec,
 qânâsac-ticne heroc qâropiekiecne.
 Wofuɲ nore okac babazu dameɲ fuakacte
 okacne bazucneniɲ;
 eki wiac ewec sâc ijaha ecnenzepeɲ.

16 Wiac hândâŋne tieɲɲopienɲ jaɲe mecne
 â qa roro dameɲko sâqe mictarazi gie
 baɲɲopienɲ
 jaɲe mâmâc bâsirowec-jopaniɲ!
 Eme ɲic gâcne jaɲe ru sâc zikazi hâmoc bâfuaekac

i hâhâwic bacnerâ guru-jenjicko risieniņmu,
â ru sâc jaha mâreņ-jenjicko wiserâ raniņmu.

Israe e juju-ticnao risieocmu

¹⁷ “Israe kikefuņ e lama moc laioņ jaņe jâpepie qac qâsoric eekac irec sâc; e qanaņ Asiria ņicwofuņte nânâ ewec, izi zâhec ine Babe ņicwofuņ Nebukaneza eki siec-ticne kinzaņnewec. ¹⁸ Irec Anutu Tâpiri Quņqasaņ Wofuņ, Israere Anutu no ziņuc mukopac: Manakic, no Asiria ņicwofuņ okac bazucnepo irec sâc jaha Babe ņicwofuņ â mâreņ-ticne ejactepemu. ¹⁹ Erâ Israe e juju-ticnao bârisiepe Karamele tikio â Basaņ mâreņko nânâ nâhuc juzejec, erâ Eferaim tiki mâreņko â Gileade ira wâc nâku gapeckezejec. ²⁰ Dameņ ira Israe kiņticnere mu wioc ehuc sifu mi bâfuaniņmu. Ehame Juda sâqocne-ticne wâc basaniņmu, no ņic nâfocne juniņte mana-jarepemu jaņe sâqocne bātâmire-jarepemu irec. Wofuņ nore dâņ iņuc.

Babe mâreņ okac babazu dameņ-ticne maickewec

²¹ “Go Merataim mâreņ râsi ecnehuc ira razemec,
erâ Pekodo ņecjuçfâc-ticne jaņe wâc râsi
fisi-jarezemec.

Ehuc joparâ bâsirowec-jopa-fârezemec,
â dâņ gaza mutâc epo i efârezemec.
Wofuņ nore dâņ iņuc.

²² Mâreņ-jenjicko zikare ojowa
â sisipiric sâko fuawec fokac.

²³ Jei, mâreņ sâko mâreņ irec hama sâko
i hefâuckekicne â qanzaņnekicne i!
Jei, Babe hae e ņicne ņicne jaņe honepie

- wiac bipic tataranehec ewec i!
- 24 O Babe hae, no bitin r e-garepo,
eme go qicqucne juhuc fer  mi kicguzejec i!
Go Wofuŋ no r si enaremente
b fuacgur  rocgupo.
- 25 Wofuŋ no zika rowaŋ-nanere mot c ror 
kimbeŋ-nanere s ndu maro rope wahakac;
ine h cne, Anutu T piri Qunqasaŋ Wofuŋ
nore gie Kaldea  c jaŋere m renko fuakac.
- 26 M ren tuturuŋne s c irecnec r si fisicneniŋ  !
Padi jacgoŋ rowaŋfic-ticne baandaŋkeniŋ,
ehuc padi inucne ro guruc ecner  zoczi rikepie
wiac n focne moc mi fozejec.
- 27 Bulimakaof c-ticne  cne q h moc-jopa-f reniŋ,
hezuc-jopaniŋte bacjopa raniŋ!
Jei, dameŋ-jenjic maickekac,
okacne babazu-jare dameŋ h cne!
- 28 “Mananiŋ! Babe m ren beher 
wisengopienzi mu ojowa engopien. Jaŋe Wofuŋ
Anutu-n jeczi okac babazu gie bawec, taha
ufuŋ-ticnere okac babazu gie h cne, irec biŋe
Zionko musokaniŋte inuc engopien.
- 29 “Tepenjiczi tepe tikokoc her 
q t cneengopien jaŋe Babe hae r si ecneniŋte
hetumaŋ-jopa-f reniŋ! Eme ra som  bahapie
 c moczi moc mi wisezejec. E Wofuŋ Israere
Tiri rune no pepec penaroŋ enarewecte
eebapa-ticnere s cko okacne bazucneniŋ, ehuc
wiac eŋarehuc juwec irec s c jaha ecnenzepien.
- 30 Irece  c motecf c-ticne jaŋe hae zoŋa-ticnao
zikare n n  enzepien,   momorif c-ticne jaŋe

zoaŋ ira sipiricke-fârenzepieŋ, Wofuŋ nore dâŋ iŋuc.

31 “Manakic, pepec penaronheç go hâcne râsi egarepemû,
Anutu Tâpiri Çuŋçasaŋ Wofuŋ nore dâŋ iŋuc.
No okacne bazu-garepemurâ
dameŋge maikekac hâcne.

32 Pepec penaronheç e dameŋ ira fâfâckeme waha çame
moczi mocwâc mi bafaharezejec.
Eme no hae-ticne ŋerakac i turuŋkepe zazejec,
ehuc râreç râreç wiac forakac i
zâseŋke-fârezejec.”

33 Anutu Tâpiri Çuŋçasaŋ Wofuŋ e kecziŋuc mukac: “Israe ŋic mecne â Judaŋic mecne jaŋe mâmâc jaha fific bacjopakicne. Eme kâpâcwâru ficko bacjopa rambiŋ jaŋe sasawa sakareç-jopahuc firueç-jopaninçte takic-jopakac.
34 Fifiçue-jeŋic zâŋene Anutu Tâpiri Çuŋçasaŋ Wofuŋ e ine sanaŋne. Eki hâcne dâŋjeŋic dopecke-jâmbânçkehuc bafic-jopame mâreŋko wama fuazejec, Babe ŋeçjuçfâc-ticne jaŋe ine ejaçeme sisi hâhâŋ faio junzepieŋ.

35 “Kaldea ŋic mecne, Babe ŋeçjuçfâc-ticne mecne,
fekicnefâc-ticne mecne erâ ŋicfâc-ticne ma-
manaheç
jaŋere faio zikazi fezejec,
Wofuŋ nore dâŋ iŋuc.

36 Faŋfaŋdâŋ mumu jaŋere faio zikazi feme

ņic mutucne enzepien.
 Qac momorifâcne jaņere faio zikazi feme
 maņjenic omaezejec.

³⁷ Becâsicfâc-jeņic â keretac-jeņic
 erâ ņonden-jeņicko ņic saħac ĥawari fuņne
 fuņneħec juņgopien
 jaņere faio zikazi feme
 ņokac iņucne enzepien.
 Boreņ zeņaņ fojarekac sâc
 i zika fuame ņiczi fiuc ronzezien.

³⁸ Zoaņ sanaņne qame opâ wiac-ticne zicke kereņ
 ezejec.

Wiac mâreņ i nemuqâņ jaņere mâreņ i!
 Â ņicfâcne jaņe nemuqâņfâc-jeņic repicne
 irec erâ maņjenic sifuckekac i!

³⁹ “Irec Babezi kâte qowi â kâte qâto
 jaņere ņeņe ĥae ezejec â ĥae maņnao qerazi
 juzejec wâc; ņiczi ine ira ņec juc mocwâc mi
 enzepien, â moczi maņnao ju fofo mocwâc
 mi ejâmbâņkezejec. ⁴⁰ Anutuzi Sodom â
 Gomora erâ ĥae rârec-jofahuc ņerambin jaņe
 bâsirowec-jopawec irec sâc jaha fuame ņic moczi
 ĥae ira ņec juc mocwâc mi ezejec, erâ moczi moc
 maņnao ju fofo ee i wâc aricne. Wofuņ nore dâņ
 iņuc.

⁴¹ “Manakic, faic mâreņkonec ņicguru moc ware
 fisiniņmu;
 ņicguru kâcqene sâko erâ ņicwofuņ bocjaha
 jaņe mâreņ qaņeņnaonec jâmbâņ faharerâ
 wareniņmu ĥâcne.

42 Jaņe tepe â sându-jeņichec,
 jaņe ņic zâzâicne â busâqoc-jeņic tâmiric.
 Ojowa-jeņic i hâwec sirizi fânâņkeekac iņucne,
 jaņe becâsicko rara ņic, jaņe zikaņic iņucne
 fisirâ Babe rune go râsi egareniņmu.

43 “Babe ņicwofuņ e jaņere biņe manarâ mene
 betaņkeekac;
 e hâhâwic ehuc ņokac moczi gozi kime
 fâfâreekac irec sâc ekac.

44 “Manakic, laionzi Jordan uupickonec wefurâ
 lama jaņere sapao fisiekac irec sâc no bârui
 jaha jâpec-jopape wisenzepieņ; eme ņic biac
 bâwosâekicne e hâcne âkendâņnepe ņicbomboņ
 ejarezejec. Mozi nore sâc moc jukac, me mo soņaņzi
 nore maio sanaņkerâ domaocmu? 45 Irec Wofuņ no
 Babe haere dâņ mupaņkepo i mecne â Kaldea
 mâreņte dâņ mana biric epo i mâmâc mananiņ,
 kecziņuc: Jei, lama wahakicne jaņe wâc bacjopa
 raniņmu, jâmbomac, wiac fua-jareocmu irec erâ
 sapa-jeņic weaņkerâ foocmu. 46 Eme mâreņzi
 wiwira ziņuc manarâ qiqiteckeocmu: Babe hae i
 ro rauc ekicne! Ehame kio owa-ticne fuame ņicne
 ņicne hazec-jeņicko huocmu.”

51

Wofuņzi Babe hae dâņticne mutarakac

1 Wofuņzi ziņuc mukac:

“Manakic, no sisipiric ņic moc qafenkepe

- Babe hae â Kaldea mârenj ñecjucfâc-ticne
fisi-jarezejec.
- ² No Babe haeo ñic oofañ-jenichec sorec-jopape
ofañne beheç enzepienj,
ehuc hae mârenj nânâ mafa wiac-ticne jâoc
ronzepienj;
i sisipiric damenjo rârec rârec irecnec fisirâ
hae somâ bahuc inuc hâcne enijnmu.
- ³ Tepeñic jañe tepe tikocko hezo eipienzepienj,
â marukuheczi penaronj ehuc mi
domanzeñienj.
Noñe ñicmotecfâc-jeñic mi akic-jopanzeñienj,
ehuc momorifâc-jeñic bâsirowec-jopa-fârenzepienj.
- ⁴ Eme qâhâmoc-jopakicne i Kaldea ñic jañere
mârenjo
â âke mârânj-jopakicne jañe hae zoña-jeñicko
foranzeñienj.
- ⁵ Kaldea mârenj i Israe Tiri rune no bunaneo
bahuc kiñhec efârewecte
Israe â Juda jahe Anutu-jekic,
Anutu Tâpiri Qunqasañ Wofuñ hâcne no be-
hec-jofape
hozec inucne moc mi juzepirec.
- ⁶ “Babe hae mârenjkonec wiseniñ, ehuc ere kiñte
erâ
mi sipirickehuc ru sâc juju-ñenjiç
ñezickenzepienj.
Damenj i Wofuñ nore okac babazu damenj hâcne,
no eebapa-ticnere okacne râcnepemu.
- ⁷ Babe e Wofuñ nore meo gol râqâc inucne ñeme
mârenj sâc ñicne ñicne jañe hone añac ehuc
wainj opâ-ticne gapecmâc nâpie

manjenjic sifuckewec.

⁸ Babe haezi ututuŋ waha qahuc qanzaŋnewec,
irec erâ kio owa eniŋ!

Zâic-ticnere wokemaŋ rorâ ruacne honeniŋ,
eme bianke wiac moc eocmu me weniŋuc.

⁹ ‘Nâŋe Babe bâpiaŋkezo mumbenŋ,
e ine bâbâpiaŋkenere sâc mi ewec;
irec e beherâ mâreŋ-nâŋec sâc rafârenanŋ,
erao okac babazu fuawec i feku sambânŋ
heuakac,
â faic karorac fokacko fe fisikac.’

¹⁰ Wofuŋ e bafic-nâpohuc fuŋne-nâŋec
bataniŋkewec,
irec Wofuŋ Anutu-nâŋecte eebapa i
Zionko muromackenanŋ.

¹¹ “Tepe motec qâteckeninŋ!
Maro hepie huoc!

Wofuŋ e Babe bâsiroweocte manasuhuc Mede
ŋicwofuŋ qafeŋ-jopame momori wânzânŋ
eŋgopienŋ, izi Wofuŋ okac babazu gie-ticne, taha
ufuŋ-ticnere okac babazu gie hâcne.

¹² Babe haere qânâsackopec filac fârepie feoc,
rucgerenŋ juniŋ, soŋanŋ râec-jopaninŋ
â ruc bapa ŋic ejarepie ruc bahuc domaniŋ!
Wofuŋ e Babe ŋecjucfâc-ticne wiac ejareocte
mana biric ewec
i fârine bâfuaocte ekac hâcne.

¹³ Jei, opâ sâko heririnŋnao ŋec juc ekomec,
â boreŋ zeŋaŋge guru sâko fokac
go hâmoc damenŋge maickekac
â juju damenŋge bâtâcnekicne.

¹⁴ Anutu Tâpiri Qunqasaŋ Wofuŋzi

e jahacne zâņeo qetickerâ mupaņkehruc
muwec:
Jâmbomac, haemaņgao ņic jaņe jagitotoc inucne
juipiehapie
ine râsi jaņe sifu fisi-garehuc semuja
hegarenzepieņ.

15 “Tâpiri-ticnezi mâreņ bâfuawec
â maņqârâņ-ticnezi mâreņ sâko mâreņ irec
hobeteņne râewec,
erâ mamana-ticnezi sambâņ qaratiehuc râe
rawec

16 eki hâcne cuņmaņko dâņeme
sambâņ rurumaņnao opâ fânâņ sâko fuaekac,
eki hâcne hoe heocte bâbâric bâfuaekac,
â rowaņ-ticnaonec mânâņ soreme fisiekac.

17 Mâreņņic jaņe furu jaha mutucne â mamana
tâmiric,
golzi wiac bapa sasawa jaņe qâņ
qâqâtâc-jeņicte qurutuaeņgopieņ,
nemuqâņfâc-jeņic jaņe wiac jabane â mi ju-
june irec.

18 Jaņe wiac fârine aricne,
wiac hone gâgâwine hâcne;
jaņe bâbâtiņ dameņ-jeņicko siroweniņmu.

19 Anutuzi Jakobore rowaņ jukac e jaņere sâc
aricne,
e hâcne wiac sasawa irec bâbâfua,
Israe ņic jaņe fuņfuņfâc-ticne,
zâņe-ticne Anutu Tapiri Cuņqasaņ Wofuņ.”

20 Wofuņzi kecziņuc mukac:

“Babe go hama-nane â zika-nane ehuc jumeņ,

- inuc junarehan no ñicne ñicne
 henzan-jopapo
 erâ ñicwofun â gurufâc-jenÿic sipiric-jopapo.
 21 No hama izi becâsic â becâsicko rara ñic henzan
 qanzan-jopapo,
 erâ keretac â ñic fainao ñeenÿopien jañe
 mâmâc.
 22 No hama izi ñic mecne ñokac mecne,
 ñic ñokac qizecne erâ socqâri,
 ñicmotec â ñokac zenon jañe henzan-jopapo.
 23 No hama izi sonan â qowifâc-jenÿic mecne,
 hesarac ñic â bulimakaofâc-jenÿic
 giere bafic-jopaenÿopien mecne,
 erâ wâc kia sâko â momori micne jañe mâmâc
 henzan-jopapo.

24 “No Babe â Kaldea mâren ñecjucfâc-ticne
 sasawa jañe Zion sindan ecnembin irec okacne
 zâne fai-jenÿicko bazu-jarepemu. Wofun nore dân
 inuc.

- 25 “Sisipiric tiki go manac:
 Mâren sâc sisipiric bâfuamen go râsi
 egarepemu,
 gorao hâcne tâpiri-nanere fune bataniñkehuc
 haronan faionec tunÿupe
 hurâ tiki zoczi zâsenÿekicne inucne ezemec.
 26 Eme goraonec wâtuñ ropie izi jâmâ wâtuñ eha
 râepie huekac i arictac ezejec,
 me jâc wiac woke qâtâcte binÿe ropie fifisi
 i wâc arictac jaña ezejec;
 go hae mâren ima bacgukicne
 inuc fohuc juzemec sanan. Wofun nore dân
 inuc.

Babe hae e kiñticnere okacne fisicnekac

27 “Nõje mârenko filac fârepie feoc!

Nicne ñicne jañere ñondenko qeñ qapie
dâñeoc!

Nicne ñicne jañe Babe hae râsi ecneniñte
bazawiec-jopaniñ!

Nõje Ararata â Mini erâ Asekena ñicguru
jañe hefârec-jopapie râsi fisicnenzepieñ!

Ñikare micne râec-jopaniñ

â becâsic ine jagitotoc guru sâko inucne
bacjopa wareniñ.

28 Nicne ñicne jañe râsi ecneniñte
bazawiec-jopaniñ,

ine Mede mârenñte ñicwofuñ â ñic fekicne
â kia sâkofâc-jeñic

erâ uucmañ-jeñicko ñic juranropieñ sasawa
jañe hâcne.

29 Mâreñ i qiriñ qahuc qiqiteckeocmu,

Wofuñzi Babe hae mârenñte dâñ mana biric
ewec

i fârine bâfuahuc ima bame

tuhutac luarâ foocmu irec.

30 Babe qac momorifâc-ticne jañe zika gie behem-
biñ,

ehuc ficsoñ-jeñic ñerakac sâc ira ñeñgopieñ;
jañe tâpiri-jeñic omaeme

ñokac jañe inucne embiñ juñgopieñ.

Ficjeñic turuñkepie zakac,

â motâc babasanañ-jeñic i wâc qazukicne.

31 Hae qizec-ticne orâñkehuc ro rauc ekicne

irec dâñ Babe ñicwofuñ âzâcneniñte kiñaññic

â biñe mumu jañe zuzuhuc jaha fisihuc do-
mañgopieñ.

32 Opâ rendac ñebâzickerâ sonaŋkenŋopien,
aka sanaŋ wiac zoczi rikepie zakac,
ehame momori hâbi-jeŋic goronŋkekac.

33 Anutu Tâpiri Qunqasaŋ Wofuŋ,
Israere Anutu e ziŋuc mukac hâcne:
Babe haere otâ e nânâ rowaŋficko mârenj âtepie
sanaŋkeekac irec sâc;
eme damaŋj bemaŋeŋe sawa tarama
okac damaŋj maickeocmu.”

34-35 Zion ñecjucfâc-ticne jaŋe ziŋuc munzepien:
“Babe ñicwofuŋ Nebukaneza e sipiricnuhuc
nâcnuwec,
e kuzi tacne iŋucne behecnuwec,
e oâ iŋucne erâ qâcnume hobu-ticne fusucmawec,
e hae mârenj biaŋnaonec jâpecnuwec.
No â soctofafâc-nane wiac sâqocne enârekeicne
irec kiŋtofa Baberao fozejec.”

Â Jerusalemzi ziŋuc muzejec:
“Socnane hoŋkekeicne irec kiŋ i
Kaldea mârenj rune jaŋerao fozejec.”

36 Irec Wofuŋzi kecziŋuc mukac:
“Manakic, no dâŋge dopeckehuc
âkehocgurâ okac babazu gie bapemu.
Noni mupe opâ sâko-ticne kereŋkezejec,
â opâ zâŋe-ticne zickezejec.

37 Babe hae ima bapie sesuctacne fuarâ fome
kâte qâto jaŋere fic hae ezejec;
i ñic tâmiric foŋa gâcnezi honehuc bipic tatara
ejareha
mu ruruc ecnenzepien.

- 38 “Jaņe babafic ehuc laioņ iņucne
owackeenņopieņ,
jaņe laioņ motecne iņucne ņuruņkeenņopieņ.
- 39 Jaņe bujeņic bāruņkeme
tiwā zepec moc bāmocke-jarepemu,
ehuc maņsifuc opā gumec-jopapemu;
eme jaņe docke betaņ erā guņsanaņ foku
mocwāc mi qārenzepieņ.
- 40 Lama â noniņ hezuc-jopaniņte bacjopa
raeņņopieņ
irec sâc mupe bacjopa raniņmu.
- 41 “Jei, Babe hae i ro rauc ekicne,
māreņ sâko māreņ irec zāņe biņe i bawaha-
kicne i!
Jei, ņicne ņicne Babe hae honerâ
bipic tatara ejarewec i!
- 42 Hâweczi wefurâ Babe hae bārârâņnewec,
â siri sâko-ticnezi fânâņkehuc qâuruckewec.
- 43 Hae-ticne ņerawec i tuhu erâ niniņ siarereņ
fuawec,
māreņ kereņne â burocne hâcne;
moczi moc maņnao ņec juc mocwāc mi
ejâmbâņkeocmu
â ņic moczi ira sicne fotâc wāc mi eocmu.
- 44 Eme no Babe haeo Beli nemu okacne
râcņepemu,
ehuc wiac qâckewec i gozi bape micticnaonec
maņume wahazejec,
erâ ņicne ņicne jaņe erao mocwāc mi heâckerâ
ranzepieņ.
Babe hae irec qânâsac i heropiekicne hâcne.
Wofuņ nore dân iņuc.

Babe haere ki mamakuc ekicne

45 “Njicfâc-nane, ñoñe hae irec mañnaonec wiserâ raniñ,

ñoñe sasawa Wofuñ kimben-ñanere
zocbârũzi

sipiric-ñopazacte juju-ñeñic ñezickeniñ!

46 Erâ maññeñic mi omaezejec,

â mâreñ ira sawadâñ moc fuame
manarâ mi hâwic-ñopazejec.

Ine jara moc sawadâñ moc

â jara moc ira sawadâñ moc fuaocmuo,

me bâbâzâic fuaocmuo,

me ñicbombon moczi ñicbombon âgo-ticne
râsi ecneocmuo

ine mi hâwic-ñopazejec.

47 “Manañgopieñ, damen moc maickeocmu ira

Babe haere qâñ qâqâtâcfâc
bâsirowec-jopapemu,

ehame hae mâreñ i weañke-fâreocmu

â qâhâmoc-jopakicnefâc-ticne jañe sasawa
hae mañnao foraniñmu.

48 Eme sambâñ â mâreñ jahere mañnao wiac
jufâreekac

izi Babe haere mu zeri ezejec,

i ima bapafâcne jañe faic mâreñkonec fisic-
neniñmu irec.

Wofuñ nore dân iñuc.

49 Israe qâhâmoc-jopakicnefâc-ticne jañere erâ
Babe ima bazô,

ine Babe haere erâ mâreñ sâc ñic
qâhâmoc-jopakicne irec sâc.

50 “Zika wisecnembiņ ņoņe ine
 ņeņe râqâc mi ehuc ranzepieņ!
 Ņoņe zoricko juhuc Wofuņ nore manasunzepieņ,
 ehuc maņņeņic Jerusalemko râepie domaze-
 jec.

51 ‘Nâņe mimi qaqa enârekicnere
 mimi busâqoc manaenġopeneņ;
 mimizi ņecnâpome zâņe mai-nâņec bâsoņkehuc
 juenġopeneņ,
 i ņic jabanezi Wofuņ ufuņ-ticnere tiri wiac
 ima bambiņte.’

52 “Irec manaņġopieņ, dameņ moc maickeocmu
 ira
 Babe nemuqâņfâcne okacne bazu-jarepemu,
 eme hae mâreņ-ticne sasawa ira
 zâpâ âkec-jopakicnezi kio huse enzepieņ.

53 Eme Babe hae bafekupie sambâņ heuaocmuo
 me qânâsac-ticne hâņ bafekupie
 huhuckene mi eocmuo ine
 no sifu sisipiric ņic sorec-jopape
 fisicnenzepieņ,
 Wofuņ nore dâņ iņuc.

54 “Mananiņ! Babe haeonec kio owa fuarâ
 fânâņne warekac,
 erâ ima sâko irec fânâņ Kaldea ņic jaņere
 mâreņkonec fisikac.

55 Ine hâcne, Wofuņ no Babe ima bahuc
 hae maņņao ojowa sâko foekac i
 bâniniņķekopac;
 râsi jaņe hâwec siri iņucne fisihuc opâ sâko
 fânâņķeekac

irec sâc fânânkenḡopienḡ,
miczonzon-jenḡic fuakac i hâhâwicne.

⁵⁶ Sisipiric ḡic e Babe fisicnekac hâcne;
eme hae irec momorifâc kâpâcwâru
bacjopaniḡmu

â tepe nenḡoc-jenḡic i bazuniḡmu;
Wofuḡ no okac babazu Anutu,
irec okac bazu-jare-jâmbânḡkepemu.

⁵⁷ Fekicnefâc-ticne mecne, mamana ḡicfâc-ticne
mecne,

mârenḡ soḡaḡfâc-ticne mecne, kia
sâkofâc-ticne mecne,

erâ ḡac momorifâc-ticne mecne jaḡe opâ sanḡ
gumec-jopape

ḡuḡzi ḡâmâc-jopame foku mocwâc mi
ḡârenḡepienḡ;

Wofuḡ Sâko, Anutu Tâpiri ḡuḡḡasanḡ Wofuḡ
nore dâḡ iḡuc.”

⁵⁸ Anutu Tâpiri ḡuḡḡasanḡ Wofuḡ e ziḡuc mukac:

“Babe haere ḡânâsac kâcḡene i heroc ḡâropiepie
mârenḡhec sâc mocjaha ezejec,

â motâc mimiḡ-ticne i zoczi rikepie zazejec.

Iḡuc fuame dâḡ ziḡuc fokac i fârio ḡaocmu:

ḡic gurune gurune jaḡe wiac ebac epie

fâri tâmiric eekac,

â ḡicne ḡicne jaḡe gie sâko bakupie

fârine fuame zocte biḡe eekac.”

Babe hae omaeocte mukicne

⁵⁹ Juda ḡicwofuḡ Zedekia e ḡicwofuḡ jume
jara 4 eha, Neriare ḡokâ Seraja, Masejare
ḡosa hâcne, e ḡicwofuḡhec Babe haeo razo

eme porofete Jeremiazi dân âzâcne mutâc ewec zine hâcne. Seraja e hata jujure mumutâc â soᅇaᅇ juwec. ⁶⁰ Jeremia eki ine Babe hae wiac hâhâwicne fuacneocte mukicne irec dân i papiao qâreᅇke-fârewec, ine Babere dân qâreᅇkekicne i sasawa hâcne. ⁶¹ Erâ Jeremiazi Seraja ziᅇuc âzâcnewec: “Go Babe haeo fisirâ dân zi zoqac erâ wose-jare-fârezemec. ⁶² Erâ muzemec, ‘Wofuᅇ, go gahac hae zi râsi ecnehuc bâsirowecmurâ mumeᅇ, i maᅇᅇnao ᅇic mecne qowi mecne mocwâc mi juhapie tuhutac fuarâ fosanaᅇkeocte iᅇuc emeᅇ.’ ⁶³⁻⁶⁴ Eufрата opâo behetec hutâmirezeᅇec. Ehame ziᅇuc muzemec, ‘Babe hae e irec sâc jaha tâmirezeᅇec, eme wiac hâhâwicne mupe fainao feocmu i hetararâ mocwâc mi faharezeᅇec!’ ”

Jeremiare dân i zira hâcne tarakac.

52

Zedekia e ᅇicwofuᅇ gie bawec (Nic II 24:18-20; Bin II 36:11-16)

¹ Zedekia e jara-ticne 21 bazume ᅇicwofuᅇ âkendâᅇᅇpie juwec. Erâ Jerusalem haeo ᅇicwofuᅇ gie-ticne bahuc jukuhame jara 11 tarawec. Neᅇgoc-ticne zâᅇene Hamuta e Lebina haeonec Jeremia wase-ticnere otâ. ² Zedekia e Wofuᅇzi wiac honeme sâqoreekac i hâcne ehuc juwec, ine Jojakimzi ejuᅇec irec sâcko jâmbâᅇ. ³ Eme Wofuᅇ e juku kimbeᅇ-ticnere erâ Jerusalem â Juda beheᅇ-jofawec.

Jerusalem hae rauckembiᅇ (Nic II 24:20-25:7; Jer 39:1-7)

Zedekia eki ine Babe ñicwofuñ râpeckewec.
⁴ E ñicwofuñ juhame jara namba 9-ko mosa namba 10 â zoaᅇ gie bapa namba 10 jaha ira Babe ñicwofuñ Nebukaneza momorifâcne rocjopa-fâreme Jerusalem hae râsi fisicnembij. Fisirâ hae somâckehuc rârec rârec zae bambij.
⁵ Inᅇ erâ somâ bahuc juwefukuhapie Zedekia ñicwofuñ juju dameᅇ-ticnere jara namba 11 maickewec. ⁶ Eme mosa namba 4 â zoaᅇ gie bapa namba 9 ira haeo roroc sâkozi qârâᅇkeme hae mâreᅇ irec ñic jaᅇe nânâ omae-fâreha basambij.
⁷ Ehame râsi jaᅇe haeo feniᅇte sac âkezuᅇpie hata fuawec. Eme ñicwofuñ â momorifâcne sasawa jaᅇe honerâ ᅇaᅇeo sac jajahec ᅇondeᅇ-jekicko ñicwofuᅇte zariᅇ gieo moc domawec i fotâcnerâ wisembij. Ine Kaldea ñic jaᅇe hae sâko orâᅇkehuc juhapie jaᅇe Jordaᅇ wâneᅇkopec rambij. ⁸ Eme Kaldea momori ñic jaᅇe ine ñicwofuñ jâpe raku Jeriko wâneᅇko, ñicfâcne jaᅇe beherâ tâtiehapie bâfuambij. ⁹ Erâ ñicwofuñ bâfua rorâ Hamati mâreᅇko Ribela haeo Babe ñicwofuñ ᅇewec erao barambij. Eme eki dâᅇ mutaracnewec. ¹⁰ Ehuc mume Zedekia ᅇokâfâcne jaᅇe mamac-jeᅇicte zâᅇe faio qâhâmoc-jopambij, erâ Judaᅇic fekicne Ribela haeoa jopa-fârembij wâc.
¹¹ Erâ mume Zedekia jahacne zâᅇene riporâ aeᅇ niᅇᅇiᅇko râembij. Erâ Babe ñicwofuᅇzia mume Babe haeo bararâ kâpâcwâru ficko râeᅇpie ira ᅇehuc juhame hâmoc dameᅇ-ticne maickewec.

*Judaᅇic kâpâcwâruo bacjopa rakicne
 (Nyc II 25:8-21; Bin II 36:17-21; Jer 39:8-10)*

¹² Nebukaneza e Babe ñicwofuñ juhame jara 18 tarawec; eme irec faicnao mosa 5 irec zoañ gie bapa namba 10 ira ine Nebuzaradañ e Babe ñicwofuñ momori funfunfâc-ticne jañere micne juhuc ñicwofuñte kiñañ qahuc juweczi Jerusalem haeo fisiwec. ¹³ Fisirâ Wofuñte taha ufuñ mecne, ñicwofuñte erific mecne â Jerusalemte fic wiac sawa i turuñkeme zawec. ¹⁴ Â qânâsac Jerusalem hae râreckehuc fowec i Kaldea momori jañe ñicwofuñ momori funfunfâcne jañere micne ehac jumbiñzi heroc qâropiemiñ. ¹⁵ Eme ñicwofuñte momori funfunfâc jañere micne Nebuzaradañ e ñic qarâ suriñne mecne, â haeo ñic nâfocne beheç-jopapie jumbiñ jañe mecne, â wiserâ Babe ñicwofuñ erao zuhuckemiñ jañe mecne, erâ metâ bapa ñic zanzañne jañe mâmâc bacjopa rawec. ¹⁶ Momori funfunfâc jañere micne Nebuzaradañ e mâreñ irecnec ñic wahakicne jañeraonec gâcne jañe waiñ gie bahuc he sarac eniñte beheç-jopame ñemiñ.

¹⁷ Wofuñte taha ufuñko wâtuñ aeñ bâbâronzi bakicne domawec, erâ râqâc irec ñeñe wiac â opâ râqâc sâko aeñ bâbâronzia bakicne ñewec i Kaldea ñic jañe henzañ qanzañnerâ aeñ bâbâron-ñicne Babe haeo furu jaha barambiñ. ¹⁸ Erâ kuzi mecne, sapac mecne, sâqe mecne, soc titiere râqâc mecne, hosâc âsu ririkere râqâc mecne, erâ wâcwiac gâcne sasawa aeñ bâbâronzi bakicne â ufuñko taha giere baju jumbiñ i wâc rorâ mâmâc barambiñ. ¹⁹ Erâ râqâc wiac piic piic, zoc uucnere fañ, soc titiere râqâc, kuzi wiac, kendo dodoma, hosâc âsu ririkere râqâc

erâ taha bâzire râqâc, ine hâcne wiac sasawa gol â siliwa jâmbânzi bakicne i momori funfunfâc jaņere micnezi barawec. ²⁰ Wâtun jajahec, opâ râqâc sâko â bulimakao hawari 12 derâ doma rambiņ, erâ Wofun ufun-ticnere râqâc irec ņeņe wiac ņicwofun Salomozi mume bambiņ, wiac i sasawa irec aeņ bâbâronzi sigelio fefere sâc jâuruwec. ²¹ Wâtunte ine ziņuc: Wâtun moc zoricne-ticnere sâc 18 kubi,* â oorâņ-ticne i muc râepie orâņkeha 12 kubi ewec; wâtun i maņ hawecnehec, sahacnere qâfoņe ine memotec 4 irec sâc ewec. ²² Wâtun fainao utune moc aeņ bâbâronzi barâ râekicne i 5 kubi ferâ domawec; utune rârec rârec ine eri qâreņ mizekicne â wiac moc jâchândâņ tinac râekicne, wiac i aeņ bâbâronzi bafârekicne hâcne. Eme wâtun namba 2 irec wiac ijaha fowec. ²³ Qaņeņnao wiac jâchândâņ tinac orâņkehuc râekicne irec zare 96, â jâchândâņ eri mimize râreckehuc fowec irec qâqâhâc zare ine 100.

²⁴ ņicwofunte momori funfunfâc jaņere micne e taha bapa sâko Seraja â babafic-ticne Zefania erâ motâc soņaņ jahec â moc jaņe bacjopa raocte rocjopawec. ²⁵ Jerusalem haeonec micne sâko moc momori jaņere soņaņ juwec e mecne â ņicwofunhec jumbiņ ņic i jaņeraonec 7 haeoa juhapie mâmâc rocjopawec; erâ momori micne ere qâreņņic, hesarac ņic jaņe gie baniņte qâreņ-jopa jujec, ņic e hâcne erâ hesarac ņic 60 haeoa juhapie bâfuac-jopambiņ jaņe iņuc jaha rocjopawec. ²⁶ Nebuzaradaņ, momori funfunfâc

* **52:21:** 1 kubi i 18 inses me 46 senti meda irec sâc.

janere micnezi ñic i jañe hâcne rocjoparâ Babe ñicwofuñ Ribela haeo ñewec erao bacjopa rawec. ²⁷ Babe ñicwofuñ eki ine mume Hamati mârenko, Ribela haeo hâcne qâhâmoc-jopambiñ. Ehame Juda kikefuñ jañe mâren-jenickonec kâpâcwâruo bacjopa rambiñ.

²⁸ Nebukaneza e Juda ñic ñokac bacjopa rawec jañere zare zi: Ñicwofuñ erâ juhame jara 7 ewec damen ira 3023 bacjopa rawec. ²⁹ Ñicwofuñ erâ juhame jara 18 ewec damen ira Jerusalem haeonec ñic 832 bacjopa rawec. ³⁰ Ñicwofuñ erâ juhame jara 23 ewec damen ira Nebuzaradan, momori funfunfâc jañere micne eki Judanic 745 bacjopa rawec. Qâqâhâc zare-jenic ine 4600.

*Jojakinzi kâpâcwâruonec wahawec
(Ñic II 25:27–30)*

³¹ Eme Juda ñicwofuñ Jojakin e kâpâcwâruo jukuhame jara 36 â mosa 11 erâ zoan gie bapa 24 tarame ine Babe ñicwofuñ Ewi-Merodaczi akickehuc mume kâpâcwâruonec wahawec. Ine ñicwofuñ gie-ticne funkewec jara ira inuc ewec. ³² Erâ âgo ecnehuc ñeñe-ticne bafeme ñicwofuñ gâcne ehac Babe haeo jumbiñ jañere ñeñe biri irec micnao ñewec. ³³ Eme Jojakin e kâpâcwâruo ñaqi-ticne hetararâ ñicwofuñhec nânâ nâhuc jukuhame hâmoc damen-ticne maickewec. ³⁴ Sahacte dope wiac irec zinuc ekicne: Babe ñicwofuñ e zoan sâc dope wiac-ticne râcnehuc juhame hâmoc damen-ticnao tarawec.

Kâte Bible
The Holy Bible in the Kâte language of Papua New Guinea
Buk Baibel long tokples Kate long Niugini

copyright © 1978 The Bible Society of Papua New Guinea

Language: Kâte (Kate)

Translation by: Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-02-09

PDF generated using Haiola and XeLaTeX on 21 Apr 2023 from source files dated 9 Feb 2023

76869875-8293-5126-8b67-c576c145ac3c